

ÛJAADIKA DÏYÌ DYÈNDÈ



Tushaalaayi biimanyine kuulu ne biinyike mitu yetu.

Mukalenge Yesu, tudi ne kusakidila Kûdi mu dinda emu bwa dyêsè dya kubwela mu Bwikadi Bwebe mu nzubu Webe, mudi cisamba Cyebe cidisangishe mu Dînà Dyebe. Ne byônsò bidi anu m'Byebe, Mukalenge. Nenukuri tudi tudilambula Kûdi mpindyewu bwa dindila ditudi naadi munda mwa myoyi yetu bwa di—disangisha bwa aba badi kabayi ne Nzambi ne kabayi ne Kilisto, bwa bôbò kusungidiibwabo, ne bwa babeedi kwondopiibwabo, ne bwa bansantu kubeneshiibwabo. Enzaku nanku, Mukalenge. Nenukuri pashiishe kundekeelu, netwinyike mitu yetu mu didipwekesha dyônsò ne netuKupe butumbi bwa byônsò byûdi Wêwê mwenzele ku twêtù mu dituku edi. Bwalu mu Dînà dya Yesu mmutudi tulomba nunku. Amen.

² Nudi mwa kusombaayi. Ndi cya bushuwa ne kusakidila bwa dyêsè dya kwikala cyakabidi mwab'ewu leelu ewu, ne bwenu nwênù badi benze lwendu bafume kule kwa menemene anu bwa kulwa bwa Mukenji, bwa disangisha mu dinda emu. Ndi mumanye ne kanwena balwe anu bwa kummona anyi kunteeleja mêmè to, nudi balwe mbwa kutuutakeena ne Mukalenge Yesu. Nenukuri ndi mutwishiiibwe ne Yèyè neanupe dijinga dya mwoyi wenu.

³ Mpindyewu ndi—ndi mwalukile, mwalukile, muye ne dîkù ku Tuckson kadi kwalukila. Ndi mucyoke ne muzengele. Ne mwva kacya ngâya mu movù mujima wa luuya, kacya ku ngondo wa kumpala mushaale, nenukuri mpindyewu ndi mulwe bwa kupweka ku Kentucky lumingu elu, bwa kuya katwa buluwà ne bamwe baa ku balunda, bwa kuteeta kwikishaku ndambu. Bidi bimpeesha dibinduluka dyâbûngi be, nudi bamanye, pa nanku ndi. . . Billy ne mêmè tudi anu bu bafwe twêtù bônsò babidi, pa nanku tudi—tudi tulomba bwa Nzambi atukwacisheku mu lumingu elu bwa twêtù kwikisha.

⁴ Bu Mukalenge mwa kwanyisha, ndi muswe bwa kwalukila cyakabidi mwab'ewu mu dyalumingu dilwalwà bu Mukalenge mwa kwanyisha. Ne ndi muswe disangisha dya pabwadi mu dyalumingu dilwalwà. Ee, ndi muswe kwenzaku kaacintu kampana kashiilangane ndambu ne bya pa ciibidilu. Mpindyewu, ndi mmanyisha eci bwa bantu baamona mwa. . . badi bafwanyine kwikala kabayi naaci dijinga kabikengedi bwa kulwa to, kadi tudi anu misangu yônsò tusambidila babeedi, bu Mukalenge mwa kwanyisha, padi bantu balwa. Nenukuri dyalumingu dilwalwà ndi muswe kujandulaku ne ncinyi cidu pa myoyi yenu. Ndi—ndi muswe bwa nwênù kufunda, leelu ewu, panwikala nuumuka, ne kubiteeka pa cyambilu, nenukuri

Mwaneetu Neville neabifile kudi Billy Paul, ne yêyè pende neabimpeeshe, cidi pa mwoyi webe aci. Wâmbè anu . . . piikalaci ne ndukonko ludi lutangila Bible, pa ciibidilu ntu mbyenza mushindu awu. Nêmbyâlâbâjè kwòkù ndambu kupita apu mpindyewu, pâmwâpa ní kudi lutatu kampanda pa mwoyi webe ludi—lûdi—lûdi kuyi mwa kujikija mu mushindu kampanda to, cilejilu wêwè mupete, kaa, pâmwâpa lutatu lwa ku lubanza lwebe. Kabyena anu bikengela bwa wikale mufundepu dînà dyebe to, kadi wamba anu ne: “Bayaanyi udi wenza bikampanda ne bikansanga bìdì bîmpangishà mêmè.” “Mukajaanyi udi wenza bikampanda ne bikansanga.” “Ne—ne kudi—kudi cintu kampanda cìdì cîngenzekelà mu nsòmbelu wanyi,” anyi—anyi cintu kampanda, nudi bamanye’s, anu cidi pa mwoyi webe aci, cintu kampanda cìdì cìkutàcishà. Ngeela meeji ne aci ncifwanyine kwikala cîmpè. Mmwômò nansha? Nenku jandulaaku mwaba awu, nenku pâmwâpa udi wela lukonko ngwèwè kadi mêmè mufwanyine kwandamuna bwa muntu mukwabo. Wamonu’s, bidi mwa kwenzeka ne yêyè awu ikale pende ne lutatu lumwelumwe alu. Kadi anu cidi pa mwoyi webe aci, ucyamba anu mu cikoso ne mwebe mwònsò, bu mudi ne: “Ndi ne mwânà udi umweka bu ne udi wenda unyanguka, ndi ne cya kwenza cinyi?” “Ndi ne—ndi ne mulume udi kayi muswe kulwaku naanyi mu ekeleeziya to. Udi naanyi anu ne madyambi, ndi ne cya kwenza cinyi?” Anyi, mukaji, mushindu umweumwe awu. Anyi—anyi, udi mumanye’s: “Bible udi wamba *cikampanda* mu mwaba kampanda kadi *cikansanga* mu mwaba mukwabo, ncyèna mbyumvwa to. Biine ebi, ndi muswe bwa mmanyè cidiYe muswe kwamba.” “Nenku bidi bikengela ne mêmè, bu mwena Kilisto, pândì ngenza mudimu wa birò kadi mfumwanyi wa mudimu wamba bikampanda ne bikansanga, undomba bwa mêmè kuya kamufila mu fête kampanda, ne mwine mu fête amu biikale banwamu maala, bidi bikengela ngénzè cinyi?” Nudi numona’s, anu, nudi bamanye’s, bintu bu bitù mu meeji a muntu abi’s. Ki bitudi baswe bwa nwênù kwamba.

⁵ Nenku, ki bwa cinyi, nenku bikengela mêmè—mêmè kwalukila pa dîbà adi, paanyima paa aci, ku Arizona. Nenku mvwa ndyambidila ne ndi mufwanyine—mufwanyine kupeta mushindu wa kunukwacishaku mu mushindu kampanda bwa nwênù kuumvwa, ne mwanyi paanyi mwònsò mùndì mwa kwenza amu. Ndi muswe mpete yâbûngì yinudi bafwanyine kuteeka pa cyambilu leelu ewu kumpala kwa nwênù kuumuka. Funda anu aci cyanaana ulwe uciteeke apa, nenku—nenku Mwaneetu Neville anyi umwe wa kudibo neabimpeeshe. Nenku lumingu elu, lwa ku mukuna kwaka, nêmpetè mu—mushindu wa kubilonga ne—ne kubisambidila, ne kunupetela dyandamuna dya mu Mifundu dîndì mwa kunupetela ku kantu kònsò adi, bwa kunukwacisha. Bwalu ki citudi badisangishile kaaba aka ncyòcì aci, mbwa kukwacishangana. Nwamonu anyi? Nudi nunkwacisha mêmè panudi nunsambidila, nenku ndi ntekemena

ne ndi mwa kunukwacisha. Mpindyewu, pashiishe, kanwikadi nwâpwa mwoyi to, aci neciikale mmu dinda dya dyalumingu dilwalwà.

⁶ Nenku mpindyewu, leelu, tudi...kudi beenyi balwe kutwendela, bu pa ciibidilu. Nenku mbanganyi badi bafumine mu ntanta wa kupita kilomeeta lukama ne makumi asambombo, elaayi byanza muulu? Badi bya pa lukama makumi citeema ne citeema mu disangisha. Kukaadi ndambu wa maadyalumingu, mvwa mwambe ne: “Mbanganyi badi bafumine mu ntanta *kampanda*,” anyi cintu kampanda, kadi nciyiku mwa kupeta byanza bya baa mu Jeffersonville to. Huh! Dituku dyakalonda ke mêmè kucyumvwa, muvwa bwalu’s, bamba ne: “Mwaneetu Branham, beenyi bônso badi babwela munda,” ne, “tutu anu tubashiila bôbô bangata myaba yetu munda mwa ekeleeziya.” Nenku bamba ne badi balwa, nkama ya bantu yidi yilwa kadi kabayi ne mushindu wa kubwela to, bamba ne: “Bwalu tudi bamone beenyi, wamonu’s.” Mpindyewu, awu’s ngenzèlù mulenga be wa beena Jeffersonville mu nyungulukilu emu. Tudi—tudi—tudi ne kusakidila bwa bwalu abu, nwênù Jeffersonville ne New Albany, ne bantu baa mu nyungulukilu. Tudi ne kusakidila bwa bwalu abu. Mbanganyi badi bafumine ku ntanta wa kilomeeta cinunu ne nkama isambombo? Ekelekele! Mbanganyi badi bafumine mu ntanta wa kupita kilomeeta cinunu ne nkama isambombo, elaayi byanza muulu? Kaa, Nzambi wanyi! Abi’s mbilenga be. Abi’s . . .

⁷ Dyalumingu dishaale, kukaadi lumingu lujima, mvwa mwakule pa cyena-bwalu cya ne, *Cisòmbedi Cilwalwà Cyà Mukàji-Musèla Nè Mubàki*, ne ndi ngeela meeji ne tuvwa bafumine mu nyungulukilu wa kilomeeta binunu bibidi ne nkama inaayi. Nenku, ki kwenzekabi ne, ki civwa anu menemene bunene bwa Cimenga ciine cîmvwà ngamba aci, cipaapu cya kilomeeta binunu bibidi ne nkama inaayi mu bule ne mu bucyààma. Ki mêmè kushaala ncyonkomokela pa Cyôci aci kubangila anu piine apu, mumanye ne paajika mwoyi ewu, ku Cimenga aci nkûnyaayà. Mêmè ndi mu njila mutangile ku Cimenga aci, nenku kakwena cîngà cintu cidi ne mushinga to. Twâmbàayibi tûng bu dîbà kubengadi kufila nsesa yadi leelu ewu, anyi bu makeelela kubengaye anu kulwa, nebishintulule cinyi? Twêtù tudi ne Cisòmbedi, Ciikishilu. Nanshi bacyoke anyi katuyi bacyoke to, tudi twêtù anu ne Ciikishilu aci. Wêwè udi wamba ne: “Aci’s nciloota cya muntu mukulakaji.” To, kí nnanku to. Kí nnanku to. M’Bulelela bwa Bible.

⁸ Diloolo kampanda paanyima paa mêmè mumane kuyiisha kaaba aka, muntu mukwabo kukatamukaye anu paanyima paa cibumba cya ku cyambilu eci, pânkaavwà ne mpatukile ku ciibi, bavwa bakeba bwa kumpatula kuya naanyi too ne ku mashinyi. Ki nsongaalume ewu kwamba ne: “Ndi muswe nkwambileku anu díyi dimwepele cyanaana.” Billy ne bamwe baa ku bânà

beetu biikale bakeba bwa kumfila ku mashinyi. Yêyè ne: “Ndi mwa kwambaku anu dîyì dimwepele anyi?”

Mêmè ne: “Ambaaku’s, mukalenge wa yaaya.”

9 Ki yêyè ne: “Uvwa wakula diloolo edi, pauvwa utandisha bantu bakaji abu apu, mushindu uvwabo bavwala, bavwala bilàmbà abi.” Yêyè ne: “Muntu wa bidimu byebe wêwè ewu ngudi anu mufwanyine kwela meeji bu nanku awu, kadi bu wêwè ne bidimu bìndì mêmè naabi ebi uvwa mufwanyine kwelaku meeji mashiilangane.”

Mêmè ne: “Wêwè udi ne bidimu binga?”

Yêyè ne: “Ndi ne makumi abidi ne mwandamutekete.”

10 Ki mêmè kwamba ne: “Mêmè mvwa ne bidimu dikumi, dikumi ne bitaanu bishaadile ku byebe abi, mvwa nyiisha cintu anu cimwecimwe eci.” Nwamonu anyi? Mêmè ne: “Ncìdì munda mwa mwoyi webe, nsongaalume wetu. Mêsù ebe adi amwena mu mwoyi webe.” Ki kwinyikaye anu mutu panshi e kuumuka kuya. Ngeela meeji ne kakwena dyandamuna dikwabo ku cyôci aci to. Nwamonu’s, mbilondeshile ku cidì munda *emu* bwalu ki cìikalà mwa kupatukila *apa* ne *apa*. Nwamonu’s, Yesu wakamba ne “Wêwè wamba bishiilangane ne cidì munda *emu*, pa dîbà adi udi ulwa mwena lubombo.”

11 Ndi ne disanka mu dinda emu, mwaba kampanda mu disangisha, dya kwikala ne mu—mulunda wanyi wa mushinga mukole, mwaneetu, Révérend Eddie Byskal ne mukajende ne bânà bende. Ndi ngeela meeji ne mbabwele mu disangisha mu dinda emu. Eddie, udi kaaba aka anyi? Mvwa—mvwa ndyambidila ne udi. . . Ee, pâmwâpa kî mmupete mushindu wa kulwa to. Mwaneetu, kaa, eyo, lwà ku. . . Mpindyewu, adi kî nditumba dya “amen” to, Eddie. Tudi ne disanka dya kukwakidila pa cibumba cya ku cyambilu apa pamwe neetu, bambi, pawikala muswe bwa kulwa. Ne pashiishe tuvwa pa. . .

12 Mwaneetu Eddie uvwa neetu musangu uvwa Mukalenge mumpeeshe cikeena-kumona cya ours ne mbowà. Aci ki. . . Mbanganyi badi bavuluke bwalu abu pâmvwâ munulondelebu? Eyo, yêyè uvwapu. Yêyè ki nsongaalume wa citende uvwa ne muteelu wa matobamatoba awu, Mwaneetu Eddie Byskal. Nenku yêyè nguvwa mwimanyine mwaba uvwa. . . ne wâkakonka. . . Mêmè—mêmè kubakonka ní bavwa ne muteelu wa matobamatoba, nansha umwe wa kudibo. “Bwâlà,” muntu nansha umwe kavwa naawu to. Mêmè kwamba ne: “Ee, ncifwanyine. . . Cidì ne cya kwikala muteelu wa matobamatoba. Nekwikale ours munene mufiikuluke wa lwonji, ne—ne nyama wa mushindu kampanda udi ne nsengu ya bule bwa byâlà makumi anaayi ne bibidi, mushindu *ewu*, mufwanangane ne kashà.” Nenku aci kukaavwa ngondo bu yisambombo nanku awu, yîntù mubulonde kaaba aka, nudi bamanye’s, kumpala

kwa kwenzekaci; tukaavu bu, twipacila eci, kaa, kumpala kwa cikondo eci mu cidimu aci.

¹³ Pashiishe kumbiikilabo kudi muntu ewu, bwa kuya katwa buluwa. Kacya ncivwaku mwanji kuya mu ditunga adi to, kubwela kwine kutwakaya aku to, ki mêmè kwamba bwalu abu. Kadi kaamupwa kakese aku, ndwa pa kubànda cibeeba cya mu Alaska mwamwa cyacya, mùdì anu meetu pa meetu ne mikuna ne nyama. Nenku diloolo adi mu ditempu dya mashinyi amu pâmvwà ndondela Mwaneetu Byskal kuntwaku ne—ne Mwaneetu Southwick, yêyè kwamba ne: “Ee, mêmè—mêmè. . . Mutudi tuya babànde mmu ditunga dya mikooko,” yêyè ne, “aci kacyakwikalamu to.”

¹⁴ Ki mêmè kwamba ne: “Eyowa’s,” ki mêmè ne, “kuvwa umwe wa ku bansongaalume bavwa naanyi mwikale muvwale muteelu wa matobamatoba.” Muntu nansha umwe kavwa ne muteelu wa matobamatoba to, Mwaneetu Byskal kayi naawu to, nansha umwe wa kutudi kayi naawu to.

¹⁵ Diloolo diibìdì, tuvwa bamone, batwishile mèsù cimpanga cya mukooko kampanda pa mukuna kumutu lwà ku ndekeelu wa diitu lwà kùdì mici mikùna yishiikidila. Mpindyewu, nkuulu aku kudi mici mikùna kayiyi nansha yitoloka to, kùtù kakuyi cingà cintu to anu mbowà ne mikooko, ki kutuvwa bamone yimwe yaayi lwà kule menemene. Kadi mu njila twenda tupweka mu mapingaja amu, Mwaneetu Byskal kutetukaye e kudishinda mu mâyi kampanda e kubolaye.

¹⁶ Paakacyabu mu dinda twètù kubiika dinda bwebwebwe e kwasa dilumbatangana ne bimpanga bya mikooko bituwwa tudyambidila ne netupete abi. Nenku pa wende. . . Twètù kubàndakù kadi biikale. . . tukaavwa bamane kudya cyakudya cyetu cya mundaamuunya, kadi katuciyi mwa kupeta bimpanga bya mikooko abi to, kadi Mwaneetu Byskal uvwa ufuma ku dyasa mbowà. Ki pashiishe mêmè, nkenzakana nunku, ke twètù kubanda, Mwaneetu Southwick kungambilaye, ne: “Ndi ngeela meeji ne netwikale. . . wêwè muswe kwenda bîmpè menemene, Mwaneetu Branham, netubande pa mukuna ewu, kupweka mu mwaba wa kuyibiikidila wawa, bimpanga bya mikooko abi mbifwanyine kwikala biye kuntu kwaka,” ciine aci ciikale lwendu lwa nwenda ntanta mule. Kadi bufuku kabwena bwila pâmwâpa too ne ku diloolo menemene to, pâmwâpa pa dîbà dikumi anyi dîbà dikumi ne dimwe misangu mikwabo.

¹⁷ Kadi ndwendu lwa nwenda lwa makàsà ntanta mule menemene pa mikuna ya mabwe ayi. Pa nanku mêmè ntu munange kwenda lwa makàsà, kadi ki twètù kushaala biimane mwaba awu beelangane maboko kunshingu, myedi yetu bônso babidi mibange kutoloka mvoja, beelangane maboko kunshingu, twela mbila ne biikale bamanye, mêmè kwamba ne: “Mwaneetu Bud, ndi ntekemena ne dîngà dituku, mu Bukalenge bwa

bidimu cinunu, nêngìikalè mwa kubànda mikuna yònsò yaya lwa makàsà.”

18 Yèyè kwamba ne: “Ndi ntekemena ne nêngìikalè neebe, Mwaneetu Branham.” Nenku tuvwa biimane mwaba awu, biikale anu tucyonkomoka mu Mukalenge. Ne mèmè mwine ntu munange mikuna ngamba kufwa!

19 Ki pashiishe twètù kupweka. Ki musangu awu wàkaasà Mwaneetu Byskal mbo—mbo—mbowà awu. Mu mushindu wa ne, bu mùtùye missionnaire ku ba-Indiens, nenku ùvwa muswe kumupeesha ba-Indiens bende bwa kudyabo. Ki twètù kupweka apu, kudya cyakudya cyetu cya mundaamuunya, kulongolola mbowà awu kadi kwalukila.

20 Bud ne mèmè tuvwa munkaci mwa kubànda twenda tukosolola mukuna, ki kwenzekabi ne tutangile, mu ntanta mule, ne tulondo twanyi, mèmè kutwishila mèsù nyama ùmvwà mumone awu, anu mu cimwenenyi cya pa bule cyanaana, mùmvwà munulondele kaaba aka amu. Mwaneetu Byskal wawa, mwimane anu ku luseke lwetu. Ki mèmè kwamba ne: “Nyama awu nyèye wawa.”

21 Ki kwasaye tulondo, e kwambaye ne: “Mmbowà wa mpànga munene wa kacya, mukole, wa katanku.”

22 Ki mèmè ne: “Kacya nцитuku mwanji kumona, mwawa ngeela meeji ne ùvwa ne nsengu ya bipaapupaapu.” Kadi ewu yèyè uvwa ne misongoloke, mwikale nyama wa mmwenekelu wa pabwende, anu mùmvwà mumone mu cikeena-kumona menemene. Ncivwaku mwanji kwasaku mbowà kacya kwònsò aku to.

23 “Pa nanku, ee,” mwakambaye, “piikalabi ne Mukalenge ngudi mukupeesheyi,” yèyè ne, “aci ncifwanyine anu . . .”

24 Mèmè kwamba ne: “Eyo, udi ne cya kwikala anu yèyè awu. Cintu cimwepele cìndi ndikonka’s ki muteelu wa matobamatoba awu.” Ki mèmè kukenzakana, nenku Mwaneetu Eddie, mukajende nguvwa ne cya kwikala muwélè (Ùdi nende mwaba *wawa*.), ùvwa ne cya kwikala mumwelelewu mu cibuta cyende cya lwendu. Pavwaye mubole mâyi dituku divwa didyànjlile adi, ùvwa mushintulule muteelu, nenku’s ki muteelu wa matobamatoba awu. Mèmè kwamba ne: “S’ki cyôci eci.”

25 Pângààkajikijà ne mèmè kupeta mwine mbowà awu, yèyè, Bud, kungambilaye, ne: “Mpindyewu, Mwaneetu Branham, muwàmbi ne eyi nsengu yidi bule bwa byâlà makumi anaayi ne bibidi?”

Mèmè ne: “S’ki bule bwikalayi.”

Yèyè ne: “Bwanyi mèmè’s mmyenze anu bu ne yidi bule bwa byâlà makumi citeema ne bibidi’s.”

Mèmè kwamba ne: “To. Yidi bule bwa byâlà makumi anaayi ne bibidi.”

26 Yèyè ne: “Mpindyewu, bilondeshile cyûdi mungambile mêmè, kumpala kwa twêtù kwalukila kudi nsongaalume udi muvwale muteelu wa matobamatoba awu, Eddie,” (mwaba uvwabo ne cya kutupetela kwinshi kwa mukuna, mu ntanta wa kilomeeta isatu ne ndambu), yèyè ne, “newânji kushipa ours munene mufiikuluke wa lwonji awu.”

Mêmè ne: “Aci ng’EMU MMUDI MUKALENGE WAMBA.”

27 Yèyè kwamba ne: “Mwaneetu Branham, neafumine penyi? Nyewu ndi mwa kumona too ne mu ntanta wa kilomeeta makumi mwandamukulu mu nyungulukilu mujima emu.”

28 Mêmè ne: “Yèyè’s ucidi anu Yehowah-Yile. Mukalenge’s udi mwa kudipetela Yèyè mwine, wamonu’s. Yèyè udi mwa kwenza ne nshindi yikaleku. PiikalaYe mwa kwenza ne cimpanga cya mukooko ciikaleku, piikalaYe mwambe nanku bwa ours, ours’s udi mwa kwikalaku.”

29 Twêtù biikale tuteeta bwa kwambula mbowà wa bujitu awu bwa kupweka nende, civulukilu cya bucimunyi aci, kwinshi kwa mukuna, nenku mêmè mvwa ngambula cingoma mutanci wa dîbà, ne pashiishe yèyè uvwa pende mwa kwambula cingoma, twenza kushintakaja. Kadi patwâmbî kufika pa dibwe dinene kampanda dya mashika, mona’s, twêtù kubwela mwinshi amu. Kùvwa bu kùvwa luuya lukole, twêtù kubwela mu dibwe dya mashika adi, kusòmbamù katanci bwa kupetaku kaacitaleela. Yèyè ne: “Udi mumanye, Mwaneetu Branham, katucyena mu ntanta mupite pa kilomeeta umwe ne citupa ne mwaba udi Eddie ne Blaine, nsongaalume yibidi ayi, biimane to. Bikengela bwa ours mukole awu amweneke’s.”

Mêmè ne: “Bud, ngeela meeji ne wêwè udi ucyela mpatà.”

30 Yèyè ne: “Mwaneetu Branham, mwaneetu wa balume ukaavwa muponepone ciseki munda mwa bidimu bûngibî. Kadi wêwè kungambila musangu kampanda, musangu wa kumpala ûvwà mulwe muneemu emu, patwakaya mu mwaba mukwabo apu, wêwè kungambila muvwaw mmwenekelu wa nsongaalume awu.” Ne Eddie uvwa wendela anu ku luseke lwanyani menemene mwine mwaba awu, mubànde pa kabalu, paakafila Mukalenge ciine cikeena-kumona aci. Mêmè kubambila civwa cikengela kwenza bwa nsongaalume awu; ciseki kujikaci. Ki mpindyewu kwambaye ne: “Ncyèna mwa kucyelaku mpatà to.”

31 Mêmè ne: “Bud, ncyèna mumanye kwafumina ours awu to.” Kadi mvwa ne bidimu bitwe ku makumi ataanu, ndi ne bidimu makumi ataanu ne bitaanu mpindyewu, nanku aci ncyenzeke kukaadi bidimu bu bisatu nanku awu. Mvwa ne bidimu bitwe ku makumi ataanu ne bibidi anyi makumi ataanu ne bisatu. Mêmè ne: “Kacya ncitu mwanji kuCimona cipangile to. Nzambi neâmpè ours munene wa lwonji wa cisengàsengà awu kumpala kwa mêmè kufika mwaba udi nsongaalume yàya wawa.” Nenku

tukaavwa bapweke twipacila mwaba uvwa ubangila kaadiitu kaa tubeji tusongoloke aku ne diitu dya mici mikùna adi.

³² Kwinshi kwa kakuna aku ndambu, tukaavwa benze bu bamane kubwela mu diitu dya mici mikùna adi, yêyè kusòmbela panshi. Pa díbà adi yêyè ki uvwa mwambule civulukilu cya bucimunyi aci, mêmè mwambule cingoma. Ki yêyè ne: “Bikengela ours mukole awu amweneke’s, kí mmwômò anyi?”

Mêmè ne: “Yêyè’s neikaleku. Lekela kulubakana.”

Yêyè ne: “Mêmè’s ndi mwa kumona kakuna ne kakuna kònsò.”

³³ Mêmè ne: “Ndi...Kadi ndi mêmè mmona mulayi!” Nwamonu anyi? Nwamonu’s, Yêyè nguvwa mulaye. Mêmè ne: “Cÿònsò cidiYe. . .” Mêmè ne: “Bud, cidi cisòmbè mwaba wawa naka cyacya ncinyi?”

³⁴ Kutangilaye, e kwambaye ne: “Ng’ours munene wa lwonji wa cisengàsengà.” Yêyè ne: “Wawa’s nyêyè.” Patwakapeta ours munene wa lwonji wa cisengàsengà awu ne twètù kwalukila. . .Mêmè kuvuluka ne mu cikeena-kumona amu mvwa munwãmbile ne, mvwa ne bwôwà bwa cingoma aci. Civwa ncingoma cya mazaji a .270, makeke menemene, nudi numona’s. Bidi pa mukaba wa mêtù. Nenu mêmè kupeta ours awu, anu mu ntanta wa mêtres bu nkama yinaayi ne makumi ataanu cyanaana, bu muvwaCi cyambe. Bud kwambaye ne: “Bikengela washile ours wawa cyanyima.” Yêyè ne: “Kacya ukaadiku mwase ours munene wa lwonji wa cisengàsengà kwònsò eku anyi?”

Mêmè ne: “Bwàlà.”

³⁵ Yêyè ne: “Kaa, yôyì kayitu mimanye ne lufu ncinyi to!” Mêmè kuyiila aci pashiishe ndambu. Pa naku kwambaye ne: “Kayitu yitangalakangana padi cikumina cyenzeka to,” yêyè ne, “bikengela anu umwase.”

Mêmè kwamba ne: “Bilondeshile cikeena-kumona, mvwa mumwashile mu mwoyi.”

³⁶ Yêyè ne: “Ee, piikalabi ne cikeena-kumona aci ncyambe nanku, mêmè nêngiimanè anu ku luseke lwebe.”

³⁷ Ki mêmè ne: “Tuyaaku.” Ki twètù kuseemena pabwipi ndambu, kadi ndi mwenze anu mbanduluka anyi, ours awu kummonaye. Ki civwaye yêyè ukeba aci, bwa kuvumaye. Ki mêmè—mêmè kwasa ours awu, kabiyi bimweke nansha bu ne dizaji divwa dimwenzè cintu to. Ki yêyè ulwàlwa ewu! Kadi kumpala kwa nciyi mwanji kwela dizaji dikwabo mu cingoma, ours awu kufwilaye mu ntanta wa mêtres makumi anaayi ne àtaanu ne mwaba úmvwà awu.

³⁸ Bud kushaala mutooke tòò ku nyungulukilu wa mishiku eku, kwambaye ne: “Mwaneetu Branham, ncivwa muswe amvwile pa bibelu to.”

Mêmè ne: “S’nansha mêmè paanyi.”

39 Yêyè ne: “Ndi nsanka muvwa cikeena-kumona aci cyambe ne uvwa mumupete.” Yêyè ne: “Mpindyewu, byôbì nanku, nsengu ayi yôyi bule bwa byâlà makumi anaayi ne bibidi, mêmè ki wângata...” Ndi muswe kucyamba mushindu uvwaye yêyè mucyâmbè, ne: “Mêmè’s ngwâpaluka ne dyela dya mbila.”

40 Mêmè ne: “Ee, umba palukila anu mwômò mpindyewu, bwalu ki bule bwikalayi.”

41 Patwakaŵweka kùvwà Mwaneetu Eddie usanganyiibwa aku, mêmè kwambila Mwaneetu Eddie. . . Twêtù kuswikila tubalu ku mici, twôtò tùtu ne bwôwà bwa ours. Nenku, kaa, ekelekele, twôtò’s tuvwa ne cya kwikala tuumvwe mupuuya wende. Katuvwa ne mushindu wa kumuuvula ciseba to, dîbà dikaavwa diye bikole; bivwa bikengela twêtù kwalukila pavwabu bucya. Kadi pa dîbà adi twêtù kukosa mwonji misangu mitwe ku dikumi, ne tubalu twikale tunyeemakana myaba yônsò. Pa nanku patwakaŵweka kuntwaku, yêyè kwamba. . . Kuyaye kangata mètre wa dipima nende mu cibuta cya ku cisômbelu cya pa kabalu kende, yêyè ne: “Blaine.”

42 Mêmè kwambila Mwaneetu Eddie, mêmè ne: “Watangila bîmpè kaacyanza kakese aku mpindyewu, bilondeshile. . .” Mvwa mwele meeji ne ùvwa muwanyine kwikala Billy Paul, kaacyanza kakese menemene kakwate mètre wa dipima nende munyungulukile lusengu awu. Mêmè ne: “Watangila bîmpè kaacyanza kakese aku,” kutuutaku Mwaneetu Eddie cintu. Twêtù kwalukila cyanyima. Kukeelaye anu muulu mushindu ewu, anu jaajaaja, byâlà makumi anaayi ne bibidi. Nwamonu’s, anu menemene. Yesu katu upangilaku to! Dîyì adi kadyadyakupangilaku to padibi ne cidi cifumina kudi Nzambi.

43 Ndi mfuma ku ditwishila mèsù munkaci mwetu, Mwaneetu wa balume ne Mwaneetu wa bakaji Jackson baa ku Afrike wa ku Sud. Ngeela meeji ne bàkaadi babàleejè. Nenku—nenku mbanuleeje anyi, Mwaneetu Jackson? Mu dinda emu, juukilaayi kuulu, wêwè ne Mwaneetu wa bakaji Jackson. Ndi njinga anu bwa bamone. Mwaneetu, Eddie, mona cilembi naanyi wa ku Afrike wa ku Sud, yêyè pende, kwaka naka. Mukalenge anubeneshe, Mwaneetu wa balume Jackson ne Mwaneetu wa bakaji Jackson, tudi ne disanka dya kwikala neenu munkaci mwetu mwaba ewu. Ne bambi bônsò badi mu citanda emu elaayi byanza muulu, bônsò badi mu mudimu wa bwambi abu. Ee, abi mbyakane ne bilenga be, bîmpè. Mukalenge anubeneshe. Tudi ne disanka dya kwikala neenu bônsò mwaba ewu. Ndi muswe kwenza mulongo wa disambidila babeedi mu tusunsa tukese emu, pa nanku ncyêna—ncyêna. . . Mvwa mwa kujinga kunulomba bwa nwênù bônsò kujuuka bwa kubànda kuneeku ne kuyiisha pa kaaba kaanyi. Tudi ne disanka dyàbùngì dya kwikala neenu, muntu ne muntu wa kunudi.

44 Mêmè, pândi ngeela meeji ku lulamatu lwenu, ne—ne biikale nufumina mu ditunga dijima, ne bikwabo, bwa kunteeleja ngaakula pa bidi bitangila Mukalenge Yesu mulenga awu, dyeyemena dinudi naadi dya ne Yêyè udi uteeleja masambila aanyi. Mvwa ngaakula anu mutanci ewu mu muyiiki wa babidi ne cidimba kampanda cya ekeleeziya ewu, kî nkwanji kwenza tusunsa tupite pa makumi anaayi ne tutaanu to, maamû mwikale ne mwoyi mucibuluke. Nenku ndi mwenze anu mbanga kwambila mukaji awu cintu kampanda, (ncyêna mumanye nî mmufwanyine kuswa bwa mêmè kuteela ne nkampanda anyi to), kulwaku Bukênkè bumwebumwe bunudi numona mu fôtò wawa bwabwa. Kujikaku kwônsò, kuyaye musanke. Tudi ne disanka dyâbûngî, leelu ewu, mu cikondo eci cidi maalû ashintuluka mutudi ne mwoyi emu, mûdî kuyiku mwa kuteeka menemene dyeyemena nî mmu ncinyi nî mmu ncinyi cyônsò to, twêtù tudi ne Bukalenge budi kabuyi mwa kushintuluka, kabuyi mwa kunyunga to. Budi kabuyi mwa kunyungishiibwaku to! Kî ndubwebwe lwa Gibraltar to, kadi dyetu diitabuujâ didi mwa kushindameena ne dîsù dikole dyônsò pa Lubwebwe lwa Bikondo, pa Yesu Kilisto, Lubwebwe lwa lupandu ludi kaluyi dinyungishaku to.

45 Ndi muswe kusakidilaku mwaneetu wa bakaji udi mutwadile mukajaanyi udi mwab'ewu ewu kasheete kakese kaa twaba tusatu mu umwe kiikale ne Bible munda. Ûvwa mwenze cipungidi ne Mukalenge bwa kasheete kakese aka. Ûvwa mukânangè wamba kufwa. Kadi ne...bu bimfwanyi bya bikondo bya kale pamutu apu. Nenku yêyè uvwa mulombe Mukalenge... Ûvwa munange kasheete aku bibi be, pâmwâpa. Kasheete anu keetu kakese kaa cyanaana aka kiikale ne mmwenekelu wa cipaapu cya musaka. Kadi nyawu mukâtwadile mukajaanyi kiikale ne Bible munda. Twasakidila, mwaneetu wa bakaji. Dyônsò dya ku mapà enu makeese awu ne bikwabo binutu nupa Billy Paul ne bakwabo abi, bitu bifika kûndî. Ndi ne kusakidila bwa bintu byônsò. Nzambi ikale neenu.

46 Kanwikadi nwâpwa mwoyi mpindyewu, dinda dya mu dyalumingu dilwalwâ. Padi anu disangisha dijika leelu ewu, funda lukonko lwebe. Wêwè kuyi ne mushindu to, ulwe naalu mu dinda dya dyalumingu dilwalwâ. Nêndwe kumpala kwa dîbâ ndambu, nenku balwe naalu mu cibambalu, bwa ngâpeta dîbâ dya kulupeeshila mwaba wa kulushindamijila mu Mifundu. Nenku netwandamune ku nkonko mu dinda dya mu dyalumingu dilwalwâ, bu Mukalenge mwa kwanyisha.

47 Mpindyewu, kudi mishwala yâbûngî miteeka mwab'ewu. Kadi ndi nyisaka paanyima, anu bwa mpete mushindu wa kuteeka tubeji twanyi—twanyi tûndî mufunde maalû mwab'ewu, ne wanyi...kabidi ne Bible wanyi, nenku, anyi Bible wanyi ne tubeji twanyi tûndî mufunde maalû's we, eyo, bwa mpeteku

kaaba nansha kakese. Kadi ndi...Ndi nsambidila umwe ne umwe.

⁴⁸ Nêmfundè maalu ândi naawu pa tubeji, ndi ne dîbà anu dikese. Ncyakunulama mûmvwà munulame musangu mushaale wûmvwà mwaba ewu awu to, mêmà matwe ku anaayi majima. Ndi mudyènzèle mêmè mwine mulayi ne, mêmè mukwate kabidi pa mikaba ya mèyi mushindu awu, nêndikwàcìlèyi mêmè nkààyaanyi kaaba aka, anyi cintu kampanda cikwabo, bwa ncifiki ku dinulama mukùngùlù mule mushindu awu nansha.

⁴⁹ Docteur Lee Vayle udi munda emu mu dinda emu anyi? Mvwa muswe kukonka Docteur Lee Vayle ní...Udi mwaba ewu anyi, Mwaneetu Vayle? Ela cyanza muulu pawikalamu. Udi mundekeelu mwamwa anyi? Eyo, twasakidila, Mwaneetu Roy. Nenku ndi muswe bwa wikale mutwishibwe bwa kukenketa bîndi mufunde pa tubeji abi, Mwaneetu Vayle. Udi usanganyibwa mwaba kampanda mu misumba ya bantu paanyima apu mu mushindu wa nciyi mwa kumona to, anyi mu cibweledi. Bikengela tutabaleele bwalu abu, bwa kubenga kulekela bantu bapitepite bûngi biimàne kuulu, mutangidi wa midimu ya dijima dya midilu kaakutwitabilaku bwa kwenza nanku to, nwamonu's, ki mutùdi twètù. Ndi muswe bwa ukenkete dibuulula dyanyi dya pa Dimiinu dya Nyoka adi, bwa kudibweja mu citupa cya kumpala, Cikondo cya Ekeleeziya wa Efeso cidiye munkaci mwa kufunda, mwikale undongolwelamu cyakabidi mfundilu wa mwakulu. Mmwenze bilenga bilaya! Nenku ndi muswe bwa ucikenkete ne ulombeku muntu kampanda bwa kwambaye cintu cibangangana ne Dimiinu dya Nyoka mpindyewu (bwa ne civwa cya bushuwa anyi, anyi to)! Nenku Mukalenge ngudi mufume ku dicimpeesha makeelela awu, nwamonu's. Kaa, s'cidi cipicilangana! Mushindu wûndi mpeta diyiiisha, ndi mwa kwikala ngenda nya anu nunku kadi Cintu kampanda cindenga. Pashiishe...Nenku mêmè mumanye ne n'Nzambi, nêncyàngàtè bwa kusangana mwaba udici mu Mifundu. Pashiishe ndi ne...KaCitu cyanji kupangilaku kacya to, kuumukila anu ku Genese, too ne ku Bwakabuulwibwa, ciikale anu cilelela, nansha bantu beele meeji kaayi bwa Cyôcì aci. Nenku mbitambe kwikala mushindu awu kupita kacya kuumukila ku Bitampi Mwandamutekete abi. Nwamonu's, bivwà byenza nanku mwine musangu awu. Pa nanku Mukalenge anubeneshe mpindyewu patudi tulonga apa. Mpindyewu bwa kuneemeka Dîyi. . .

⁵⁰ Nenku ngeela meeji ne muntu kampanda, maanyimeela, yônsò udici cifikila awu, cidi cyenza ndambu ne dîyi diikale dîtwa dyàluka pa ndongolwelu wa mèyi. Mpindyewu nudi mwa kuumvwa lwà mundekeelu mwanwa, bîmpè menemene anyi? Elaayi byanza muulu panwikala mwa kuumvwa. Bîmpè!

⁵¹ Mpindyewu tubuululaayi mu Bible, mu myaba yibidi mu Mifundu, nenku nênteetè bwa kufila diyiiisha bwa kupatuka

pa dîbà, bu Mukalenge mwa kwanyisha. Nenku mpindyewu tubuululaayi mu Maako, nshapita mwi5, ne mu Bakalenge wa Kumpala, nshapita wa 10; Maako, nshapita mwi5; Bakalenge wa Kumpala, nshapita wa 10.

⁵² Mpindyewu, kadi bwa mwenyi udi mufwanyine kwikala munkaci mwetu, eci, tudi tuteeka Cilongelu cyetu cya Dyalumingu mu kalaasa kanene kamwepele. Nenku ki kôkò kalaasa aka mwab'ewu, bwalu bibambalu mbipate byônsò patapata ne bantu nenku katuyi mwa kwikala ne tulaasa tutapulula bu pa ciibidilu to, nenku tudi tulonga ndambu pa bitangila Dìyì, bwa kwikala ne bwobumwe cyapamwe. Katwena . . . Twètù katwena dingumba kampanda to. Katutu ne dingumba to. Tudi anu badishikamine mu Mukalenge, nenku katwena ne meeji a kwikala musùmbà wa bakoleshi baa maalu to. Tudi tulongesha anu Bible, ne anu Yèyè nkaayende. Nenku Mukalenge mmwimpè bikole kutudi, mu mushindu wa ne Udi ucitwa nyama ku mikolo ne uleeja ne ncilelela. Nenku Cidi citùpa busambi bwàbûngì.

⁵³ Nenku mpindyewu tudi—tudi tunujingila difika dilenga bwa kwikala munkaci mwetu dîbà kana dyônsò. Mpindyewu, mèmè nciutu apa dîbà dyônsò to, kadi tudi ne ndambu wa bampaasata balenga be mwaba ewu; Mwaneetu Neville, umwe wa ku bampaasata beetu; Mwaneetu Capps, mukwabo wa ku bampaasata beetu; ne Mwaneetu—ne Mwaneetu Collins, Willard Collins, mukwabo, bampaasata beetu. Ne pashiishe tudi naabo bashiileshiilangane baa ku bitupa bishiileshiilangane, ekeleeziya yetu mikese yitudi baswikakane naayi. Pawikala usanganyibwa mu—mu nyungulukilu wa Texas, bânà beetu ba-Martin aba, ne Mwaneetu . . . Mwaneetu wa bwena utu ulwa neebe mwab'ewu awu nganyi apa? Ncyèna mfika ku dimona Mwaneetu Blair mu dinda emu to. Kaa, Mwaneetu Blair, ncivwa mukumone to, Mwaneetu Blair. Mwaneetu Ruddell, anu lwà paanyima apa, umwe wa ku maekeleeziya mu njila wa 62, umwe wa ku ekeleeziya myànà yetu mwaba ewu. Mwaneetu Junior Jackson, udi musòmbe mwaba ewu ku luseke lwa Mwaneetu Blair ewu, ngaamumonu mpindyewu, mukwabo wa ku ekeleeziya myànà yetu. Kabidi tudi ne ekeleeziya ya mu nyungulukilu wa ditunga mu myaba yônsò.

⁵⁴ Mwaneetu Jack Palmer, mu dilwa dyende mu njila, ngeela meeji ne bavwa benda bakoleshaku lubilu ndambu, ne kashinyi kapyakapya kaa mwanende wa balume aku, byenze bu, nudi bamanye's, byenze bu badi bapicishaku mikalu ya lubilu, ki kupetaye njiwu. Kutapikaye ku cibanga, nenku kupangaye mushindu wa kulwa, kwalulukilaye kumbelu. Pa nanku ùdi bîmpè. Nenku tuvwa ne . . . Mwaneetu Ben, mwab'ewu, mukwabo wa ku bânà beetu baa ku Kentucky kwaka mwab'ewu, mmumubiikile mu dinda emu bwa kumona ní bavwa dijinga ne mfranga anyi cintu kampanda cidì ekeleeziya mwa kubakwacishaku

naaci, yéyè kwamba ne maalu ônsò avwa bîmpè. Nenku ùvwa mubwele mu cibenda ne lubilu lupitepíte búngì, ki kudikumaye ku nsoka kampanda, ki cyôcì aci kumuvinga ku cibanga anyi cintu kampanda. Nenku kubiikidilabo kwôkò aku, pavwaye mukudimwine mashinyi ende e kudyelaye mu dikunji anyi cintu kampanda, ki—ki kubiikilaye bwa kumusambidila.

⁵⁵ Mwaneetu Billy Collins pende, tudi bamanye, mmudizaaze cyâlâ bibi be, kucibula mufuba munda amu, mûndì muumvwe bamba, nenku bivwa bikengela bàwákàjè. Nenku tudi baswe kumuvuluka mu disambila.

⁵⁶ Nenku mpindyewu cidi cyenza ne twikale tujuuka kuulu. Patutu tucipa cyèlekà, patu mabendela apita, anyi cikampanda, tutu misangu yônsò twimana basulame, anyi tukosa mpala, anyi twimana kuulu, nansha nanku, bwa kuleeja kaneemu bwa ditunga dyetu, cidi cikengela twètù kwenza aci, ne kumpala kwa dibendela dyetu. Kadi ambayaaku tûng bwa Mukalenge wetu, patudi tubala Díyì Dyende? Tujuukilaayaaku kuulu mpindyewu patudi tubala Maako Munsantu 5 apa, biikale tubangila ku mvensa wa 21. Numonaayi ne ntema yônsò mpindyewu patudi tubala apa.

Nenku paakapita Yesu cyakabidi dishiyà mu bwâtù, bantu bààbúngì baakadisangisha kudiye: nenku ùvwa ku mwelelu . . . wa mbù.

Ne, monaayi, kwakalwa umwe wa ku balombodi baa nsunàngòngà, dînà dyende Yayilo; nenku mmwenze anu umumona, kudiyupwilaye ku makàsà ende,

Ne wakamusengeleela bikole, wamba ne: Mwanaanyi wa bakaaji mutekete mmulaale ùpunga ne lufu: ndi nkulomba, lwà umutentekelaku cyanza—byanza, nenku yéyè udi mwa kwondopiibwa; nenku . . . neikale ne mwoyi.

. . . Yesu wakaya nende; ne bantu bààbúngì baakamulonda, ne baakamukungwila.

Kadi mukaji mukwabo, uvwa ne disaama dya mashi alwa munda kukaavwa bidimu dikumi ne bibidi,

. . . ukaavwa mukengekenge ne maalu àbúngì a kudi bangangabuka bààbúngì, ne ukaavwa mutuule byônsò bivwaye naabi, kadi kakuyi cintu nansha cimwe cya nsongo nansha, kadi biikale anu byenda bitantamana,

Paakuumvwaye bamba bwa Yesu, kulwilaye mu musumbà wa bantu awu lwà paanyima, e kulengaye civwalu cyende.

Bwalu wakamba ne: Bu mêmè anu mwa kulenga bilambà byende, nêngûmvwè bîmpè.

Ki dyakamwe mushimi wende wa mashi awu e kukamawu; ki kuumvwaye mu mubidi wende awu ne wakondopiibwa ku cipupu aci.

Ki Yesu, paakamanyaye dyakamwe mu yêyè ne bukole bwakapatuka munda mwende, wakakudimuka mu . . . mu musùmbà wa bantu awu, ne wakamba ne: Wâlengi bilàmbà byanyi awu nganyi?

Kadi bayiidi bende kumwambila ne: Wêwè udi mumone anu mudi musùmbà wa bantu mukukungwile, kadi ujuuka wamba . . . Wândengi awu nganyi?

Kadi yêyè wakakenzakana bwa kumona yêyè uwu mwenze bwalu abu awu.

Kadi bu muvwa mukaji awu uciina ne uzakala, mumanye ciwva cyenzeke munda mwende aci, wakalwa ne wakadyupwila panshi kumpala kwende, ne wakamwambila bulelela bwônsò.

Ki yêyè kumwambila ne: Mwanaanyi wa bakaji, diitabuwa dyebe dyakwondopu; ndaaku mu ditalala, wikale mwondopiibwe ku cipupu cyebe aci.

Nenku pacivwaye wakula apu, kwakalwa bamwe bantu bafumina kwa mulombodi wa nsunângòngà awu biikale bamba ne: Mwaneebe wa bakaji awu wâfu, cyücidi utacishila Mulongeshi ncinyi?

Yesu mmwenze anu umvwa mêyì akambiibwa awu, yêyè kwambila mulombodi wa nsunângòngà awu ne: Kuciinyi nansha, itabuwa anu naka.

Nenku kaakitabila muntu nansha umwe bwa kumulodaye nansha, pa kuumusha Peetelo, . . . Yakobo, . . . Yone mwanaabo ne Yakobo.

Nenku yêyè kulwa, ufika kumbelu kwa mulombodi wa nsunângòngà awu, ne umona muvwa bantu benza mutooyi, ne dîbà . . . ne badila myadi ne batwa mikemu mikole.

Nenku paakabwelaye, wakabambila ne: Nudi nwenza lutooyitooyi elu, ne nudila myadi bwa cinyi? Nsongakaji ewu ki mmufwe to, kadi mmulaale tulù.

Ki bôbò kwasa dimuseka bya bamudyombola. Kadi paakamanaye kubapatula bônsò pambelu, yêyè wakangata taatù ne maamu ne nsongaakaji awu, baa nsongaakaji awu (eyowa's we), ne pashiishe barwa nende abu, ne wakabwela muvwa nsongaakaji awu mulaadika amu.

Ki kwambilaYe nsongaakaji awu, ne Yêyè . . . (mfwilaayiku luse) . . . wakakwata nsongaakaji awu ku cyanza, ne wakamwambila ne: Talitha cumi; padibo

bacyumvwija, mbwena kwamba ne: Nsongaakaji, ndi nkwabwila ne, buka.

Ki dyakamwe nsongaakaji awu wakajuuka, ne wakenda; bwalu ùwà...ne bidimu dikumi ne bibidi. Nenku baakakema ne dyanyina dikole.

Ki kubatuminaye òyì wamba ne muntu nansha umwe kavwa ne cya kucimanya to; ki Yèyè kutuma òyì bwa kumupeeshabo cintu kampanda cya kudiyaye.

57 Mu Mukanda wa Bakalenge wa Kumpala, mu nshapita wa 10, tudi tubala mvensa yisatu eyi.

Ne paakuumvwa mukalenge-mukaji wa ku Sheba bamba bwa luumu lwa Solomo pa bidi bitangila ònà dya MUKALENGÈ, wakalwa bwa kumuteeta ne nkonko mikole.

Ne wakalwa ku Yelusalema ne bantu musùmbà munene menemene, ne tuumeelu tìwà twambule manananshi, . . .ngòlò yàbùngì menemene, ne mabwe a mushinga mukole: ne paakafikaye kudi Solomo, yèyè. . .wakayiikilangana nende pa byònsò bivwa mu mwoyi wende.

Ki Solomo kumwambilaye yèyè—yèyè nkonko yende yònsò: kakuwaku cintu nansha cimwe civwa cisokome bwa mfumu to, civwaye kayi mumwambile.

58 Tusambilaayi.

Mukalenge Yesu, patudi tubala miyiiki ya mu Bible eyi, myoyi yetu yidi yitupika ne disanka. Bwalu tudi bamanye ne Wèwè udi Nzambi, ne kacya Kutu ushintulukaku to. Kacya Kutu ushintulukaku ngenzeli Yèbe to, Kutu ushintulukaku njila Yèbe to, Udi ushaala Nzambi kashidi. Nenku nyewu tulomba, Nzambi, bwa Wèwè kututwadila dyumvwija mu dinda emu, dya Mifundu eyi yùdi Wèwè muswe bwa twètù kumanya, bwa myoyi yetu yamona mwa kujinguludiibwa, bwa Nyuma Mwîmpè munene wamona mwa kulwa munkaci mwetu lelu ewu ne kujingulula meeji etu ne myoyi yetu. Nenku kakushaadiku kantu nansha kamwe to, bwa myoyi yetu kayiikadi yalwa. . .yiikale myùle tente ne disanka patwikala mwa kuumuka mwaba ewu mu mushindu wa twamba bu aba bavwa bafumina ku Emawuse diloolo adi abu ne: “Myoyi yetu kayivwa yilakuka kapyà munda mwetu pavwaYe wakula neetu twenda tuya mu njila apu anyi?” Wèwè udi ushaala Nzambi kashidi, ne twètù tudi bânà Beebe bàdi ne nzala badisangishe mu dinda emu. Bwalu, baakafunda ne: “Muntu neikale ne mwoyi ku Dìyì dyònsò didi dipatuka mukana mwa Nzambi.” Tùbènèshèku mu didisangisha dyetu pamwe ne bantu bònsò aba, Mukalenge, bàdi bafumine ku nkama, eyo, ne ku binunu bya kilomeeta aba. Tudi tulomba ne, piikalabo bakaadi benda baalukila ku mààbò, myoyi yabo yikale

misankishiibwe ne bintu bîmpè bya luse ne ngàsà wa Nzambi. Bwalu tudi tulomba nunku mu Dìnà dya Yesu. Amen.

⁵⁹ Kaacyena-bwalu kakese kaa pabwaku menemene, myaku yisatu pândi muswe kwakwila mipatula mu kubala kwònsò eku. Udi wêwè mufwanyine kwamba ne: “Aku’s nkantu kakese kaa dikema, myaku yisatu mipatula mu byònsò biwabadi abi, citupa cya nshapita yibidi mijima ya Bible.” Kadi ndi—ndi mwenze nanku bwa nshindameenu bwa kwangata myaku yisatu eyi ne: *Újaadika Dìyì Dyèndè*.

⁶⁰ Nudi bamanye’s, kudi Mufundu kampanda mu Bible emu, mu Tesalonika wa Kumpala 5.21, mudibo bafunde ne: “Nujaadike bintu byònsò; nukwate bikole ku cidì cîmpè.” Padi cintu kana cyònsò cijaadikiibwe, necijaadikiibwe anyi ne “ncya bushuwa” anyi ne “ncya mashimi.” Nenu kwòkò kwikale cintu kampanda bacyela mpatà, bikengela cijaadikiibwe too ne pawajandula cidì cya bushuwa. Ne pashiishe paudi ujandula cidì cya bushuwa, Mufundu awu mmwambe ne: “Nukwate bikole.” Mu ngaakwilu mukwabo ne: “Nwèlèmu nzadi, kanucilekelediku to. Nucikwate bikole!” Mu ngaakwilu mukwabo ne: “Nucikwate nucikwacilemu, mu mushindu wa kacyi mwa kunufinuka cyaya to.” Nushaalaayi bakwate bikole ku cidì cîmpè, paanyima paa cimane kujaadikiibwa ne “ncya bushuwa.” Ne cintu cyòcì cijaadikiibwe ne kì “ncya bushuwa” aci, nanku nucilekelele ne lukasa lwònsò, nuseemene kule naaci. Kanwikadiku bashaale bakwate ku cintu cya mashimi nansha.

⁶¹ Mpindyewu, bidi mwa kwenzeka ne beena Kilisto baa lulamatu lwa menemene, bantu anu beetu baa maalù mîmpè aba, misangu mikwabo, biikale bakwate ku cintu cya mashimi, beela meeji ne ncyà bushuwa. Kadi pa dîbà adi bivwa bikengela bintu ebi bijaadikiibwe, bwa ne “mbya bushuwa” anyi ne “mbya mafi.” Nenu mmudimu udi muntu ne muntu wa kutudi twètù bònsò ne cya kwenza, bu mudibi ne tudi bindile bwa kuya mu Dyulu paalwa Yesu. Nenu mmudimu udi mwambi ne cya kwenza, padi lukonko kana lwònsò lujuuca, bwa kufilaye dyandamuna ku lwòlò, ne pashiishe kujaadika bwalu abu kumpala kwa bantu, bwa kumonabo mwa kuumvwa, bwalu muntu nansha umwe katu muswe kusanganyiibwa mu “ntupakanyi” to, mwikale mukwate ku cintu cya mashimi.

⁶² Pa nanku tudi ne Mufundu (Yesu pende mmwambe ne, “Mifundu yònsò yidi ne cya kuula”) wa ne tudi ne cya kujaadika bintu byònsò. Ne pashiishe, “kukwata bikole,” anyi, “kukwata kukwacilamu, kukwata mufwileku. Kadi kubenga kucilekelela, kushaala mukwate bikole ku cidì cîmpè.”

⁶³ Ndi mvuluka ne mu kalaasa, ngâkalonga cintu kampanda, ne bààbûngì beenu mbalonge cintu cimwecimwe aci. Paudi umana kujandula nshinga, umana kumwandamuna, udi mwa kwangata diine dyandamuna adi kadi kudijaadikila ku nshinga awu.

Mbanganyi bakaadiku benze aci? Nwênù bônso, mu bushuwa bwa bwalu. Pa dîbà adi—pa dîbà adi kabyena bikengela kabidi bwa wêwè kuditacisha bwa ne dyandamuna dyebe adi ndya cya bushuwa anyi ndya mafi to, dyandamuna dya nshinga awu dikaadi dijaadikiibwe ku nshinga awu. Pa nanku, udi mumanye ne udi ne dyandamuna dya cya bushuwa. Pîikalàbi ne dyônso dya ku mandamuna ebe pa dibaya dyebe anyi pa dibeji dyebe ndijaadikiibwe, nshinga mujaadikiibwe ku... dyandamuna dijaadikiibwe ku nshinga awu, pa dîbà adi wadipeci. Kakwena muntu nansha umwe udi mwa kwamba ne ndya mafi to, bikengela upete... Nenu wêwè wenza mudimu webe ne mankenda ônsò ne bujaalame bwônso, kabidi mu mushindu udibi bikengela kuwenzà, ne dyandamuna dyebe dimane kujaadikiibwa, udi mwa kushaala musòmbè pòlàà ne ditwishii bwa dyônso ne neupete TB ku cyôci aci, pa dibeji dyûdi ukafila adi, bwalu ndijaadikiibwe, dijaadikiibwe ku nshinga awu.

⁶⁴ Mpindyewu, kutu kabidi lusumwinu lwa kale ludi lwamba ne: “Ucijaadike, nenu nêncîtàbùùjè.” Mpindyewu, badi ne dimwe dya ku matunga etu, dimwe dya ku matunga etu mu ditunga emu, batu ne cikemu cya ne: “Mémè ndi wa ku Missouri, anu wêwè mundejeje.” Nwamonu’s, mu ngaakwilu mukwabo ne: “Ucinjaadikile, mémè ndi wa ku Missouri.” Kadi cyôci eci kacitu anu cikumbana misangu yônso to, bwalu Nzambi, mu cikondo ne cikondo cyônso, ukaadi mùjùùjè ne mujaadikejaadike mudimu utuYe muteeke bwa ciine cikondo aci, ne mucyâmbè mu Dîyi Dyende. Ne musangu wônso utu Dîyi dya Nzambi dijaadikiibwe mu cikondo aci, ciibûngì cya bantu citu anu ciDibenge. Pa nanku, “Ucijaadike, nenu nêncîtàbùùjè” awu, kî mmwômò to. Udi wêwè mwa kwikala ne diitabuujà anu padi Nzambi ùkupà diitabuujà. Diitabuujà ndipà dya kudi Nzambi. Nansha wêwè mwikale mutendeleedi wa bishi, nansha nanku bidi ne cya kukengela anu... udi ne cya kwikala ne diitabuujà. Ne diine diitabuujà dyebe adi didi mwa kushindameena, pawikala mwena Kilisto, anu pa Dîyi dya Nzambi dijaadikiibwe.

⁶⁵ Mpindyewu, vulukaayi ne, Nzambi utu mwabanyine cikondo ne cikondo Dîyi Dyende, ne mudyanjile kwamba ciikala mwa kwenzeka mu ciine cikondo civwaYe wamba eci. Mpindyewu, bu ne Mòsà wakalwa ne mukenji wa Noa, nunku kî mbikumbane to. Bu ne Yesu wakalwa ne mukenji wa Mòsà, nunku kî mbikumbane to. Anyi muprofeta kampana mulwe ne mukenji wa muprofeta mukwabo, nunku kî mbikumbane to. Kadi ku baprofeta Bende abu, Yêyè mmubuulule kaabujima kaa Yêyè mwine yônso ne kaa ndongamu Wende. Ki bwa cinyi Bible kêna mwa kwikala ne dîyi dimwe disakidilaKu anyi Dîyi dimwe dyumushilaKu to.

⁶⁶ Pa nanku wêwè mujaadike nshinga webe ku dyebe... dyandamuna dyebe ku nshinga webe, kadi mbwa cinyi kubenga kujaadika dya—dyandamuna ditudi tupeta mpindyewu edi ku

Dìyì dya cikondo eci? Piikala Bible wamba ne cintu kampanda cidi ne cya kwenzeka mu cikondo eci, cidi mu Bible ne necyenzeke. Pa dībà adi piikala dyandamuna dyebe dyûdì uteeta kwambila bantu adi, piikaladi dijaadikiibwe ku Mukanda, nanku's ndilelela, ndilelela. Bwa cyanaana, kî ndilelela to.

⁶⁷ Mpindyewu tudi tumona lukwabo, pa dībà adi wêwè, kakuyi mpatà to, ukàadi mumuumvwe lwamba ne: “Kumona ki kwitabuuja.” Ki lusumwinu lukwabo lwa kale lutudi naalu muneemu emu ndwòlò alu, kadi nansha lwòlò lwine alu kalwenaku anu lukumbana to. Kalwena lukumbana to, bwalu muntu udi mwa kusòmba ne kutangila buludi cintu kampanda kadi kayi ucimona to. Mwaku “see” mwaku wa mu Anglais “see” [“kumona”—Muk.] udi ne muumvwija mashiilàngàne àbùngi. *Sea* [“mbù”] mmufwànyine kuumvwija “mushiki wa màyi.” Ne *see* mmufwanyine kuumvwija “kuumvwa.” *See* mmufwanyine kuumvwija “kucitangila.” Nenku, kaa, s’kudi anu myaku ya mishindu yònsò yûdì mwa kukwata naayi mudimu. Kadi paudi wamba ne, “kumona ki kwitabuuja” apu, s’udi mutupakane.

⁶⁸ Paudi *umvwa* cintu, udi uciitabuuja. Yesu wakamba ne: “Muntu yêyè kayi mulediibwe cyakabidi to, kèna mwa *kumona* Bukalenge nansha,” mu ngaakwilu mukwabo, “*kuumvwa* Bukalenge,” bwalu Bukalenge n’Nyuma Mwîmpè munda mwebe. Pa nanku bikengela wêwè kuumvwa ne ncinyi cidi munda mwebe eci. Nenku mushindu umwepele uwikalaku mwa kucyumvwa, ngwa kufwanyikija cidi cyòcì aci cikwenzeja ne cidi Bible mwambe ne necikwenzeje. Pa dībà adi nshinga webe mmupete dyandamuna, wamonu’s. Kabidi, pashiishe, Yêyè ki Nyuma Mwîmpè mwine awu.

⁶⁹ Pa nanku, kumona kî nkwitabuuja to. Ndi mwa kujaadika cyòcì aci ku byumvwilu bya mubidi, nwamonu’s, ne kumona kî nkwitabuuja to. Ncyèna mwa kumona mulangi wa mafuta ewu to. Ncyèna mufwanyine kuwumona to bwalu ùdi ùsanganyibwa paanyima paanyi, kadi ndi ne cyumvwilu cya—cya lulengu cidi cingambila ne ndi naawu mu cyanza cyanyi. Nwamonu anyi? Mpindyewu, ncyèna mufwanyine kuwumona to, kabyena mwa kwenzeka to. Kadi mpindyewu ncyèna mwa kwolola cyanza kuwukwata to, kabyena mwa kwenzeka to, kadi paanyi’s ndi nciitabuuja. *Èci*, kumona nkwitabuuja; *eci*, kulenga nkwitabuuja. Mpindyewu ndi mbwita kwisù, ncyèna mufwanyine nansha kuwumona anyi kuwulenga to, kadi mèmè muwuseemeje pabwîpì ne mufwanyine kuwununkila, s’ndi anu ngiitabuuja ne udipu. Pa nanku: “Diitabuuja ndilenga dya bintu bitudi tutekemena, cileeji,” kî mbitudi bamone, balabule, balenge, banunkile, anyi buumvwe to. Wêwè udi uciitabuuja! Ne diitabuuja bikengela diikale ne mwaba wa ciikishilu. Kadi cintu cyònsò cidi cibengangana ne Dìyì dya Nzambi, diitabuuja mu Nzambi kadyenaku mwa kwikala ne mwaba wa ciikishilu padici

kaciyi mulayi wa Nzambi to. Nenku apu ki padidi dipetela kaaba kaa diimanyina kaa Cyendelele.

⁷⁰ Kadi munkaci mwa bi... bikondo byònsò bya mpatà ne bikwabo bitudi bapicile ne mutudi ne mwoyi leelu ewu ebi, cidi citambe bubi ku byònsò eci, ne mpatà yònsò eyi miimane, Nzambi udi utungunuka anu ne kujaadika Mèyì Ende ne ngaa cya bushuwa, anu mukaadiYe mwenzenze mu cikondo ne cikondo cyònsò. Yèyè... Bupidya kabwena bwimanyika Nzambi to, kabwena buMupangisha to. Nansha baa pa buloba mwa kubenga kwitabuujà bishi, Necyenzeke anu kwenzeka. Bupidya kabwena ne cidibu bwenza to anu kupiisha mwena bupidya. Bupidya nebutume mwena bupidya mu Iferno. Nebumwibe dibeneshà dyònsò ditu Nzambi mumulaye, kadi kabuyi bupangisha Nzambi bwa kutungunuka anu ne mwena kwitabuujà to. Nwamonu's, bupidya kabwena bwimanyika Nzambi to, budi bwimanyika anu mwena bupidya.

⁷¹ Wèwè udi wamba ne: "Ndi... Dìbà kadyakuteemaku maalaba to, mèmè nèndimànyikè." Teetabi kucyenza tǔng. Wamonu anyi? Eyo, kwèna mwa kucyenzaku to. Nzambi ukaadi muditeeke mu bulongame ne mwambe ne nediteeme, nenku nediteeme, kwajiki, Yèyè ngukàadi mumane kwamba ne nediteeme. Nkufwanyine kwikala ndambu wa mavuba mwinshi mwàdi amu, kadi didi diteema anu mwàdi ne kale. Nenku kwèna mwa kwimanyika Nzambi ne cyòci aci to. Yèyè, cidi . . .

⁷² Mmunyi mudiYe umanyisha Dìyì Dyende kudi bantu? Dyambedi, Nzambi mumane kumanya ne nekwikale beena bupidya... Mpindyewu tangilaayi numone lungenyi lwa Nzambi; mumane kumanya ne nekwikale beena bupidya, ne mushindu wikalà ciibúngì cya bantu beena bupidya. Yèyè, ku didyanjila-kumanya, wàkadyànjila kulongolola diminiu kampanda bwa cikondo ne cikondo, diikalà mwa kuDii tabuuja. Mpindyewu, bu nwènù mwa kumona mwómò amu, bu mudibi ne, cikondo ne cikondo cyònsò cidi citungunuka anu buludi ne Dìyì Dyende, cintu cyònsò anu pa dìbà, kakwena cidi cipangisha Nzambi to. Yèyè udi anu utungunuka, ne kakùmà kwònsò kàdi kènzeka anu pa dìbà dyàkù menemene. Tutu tudyelela meeji, misangu mikwabo ne, kabyakwenda mu byòbi to. Kadi kanuditacishiku to, ntanku Wende udi ne dìbà dijaalamija anu menemene ne ku kasunsukila kaa kasunsa, ne kantu ne kantu kadi kenda anu mu kòkò menemene.

⁷³ Pântù misangu mikwabo nkenzakana mmona tu-Rickys ne tu-Rickettas tutudi naatu leelu wa Ndaaya ewu etu, ne mu misèèsù, ne mudi maalù enda aya emu, ntu ndyambidila ne: "Èyì Nzambi wa yaaya!"

⁷⁴ "Indila kakese," mudiYe wamba, nwamonu's, "ntanku Wanyi udi wenda anu mu byòbi menemene. Bikengela Mèmè nkuteeke pa cishimikidi cimwecimwe pàngàkatèkà muntu wa kumpala

apu, mu matuku awu. Nenku Ndi mukuteeke pa cishimikidi cimwecimwe cya Luther, ne pa cishimikidi cimwecimwe cya Wesley aci.” Bwalu, nwamonu’s, mpekaatu kavwa mumanyike musangu awu mudiye mumanyike leelu ewu emu to. Ne patudi bapete dimanya dyàbùngì mpindyewu kupita dituvwa naadi musangu awu apa, ne padi mwena lukuna ulwa bu musulu mupaasalale, Nyuma wa Nzambi udi ujuula dibendela uwulwisha. Nwamonu anyi? Nenku mpindyewu leelu ewu, tudi bapete dimanya dipite, dyumvwa dipite, pa nanku misulu ya bupidya yidi yipweka ne nkwaka mukole, kadi Nzambi udi ujuula dibendela uyilwisha. Kadi, vulukaayi ne, Yèyè udi misangu yònsò. . . Kabingila kaakenza ne Yèyè—Yèyè ikale mudyanjile kulongolola bwa bintu ebi kwenzekabi. Ùkaavwa mudyanjile kubyamba ku baprofeta Bende ne nebyenzeke. Nenku padi baakane bamona bintu ebi bìshìndikiibwa, pa dîbà adi badi bamanya ne nCya bushuwa. Kabayi bacyuka cidì nî nganyi nî nganyi mukwabo wamba to, bôbô mbamanye ne nCya bushuwa.

⁷⁵ Tudi tujandula muntwamu mu—mu—mu, ngeela meeji ne, mmu Tesalonika wa Kumpala, mudiYe mwambe ne: “Yèyè wakadyanjila kutulongolola ku diteekiibwa dya bânà ku Yesu Kilisto.” Nzambi, kayi wamba ne: “Nènkusungùlè wèwè, ne ncyèna nkusungula wèwè” to, kadi didyanjila-kumanya Dyende divwa dimanye ciwikala wèwè mwa kwenza. Pa nanku ku didyanjila-kumanya Yèyè udi mwa kuteeka mu bulongame, ne Yèyè mmwenze bwa bintu byònsò kukwacishanganabi bwa dyakalenga Dyende, ne bwa dyakalenga dyebe.

⁷⁶ Mu Genese, Nzambi wakambila Adama ne Eva civwa mwa kwenzeka paakabengabo kwitabuuya Dìyì Dyende apu. Mpindyewu, Yèyè wakateeka maalu mimpè ne maalu mabi kumpala kwabo, ne Wakamba ne: “Dituku dinwàkùdyà adi, dituku adi ndinwafwa.” Nenku Nzambi uvwa uswa kwamba menemene anu cyakambaYe aci. Ki cituYe wenza misangu yònsò, Ùtu uswa kwamba cidìYe wamba aci.

⁷⁷ Sataana wakalombola mukaji ku dibenga kuDiitabuuya, bwalu Sataana yèyè mwine kavwaku muDìtàbùùje to. Yèyè katu uDiitabuuya to, pa nanku yèyè kumulombola ku diciitabuuya. Ne yèyè ucitu anu wenza cintu cimwecimwe aci, ne ucitu anu ulongesha bakwabo cintu cimwecimwe aci, ne bôbô badi babenga kuDiitabuuya bu mwakabenga pende mukaji awu kwitabuuya amu. Nzambi utu mwele bantu Bende mu bimanu paanyima paa Dìyì Dyende, ki webe ngabu umwepele wùdì nende. Kì ndingumba dyenu to, kî ntatwèbè anyi mamwèbè to, aci cidì anu cimpè, kadi mpaanyima paa Dìyì dya Nzambi. Ki mwaba udi mwena kwitabuuya mukubiibwe, paanyima paa Dìyì. Pààkakòsekà kaamùsèèsù kakese aku kuntu kwaka, ne kantu kakese kaa “kudikonka ne Didi bulelela anyi to? Kì nDifwanyine kwikala bulelela to,” dilukakaja dya lungenyi kubweladi ne

kwangatadi kaaba kaa diitabuuja, kuupulabo biibi. Kadi Nzambi wakalama Dìyi Dyende, Yèyè kuDikumbaja. Sataana yèyè wakateeta ku dimufikisha ku dibenga kuDiitabuuja.

⁷⁸ Anyi, ku dilukakaja dya lungenyi, kulukakaji naaDi lungenyi to! Wèwè—wèwè udi wamba ne: “Ee, mèmè ndi ngeela meeji ne. . .” Kwèna ne bukenji nansha bumwe to. Padi Nzambi wamba cintu kampanda, anu—anu mushindu udiYe mwambe awu, ki cintu cya dyanza ncyôci aci. Wèwè udi wamba ne: “Ee, ndi ngeela meeji. . .” Kadi kwèna ne meeji adi alwa nansha makeke to. Lekela meeji avwa munda mwa Kilisto awu ikale munda mwebe. Ne Kilisto udi Dìyi! Lekela Dìyi diikale munda mwebe. Mèyì makwabo ônsò ikale mashimi, Mèyì a Kilisto ke adi a cya bushuwa! Bakwabo batu bamwitabuuja yèyè ne dilukakaja dyende dya ngenyi adi, bu mwakenza mukaji awu, ulukakaja lungenyi ne: “Ee, bwa cinyi Nzambi mmufwanyine kwenza eci? Mpindyewu, eci kaciyena cîmpè anu mudi Aci anyi?” Piikalaci cibengangana ne Dìyi, kî ncîmpè to! Pa nanku, cintu kana cyônsò, mulongeshi kana yônsò, muleeji wa patooke kana yônsò wa Bible, cintu cikwabo cyônsò cidi cifwanyine kukulongesha anyi kuteeta kukutuma ku kwitabuuja kwa cintu kampanda ciikale cishiilangane ne mudi Bible ucyamba nansha ne katoba kakese, adi ndilongesha dya mashimi. N’Sataana awu, cyakabidi, anu mwakadibi menemene kudi Eva. Nzambi udi anu utungunuka, nansha yèyè wenza cinyi, cidi Sataana wenza aci, Nzambi udi anu utungunuka ne kuCijaadika ne cidi nanku.

⁷⁹ Mpindyewu tangilaayaaku cyakambilaye Eva: “Bulelela kanwakufwa to. Nenwikale ne lungenyi.” Aci ki cidi baa pa buloba benda bakebanganana naaci leelu ewu, cijaadiki cya mu maalu a mamanya, dimanya kampanda dya muntu. Ki kwambaye ne: “Bulelela kanwakufwa to.”

⁸⁰ Kadi Nzambi uvwa mwambe ne, “nenufwe,” ne Nzambi wakacijaadika nanku. Nenuku tudi mwa kucimona ne, Yèyè uvwa uswa kwamba anu cyakambaYe aci. Nda mu nkita emu, neumanye ne ki civwaYe muswe kwamba anyi kî ncyôci. “Dituku dinwàkùdyà, dituku adi ndinufwafwa.” Kadi paudi ubànda uya mwaba ewu bwa kukenketa muntu yônsò uwaswa awu, wa cikondo kana cyônsò, kakutu muntu ukaadiku mulaale bidimu cinunu to. Nzambi wakajaadika Dìyi Dyende mushindu awu, Yèyè neàcyènzè musangu wônsò.

⁸¹ Kadi, vulukaayi ne, Yèyè utu ulama milayi Yende yônsò ya kubeneshangana anu mutuYe ulama ya kwelangana Kwende kwa milawu. Bwalu pààkakùdyàbo, dituku adi ndyakafwabo; ne Yèyè udi ukujaadikilaci, ne badi bafwa dituku mene didibo bàkùdya adi. Yèyè utu kabidi ushaala mukwate ku Dìyi dyônsò dituYe mwambe pa bidi bitangila mabenesha Ende. Mulayi wônsò, Nzambi utu ushaala mukwateku! Kaa, ntu munange aci. Bikengela usungule cyùdi muswe ne ncyèpi: mabenesha Ende, pa kwitabuuja; anyi milawu Yende, pa kuCikudimika.

Paudi uCikudimika ne witabuuja luseke ludiCi cikudimane alu, pa dîbà adi's udi mwediibwe mulawu. Wêwè muCîtàbùùje menemene anu mushindu udiYe muCifunde awu, ne ushààla mukwateKu, pa dîbà adi udi mubeneshiibwe. Ne Citu misangu yônsò anu cibengangane ne maalu a mamanya, cibengangane misangu yônsò ne—ne mushindu wa bantu wa dileejila maalu ku maalu a mamanya. Bwalu Yêyè utu ushaala mukwate ku Dîyì dyônsò, ne dya mabenasha Ende ne dya milawu Yende.

⁸² Balume ne bakaji paakatambabo kwenza mpekaatu mu cikondo cya kumpala kwa mvula wa Noa, yêyè udi ne... bibengangane ne Dîyì Dyende dilelela, Adama ne Eva baakenza mpekaatu babangangana ne Dîyì Dyende dilelela. Kadi, ne nkongo yônsò yâkabalondâ ayi yakabanga kwenza anu cintu cimwecimwe aci, Yêyè kubapatwila dîyì dya lufu, ki ndekeelu wa byônsò kufikabi ku kabutu kaa menemene, kaa mu kaabujima kaa bintu byônsò pa buloba, bwakabwikidiibwa ne mâyi, kubusukula anu menemene bwônsò ne mâyi.

⁸³ Mpindyewu, Nzambi umwèumwè wâkatwàla kabutu kaa bintu byônsò pa buloba bujima, cisoosa cyônsò, cifukiibwa cyônsò pa kuumusha byakadilaminaYe ne kubyambula kuulu kwa buloba abu, cintu cyônsò cyakalayaYe ne Neénzè aci, ki cyakenzaYe. Nenku Nzambi umwèumwè wâkalaya mâyi, ne kushaala mukwate ku Dîyì Dyende awu, Nzambi umwèumwè awu udi ulaya kapya, ne Neashaale mukwate ku Dîyì Dyende. Neashaale mukwate ku Dîyì Dyende.

⁸⁴ Mpindyewu, mpindyewu cyakenzaYe ncinyi? Bôbò abu baakamanya Dîyì Dyende munyi? Bwalu mushindu Wende wônsò wa kwenza, wa kudijaadika Yêyè mwine kumpala kwa kwenzaYe dinyangakaja, anyi kwa kwenza dilumbulwisha kana dyônsò, Yêyè utu misangu yônsò anu utumina bantu Dîyì, ne utu anu misangu yônsò udimwija bantu. Kaa, ndi munangepu aci's we! Pa dîbà adi tudi mwa kumona menemene ne tudi penyi.

⁸⁵ Kuvwa mishindu yônsò ya bambi ne tusumbu mu matuku a Noa, ne kuvwa ntendeleelu ya mishindu yônsò mu dituku dya Noa, bwalu Yesu wakamba ne: “Anu mwakadibi mu matuku a Noa, ki mwikalabi kabidi ku dilwa dya Mwânà wa muntu.” Kadi kwakalwa muprofeta, wâkamata mu cyalu, ne wakabanga kwenza cintu kampanda, wakabanga kwibaka bwâtu. Nenku Nzambi wakatuma muprofeta Wende, Noa, bwa kujaadika ne Yêyè wakatuma Dîyì Dyende, bwa kubambila ne kuvwa kulwa kabutu, ne Yêyè kavwa mwa kutwala mushindu uvwa—uvwa bantu munkaci mwa kwenza awu nansha, ne Yêyè uvwa ne cya kubutula bantu bavwaYe mufuke abu.

⁸⁶ Mpindyewu, Dîyì divwa dilwa kudi muprofeta, misangu yônsò, Yêyè katu ushintulukaku to. Maalaki 3, mmwambe ne: “Ndi Nzambi, ne Ncyèna nshintulukaku to.”

⁸⁷ Noa wakatumiibwa kudi cikondo cya maalu a mamanya, mwikale ne Mukenji ubengangana ne maalu a mamanya. Noa wakatumiibwa kudi cikondo cya beena mamanya a mu mitu, mwikale ne Mukenji ubengangana ne mamanya a mu mitu. Wakatumiibwa kudi cikondo cya maalu a mamanya, pende mwikale ne Mukenji wa diitabuuja ne mulayi bwa cikondo cya maalu a mamanya. Nenku nudi bafwanyineku kwitabuuja ne cikondo cya maalu a mamanya civwa cifwanyine kwitabuuja Mukenji ubengangana ne maalu a mamanya anyi? Cikondo cya beena mamanya a mu mitu banene, ne pa dîbà adi nudi bafwanyine kwitabuuja ne bavwa bafwanyine kwikala ne diitabuuja mu cintu civwa cimweke anu cikutakane bwa meeji a bantu anyi? Kadi Nzambi utu misangu yônsò ucyenza anu mushindu awu. Noa uvwa muprofeta mushindika wa Mukalenge, ne mwikale Mukenji wa Nzambi wa dîbà adi. Bivwa bikengela kwitabuuja cyôci aci, bikengela bantu kwitabuuja Mukenji wende paanyima paa yêyè mumane kushindikiibwa kudi Mukalenge, bwa ne civwa n'Dîyî dya Nzambi, ne Nzambi uvwa mwa kushaala mukwate ku Dîyî Dyende.

⁸⁸ Mpindyewu ncintu cimwecimwe aci leelu ewu. Tukaadi ku cikondo cya nshikidilu. Mpindyewu, bantu abu bivwa bikengela kwikalabo bamanye, nwamonu's. Mpindyewu, nudi bamone, Noa uvwa cimfwanyi cya beena Yuda biikalà ne cya kupicishiibwa mu Dikenga dikole. Enoka uvwa cimfwanyi cya—cya Mukenji mulelela, cya—cya—cya ditentemunyiibwa dya Ekeleeziya, bwalu Enoka wakambwibwa ki pashiishe mvula wa Noa kumataye. Ne bônsò babidi. . . Muprofeta wa kumpala, Enoka, wakuumushiibwa mu njila bwa Noa wàmôna mwa kutungunuka ne bende—ne bende. . . bwa Nzambi wàmôna mwa kutungunuka ne Noa. Nenku mpindyewu Ekeleeziya neambwibwe bwa Nzambi amone mwa kukwata cyakabidi mudimu ne beena Yuda, bàshàadilè baa beena Yuda, binunu lukama ne makumi anaayi ne binaayi, bu mutwayiidi bwalu abu mu Mifundu mwaba ewu.

⁸⁹ Kadi cìmònààmèèsù ne cikondo cyônsò cya maalu a mamanya, ne cya bupidya aci, Nzambi wakajaadika Dîyî Dyende dya mulayi ne ndya cya bushuwa, pa kubatumina mvula awu. Mpindyewu, vulukaayi ne, mu matuku a Noa amu, mvula kayivwaku myanji kuloka pa buloba to. Nzambi uvwa upatula difwima mu buloba bwa kumyamina bikunyiibwa, kadi kakuvwaku kwanji kumata mvula to. Kadi Noa wakamba ne: “Mvula neyiloke.” Mpindyewu aci's civwa. . .

⁹⁰ Bavwa bôbò mwa kwangata cyamu kampanda e kucituma mu mauulu, kwamba ne: “Kamwenaku mutaleela muulu mwamwa to. Kamwena mvula muulu mwamwa to. Tudi mwa kujaadika ne kamwena mvula nansha.”

⁹¹ Nansha bivwa maalu a mamanya byambe biikale binganyi, Nzambi wakamba ne mvula yivwa ne cya kuloka, nenku acincedi cyenza bwalu abu. Mpindyewu, ncinyi cyàkenzà Nzambi? Bwa ku dyanyi dimona, bamwe baa kudibo paakanyungishabo buloba ndambu ne kubukupa mu cincyòmpancyòmpa apu, ki paakatumabu nyima mu mushindu *ewu*, luuya lwa buloba kubwela mu mashika, kutwalalu anu mu—mutaleela. Ki buloba kubwikidiibwabu, dyambedi, ki byuyüya bya muulu mwamwa, citaleela cya mu kapeepe, ki kudisangabi mu mmwenekelu wa divuba ne kumacishabi mvula, ki kujikaku.

⁹² Mpindyewu tudi bamanye leelu ewu ne, kudi kapya muulu mwamwa, bwalu ma-gaz adi mu buloba. Ne Bible mmwambe ne: “Maulu ne buloba nebijimine ne mutooyi mukole, ne buloba nebwenguluke ku luuya lukole.” Pa nanku tudi bamanye ne kadi muulu mwamwa, anu mushindu umweumwe wakadibi mu matuku a Noa awu.

⁹³ Nenku mpindyewu vulukaayi ne, Mukenji wa cikondo cya Noa uvwa anu ku diitabuuja nkaayaadi, kawuyi mujaadikiibwe ku maalu a mamanya to. Kadi, leelu, Mukenji udi bilondeshile Dìyì dya Nzambi, kadi mujaadikiibwe ku maalu a mamanya. Eliya wakalwa musangu wa kumpala, wenza bishima, kayi wenza diyiiisha nansha dikese to; mwikale anu waya eku waya eku, wenda wenza bishima. Musangu wàkalondà, kulwaye mu mmwenekelu wa Yone Mubatiiji, kulwaye kayi wenza bishima to, anu kuyiisha. Kadi musangu mwisàtù udiye ulwa, kudi bishima ne diyiiisha byònsò bibidi. Nwamonu anyi? Nwamonu mudi bwalu anyi? Tangilaayi nunome mudi ntungunukilu wa Mifundu uya. Tudi anu bafwanyine kupicishila dibà dyàbùngì pa cyòcì aci, kadi katwakwenza aci to, netucishiye ku luseke, bwalu ndi ngiitabuuja ne nudi bapete cingenyinyenyi.

⁹⁴ Yèyè wakenza mu cikondo aci anu mutuYe mwenzenze mu bikondo byònsò, ne mwenzaYe, anu mwakalayaYe bwa kwenza amu. Nzambi udi ulaya cintu kampana, pashiishe Udi upweka ujaadika ne Dìyì Dyende ndilelela. Bònsò baakiitabuuja, bònsò baakiitabuuja Mukenji wa cikondo aci, baakabwela ne baakasungidiibwa. Ki mwikalabi kabidi mu cikondo kana cyònsò. Bònsò bàakabèngà kwitabuuja Mukenji ne musanjeela abu, baakabutuka.

⁹⁵ Nenku aba bònsò badi biitabuuja mu bulelela Dìyì dya Nzambi leelu ewu, nebangaciibwe. Bònsò badi kabayi biitabuuja Dìyì dya Nzambi abu, nebabutuke pamwe ne buloba, bwalu bòbò mbaa pa buloba, ne byònsò bidi pa buloba nebibutuke pamwe ne buloba. Ne byònsò bidi bisungidiibwe mu Nzambi, bidi ne cya kwikala mu Nzambi, ne kabyena mwa kubutuka to: “Mèmè nêmbàpè Mwoyi wa Cyendeleele, ne nêmbàjuulè ku dituku dya ndekeelu.” Mpindyewu, mbusambi kaayi kudi mwena kwitabuuja yònsò, bwa kumanya ne, paudi munda mwa Kilisto, anu mudibi bushuwa ne Nzambi udi ushaala mukwate ku Dìyì

Dyende ne neabutule baa pa buloba amu, Yèyè udi ushaala mukwate ku Díyì Dyende ne ujuula bantu Bende ku lufu ne ubasungila. Udi ucijaadika.

⁹⁶ Yèyè wakajaadikila Abraham mu cikondo cyende ne Díyì Dyende dya mulayi ndya cya bushuwa. Monaayi ne, civwa kacyi cya maalu a mamanya to, mu cikondo cya Abraham amu, bwa muntu wa bidimu lukama, ne mukaji wa bidimu makumi citeema, bwa kulelabo mwànà, bamane kupicila bidimu. Kadi Abraham kavwa mwa kucyumvwija to. Ûvwa mwa kuya kwa ngangabuka, kwamba ne: “Ngangabuka, cidi mwa kwenzeka anyi?”

⁹⁷ “Kacyena mwa kwenzekaku to!” Kuya ku lupitaadi bwa kulongolola bwa maamu kulelaye mwànà, anyi cyònsò civwa cifwanyine kwikalaku aci panwikala baswe kucifwanyikija ne eci cikondo, s’mbafwanyine kumubiikila ne mmupàle: “Lungenyi ndumujimine.”

⁹⁸ Kadi Nzambi nguvwa mwambe! Nenku yèyè...Bible mmwambe mu Loomo, nshapita mwi4, ne “Abraham kaakatenkakanaku ku mulayi wa Nzambi, ku bupidya to, kadi ùvwa ne dikanda, ùfila butumbi kudi Nzambi. Bwalu yèyè wakananukila byenze bu uvwa umona Ewu Udi kayi umweneka, ne wakashaala musankishiibwe, kacya anu wakwata.” Mukwate bikole, bwalu ùvwa mutwishiibwe bikole ne civwa Nzambi mulaye, Nzambi uvwa ne bukole bwa kucyenza! Ne twètù ki badi ne cya kwikala bânà bende yèyè. Amen! Mpindyewu ngaavu kuumvwa bwena Nzambi bwambwedi, nwamonu’s, paudi anu wela meeji ku ciine aci’s. Kaa, Yèyè’s wakacijaadika, paanyima paa bidimu byònsò abi, kupingajaYe Abraham, ne Sarah kupingana ku bunsongaakaji, ne kupetabo mwànà awu. Ne Abraham ne Sarah baakashaala ne mwoyi. . .Bidimu makumi anaayi ne bitaanu paanyima, Sarah wakafwa, ki Abraham kuselanganaye cyakabidi paanyima paa yèyè mumane kwikala ne bidimu lukama ne makumi anaayi ne bitaanu, kulelaye bânà bakwabo baa balume mwandamutekete katuyi tubala baa bakaji bende abu to. Dìbà adi, ùkaavwa mupite cikondo cya kulelangana, ùvwa nkumba, kacyiyiku—kayiku ne dimiinu nansha dya kânà to, kacyi kabidi ne mwoyi munda mwende to, pamwe ne bidimu lukama bikwabo kumpala kwa ciine aci. Amen! Bwa cinyi? Yèyè kaakatangila mubidi wende yèyè mwine to, kaakatangila mushindu uvwa munda mwa Sarah mumane kufwa to. Yèyè wakatangila anu civwa Nzambi mwambe, ne ùvwa mumanye ne Nzambi uvwa mwa kujaadika civwaYe mwambe. Amen! Nzambi utu ujaadika cidiYe wamba ne Neénzè. Munkaci mwa bivwa kabiyi bya maalu a mamanya ne bivwa bya maalu a mamanya, ne—ne munkaci mwa bintu kana byònsò, nansha ciikale cinganyi, Nzambi utu ujaadika ne Yèyè mmubinge, ùtu misangu yònsò anu ujaadika Díyì Dyende. Yèyè mmubinge, bakwabo bònsò mbapiile.

⁹⁹ Yèyè wakaCijaadikila kabidi Lota, paakambaYe ne: “Wèwè kuyi mupatuke mu cimenga eci to, Nèncyòshè.” Ne Wakambila Abraham ne, bu Yèyè mwa “kupeta bantu dikumi,” Ùvwa mwa kulama cimenga aci. Kadi Kavwa mwa kupeta bantu dikumi abu to, pa nanku Wakajaadika ne Dìyi Dyende divwa dilelela.

¹⁰⁰ “Kapyà nekafumine penyi? Kakeenaku nansha kakese mu bibàtâbâtâ emu to, mu biina bya bitoci emu.” Kadi Nzambi ngwâkamba nanku, nenku Abraham uvwa mumanye ne necyenzeke. Lota wakamanya ne Civwa nanku, ki kunyeemenaye ku mukuna aku.

¹⁰¹ Wakalaya ne dimiinu dyende nediikale dyenyi mu ditunga dyenyi, ne nebâbâkèkèkè kudi bantu, ne nebiikale mwa kwanji kusòmbelamù, dimiinu dya Abraham diine adi, munda mwa bidimu nkama yinaayi munkaci mwa beenyi, bantu beenyi. Ne Yèyè wakuuja Dìyi Dyende patapata anu mwakambaYe ne Neènzè. Dimiinu dya Abraham bulelela dyakanji kusòmbela mu Ejipitu bidimu nkama yinaayi. Wakalaya, kabidi, bwa kubasungila ne cyanza cya bukole. Cyanza cya dikanda, Yèyè uvwa mwa kusungila cisamba aci kubapatula mu bupika bwa beena Ejipitu. Nenku Wakashaala mukwate ku Dìyi Dyende. Tangilaayi numone cyâkakèngelâ bwa kwenzaYe bwa kufikisha bânâ abu mu Ejipitu amu. Byakamweka anu bu ne dikenga dya cìmpicìmpi dyakabatuuta, dibatuuta, ne bikwabo. Kumwekabi anu bu ne bivwa . . .

¹⁰² Bivwa byenza bwôwâ bwa Yozefu kwangaciibwaye bu ne mmufwe, ne Izaka mukwate ne bya luse awu, anyi, Yakobo, tatwëndè (anyi, Izaka, tatwëndè, eyowa’s we, wa Yakobo, ki muvwabi, Izaka uvwa nkakwëndè) Yakobo, tatwëndè, bwa kwitabaye ne mwanende wa munda mudi nzala bavwa bamushipe kudi nyama. Mushindu mwine uvwabi bwalu bukole bwa ka-Yozefu aku bwa kumanya ne kalumyana kakwate ne bya luse aku, kule ne baa kwabo, mupângila kudi bânâ baabo, mwela mu dijimba, bacinka ne mmufwe, mashi a mukooko meela ku cinkutu cyende, paabo, civwabo bavwa bashipe kânâ kaa mukooko bwa kukadya, kulaabapu mashi kadi kuya naaci kudi tatwëndè, mwikale mumanye biine byònsò ebi. Kadi Yozefu uvwa mwa kuvuluka cintu cimwepele eci ne, cyanza cya Mukalenge civwa pambidi pende. Ùvwa mumanye ne yèyè uvwa mwena kwitabuuja. Nansha muvwa bânâ baabo bamubenge amu, nansha muvwaku kakuyi dimwela dya mu diboko anyi nî ncinyi cikwabo amu, Yozefu uvwa mumanye ne Nzambi uvwa mwa kushaala mukwate ku Dìyi Dyende. Paakamonaye cikeena-kumona cya bònsò biikale bamwinamina yèyè aci, ùvwa mumanye ne civwa ne cya kwenzeka bwalu civwa ng’EMU MMUDI MUKALENGÈ WAMBA. Amen. Nansha muvwaci cimweka cicimbe amu, Yozefu yèyè uvwa mumanye ne mbulelela. Nansha muvwa mudimu mwikale mukole, ne bivwaye ne cya kupicila abi, ùvwa mumanye ne dîngâ dituku umwe ne

umwe wa kudibo nealwe kutwa binù ku makàsà ende. Mmunyi mwàcyènzàye pavwabo bamukine? Kadi ùvwa mumanye ne Nzambi uvwa mwa kujaadika ne Dîyi Dyende divwa nanku, musangu wònsò.

¹⁰³ Ki mwàcyènzàYe kabidi leelu ewu! Nzambi neajaadike ne Dîyi Dyende didi nanku, nansha maalu a mamanya mambe ne: “Kabyena mwa kwenzeka to.” Nansha twètù balonge tulaasa, bapete mamanya a mu mitu munyi, nansha mukaadi ekeleziya mikadibwinke mu mu—mushiki wa bintu bya kwìsùkwìsù ne bikwabo, Nzambi neajaadike anu Dîyi Dyende ne “ndya cya bushuwa.” Ùdijaalàmijè wèwè anu mu Dîyi adi.

¹⁰⁴ Eyo, Yozefu uvwa ne byàbùngì bya dipicila, kadi, bwa kupweka mu Ejipitu, kadi Nzambi wakamupatulamu anu mwakambaYe menemene; cimfwanyi cilenga be cya leelu ewu, bu ne tuvwa ne dîbà dya kubwelamu. Ndi ngeela meeji ne tukaadi baciyiile, kumpala, muneemu mu tabernacle, baciyiile. Kadi Nzambi wakashaala mulamate ku Dîyi Dyende, bwalu, bivwa bikengela kushaalabo muntwamu. Bivwa bikole be bwa bânà baa beena Ebelu abu muntwamu mu bupika bwa beena Ejipitu, bôbò bàkaavwà babeneshiibwe ne bapeebwe mamuma a mu ditunga adi, mu mwaba uvwa mutambe bwîmpè awu, Goshen, kadi kulwa kujandula ne bivwa bikengela balwe bapika; ne baamaamù abu bàvwà bàkèngelà kufila mu byanza bya musalaayi kampanda wa beena Ejipitu, mamuma a munda mwabo, mwânà munanga mukese wabo wa mu diboko, ne kumumona mwimane mwaba awu, wangata keele kanene ne umupandulula ne umwimansha panshi, ùwelela ngandu bwa kumudyayi. Mpindyewu, civwa ncintu cikole be bwabo bôbò, bwa kwikala ne cya kupicila mu biine abi.

¹⁰⁵ Kadi dîngà dituku dimiinu didyanjila kulongolola kulwadi kulediibwa, mwânà uvwa mwânà mwakanyine awu. Kuvwa cintu kampanda mu yèyè cìvwà cìmweka bu cya pabwaci. Mwamwa mundekeelu mwa cipeela, dîngà dituku, Nyuma Mwîmpè kupwekaye mu mmwenekelu wa Dikunji dya Kapyà ne kwikilaye mu kaacipuka, kwamba ne: “Ngũmvù mikemu ya bantu Baanyi, ne Ngävùluku mlayi Wanyi. Ne cikondo cya disungidiibwa cikaadi pabwîpi, nenku Ndi nkutuma wèwè bwa upweke muntwamu bwa kucyenza.” Ne dikombo mu cyanza, mukajende mubànde pa kampundu, ne mwânà mwambula pa bibelu, yèyè kucyenza ku bukole bwa Nzambi wa Bukole bwònsò. Cintu citambe kwikala cya cicimbe, ncinyi cidi—ncinyi cidi dikombo dikonyangale difwanyine kwikala kumpala kwa mafuma binunu dikumi? Kadi, nudi numona’s, Nzambi ngudimu. Mbilondeshile ku mwaba udi Dîyi Dyende disanganyiibwa. Mòsà uvwa ne Dîyi Dyende, Pâlò yèyè uvwa ne mafuma. Mòsà uvwa ne Dîyi.

¹⁰⁶ Ki cyònsò civwa cimukengela, civwa n’Dîyi. Ki cyònsò cidi cikukengela leelu ewu. Kì mukanda wa dijaadikiibwa wa kudi

ekeleeziya kampanda to. Kabyena bikengela bwa dingumba kampanda kukutwadi nyama ku mikolo to. Bidi bikukengela Dîyì, bwa kwangata Dyambwibwa ku Dyôdi adi. Kabyena bikukengela mukanda kampanda wa dijaadikiibwa to. Kabyena bikukengela bwalu bulonda kampanda bwa buleebule bwa ku cilongelu kampanda to, bwa wêwè kwondopiibwa mu dinda emu. Bidi bikengela bwa wêwè kwitabuuja Dîyì, aci ki cidi cyenza!

¹⁰⁷ Kabyena bikukengela dîyì dya kudi ngangabuka to. Piikala ngangabuka wamba ne wênjì mwende pende mwônso mwa kwenza, ki cyende pende cyônso cidiye mwa kwenza ncyôci aci. Pambaye ne wêwè udi ne kansere, cyûjà cya kansere, ne neushaale mpofo, udi mpudimaci, kamama, nî ncinyi cyônso, kaeyena ne bwalu to. Wêwè mwa kwangata Dîyì adi kuya naadi ku mulayi wa cipuka cidi cilakuka kapyà cya kuntu kwaka aci, amen, cintu kampanda's necyenzeke! Nzambi neajaadike ne Dîyì Dyende didi nanku, musangu wônso udiDi dyakidiibwa mu buloba bwa mushindu mwîmpè. Ki cyôci aci cidi cikukengela, Dîyì Dyende. Yêyè udi uDijaadika, Ûdi ushaala mukwateKu. Wêwè udi mwa kushaala mutwishiiibwe ne Dyôdi ndya cya bushuwa.

¹⁰⁸ Yêyè utu ujaadika Dîyì Dyende mu cikondo ne cikondo cyônso, mu mushindu udi mutambe kwikala wa pabwawu, kadi misangu yônso Yêyè utu anu ucyenza mu mushindu umweumwe awu. Nwamonu anyi? CyakenzaYe ncinyi mu matuku a Noa, pavwaYe ulongolola bwa kusungila bâshâadilè abu? Wakabatamina Noa, muprofeta. Wakatuma Noa, cimanyinu.

¹⁰⁹ Kadi mpindyewu monaayi, padiYe ulwa bwa kusungila bâna baa Izaleela, cidiYe wenza ncinyi? Mushindu Wende umweumwe awu, Ûdi utuma muprofeta Wende. Muprofeta Wende awu udi ne Dîyì. Bimanyinu ne maalu a kukema bya Dîyì dilaya bidi bicitwa nyama ku mikolo, bwa ne m'Bulelela anu bwa menemene. Izaleela wakenza lwendu too ne ku buloba bulaya, bwalu baakaciitabuuja.

¹¹⁰ Kadi mu lwendu lwa mu cipeela alu, kwenzekabi ne babenge kwitabuuja muprofeta ewu, paanyima paa bamane kumona Dîyì dijaadikiibwe mushindu awu, Mukaji-musela kupatukaye mu dikàsà (nudi bamanye cîndi ngamba aci, mu cikeena-kumona, nwamonu's, "kapatukaye mu dikàsà"). Kuvwa umwepele wâkashâala mwimane, dîna dyende Yoshuwa, ne Kaaleba, bôbô bavwa biitabuuje Dîyì dya mulayi ne ndilelela, nansha muvwa maalu amweka amu.

¹¹¹ Tangilaayi numone paakafikabo ku Kaadesa-baanea. Ku Kaadesa-baanea, Môsà wakatuma muntu umwe ku cisamba ne cisamba cyônso, bwa kuya katentekelabo buloba abu, bwa kumona ne nnjila kaayi wa kubwelela. Ki kutumaye kalââlâ kende kaa musalaayi, Yoshuwa, uvwa muprofeta, nenku yêyè

wakatuma muprofeta wa kânàkânà uvwa kwinshi kwa Mòsà. Nenku Yoshuwa uvwa uteeleja Mòsà. Ki kumutumabo, ki kwambaye ne: “Ndaaku ukatenteketele buloba abu.”

¹¹² Ki kalààlà kaa masalaayi awu kuyaye ne kusobolaye muntu mu cisamba ne cisamba cyònsò, ki kukwatabo njila e kuya. Kwangataye Kaaleba, mulunda wende uvwa ku luseke lwende, bwalu ùvwa mumanye ne Kaaleba uvwa mwitabuuje. Kusabuka e kubwelabo mu buloba bulaya, ne kwalukilabo ne bisumbusumbu bya tumuma twa mvinyo bivwa bìkèngelà ne cimpwepele bàcyàmbùle kudi bantu babidi. Twàmbè ne, yèyè kwamba mpindyewu ne: “Mbwa Izaleela apete cileeeji kumpala kwa kubwelabo mu mulayi. Nwamonu’s, nebapete cileeeji cya ne Nzambi mmwambe ne mbuloba bwîmpè, ne mbùle tente ne mabeele ne bwîci. Mbuloba bwalabale. Mbuloba bwîmpè. Mpindyewu bintu byenu. . . kaa, matungulu ònsò a kale a ayì aa, pwàrò, ne byònsò binuvwa naabi muneemu mu Ejipitu abi. Mpindyewu tuyaaya neenu mu buloba budi ne mabeele ne bwîci. Pàmwápa kanutuku banji kulabula nansha cimwe cya ku byòbi abi, nî mmabeele nî ne mbwîci, mu Ejipitu mwamwa bidimu byònsò ebi. Bavwa bamonangane anu ne dinupa dya byakudya bya bapika. Kadi mpindyewu nuyaaya ku buloba ebu.” Nenku anu pa dîbà mene dyakenzabo lwendu bu lwa dituku dimwe nanku, mu mwaba uvwa Kaadesa-baanea, uvwa mwikale nkwasá munene wa cilumbulwidi bwa buloba bujima awu, kwimanyinabo mwinshi mwa mabwè a ngaji aa—aa kwine kuntwaku, pamwe ne tusulu, e kwasabo cituudilu. Kwambaye ne: “Mpindyewu, bwa kufikisha bantu ku dimanya ne. . .” Tangilaayi numone mudici cileeeji cipwangane, mudici cilelela, mudici cipwangane, mudi Nzambi ucyenza cyòci aci anu mudiYe wenza leelu ewu. Kwambaye ne: “Mpindyewu, Nzambi mmwambe ne: ‘Buloba mbulenga be.’ Mpindyewu, kumpala kwa nwênù kusabuka, ndi muswe bwa numone ne buloba mbulenga be. Pa nanku ndaayi nuntwadile mu dyalukila dyenu cileeeji kampanda cya buloba abu ne nucilleje bantu.”

¹¹³ Ki kubàndabò kuntwaku. Nenku, mpindyewu, misangu yònsò paukaadi walukila bwa kutwala cileeeji, mwaba awu ki padi mwena lukuna ucyamakana mu njila. Bamwe baa ku bakwetu abu paakatangilabo e kumona bantu baa mpolondo baa mu Kaanaana abu, kaa, ekelekele, kwambabo ne: “Katwena mwa kucyenza to.” Kadi paabo’s baakatwala cileeeji cya ne buloba buvwaku. Kabavwa balombodiibwe bya mafi to. Nzambi uvwa munkaci mwa kubajaadikila Dìyì Dyende, nansha kumpala mene kwa kubwelabo mu buloba abu.

¹¹⁴ Kanwenaku mwa kumona, leelu ewu ne, wêwè mwendeshe mashinyi ntanta wa kilomeeta cinunu ne nkama isambombo bwa kuteeleja Dìyì, ne utangila umona ne nDijaadikiibwe ne dishindikiibwe ne, ncileeeji cya ne m’Buloba bulenga anyi? Udi mwa kumona mundidimbi wa muntu mulaadika, ùpunga ne lufu

Iwa kansere ne: “Umwwa bîmpè.” Twètù bamone Mèyì a Nzambi akambaYe ne neènzekè mu dituku edi miikale amweneshiibwa, s’ncileeji cya ne Yèyè utu ushaala mukwate ku Dîyì Dyende. Kudi Buloba bulenga be. Piikala mwoyi wanyi pabwîpì ne kuya, kadi Nzambi utuuluka uwulama cyakabidi, aci’s cidi cileeja ne kudi cileeji cya Mwoyi wa Cyendelele. Pavwabi ne, musangu kampanda kuvwa mufwanyine kudyata dikàsà dyebe mu ciibi cya ekeleeziya awu to, bwa mpindyewu ukaadi wela mulongo bwa kubwelamu. S’ncileeji. Nzambi ngudi ushaala mukwate ku Dîyì Dyende ne ukujaadikilaDi awu, ne n’Dilelela.

115 Wendesha mashinyi ntanta wa binunu bya kilomeeta; ndi mupatuke apa mu dinda mutangile kwaka e kumona bantu abu bapeeshila bânà baabo byakudya mu milangi ya Coca-cola, tuumusabu tukese twa matala, lwà pa dibà itaanu wa dinda, basòmbe pa mwaba wawa. Mèmè kudyambidila ne: “Nzambi, s’ndi mufwanyine kwikala mwena lubombo wa mutambe kwikala wa ciipanshi pa buloba ebu, bwa kulekela bantu baba balwa ntanta yònsò awu, kadi mbambila cintu kampanda ciikale cya mashimi. Kadi ndi mbumvwila luse, mwoyi wanyi uzanyika mashi bwa bwalu bwabo. Badi ne nzala ne nyoota ya Nzambi. Nkwàcishèku, Mukalenge, bwa mèmè kubambila Bulelela, anyi unguumushe pa buloba ebu. Ndekelaku ngambile bantu abu Bulelela, ndi ngambilamu’s, Nzambi.” Mèmè ne: “Unkwateku ku cyanza, ne wènzèku bwa mmanye cidi Bulelela, ne pashiishe utwe cyòci aci nyama ku mikolo ku dijaadika dya ne cingàmbi aci m’Bulelela, bwa kumanyabo ne Cidi Bulelela. Kwitabiku bwa bantu badi bakwate ne bya luse baba baseeswishiibwe to. To.” Mushindu mwine udi mwoyi wanyi uzanyika mashi bwa cintu bu nanku’s, pa kumona bantu baa lulamatu!

116 Ntu ndifwanyikijila ne Yoshuwa wakadyambidila cintu cimwecimwe aci, diine dituku dyakabakungwijaye bamunyungulukile adi, paakabamonaye basukula bilàmbà byabo ne badilongolola balwijakaja bwa dituku diisâtù. Eyo, Yèyè’s wakacijaadika. Mpindyewu cyakamba Yoshuwa ncinyi? Paakambabo ne: “Kaa, katwena mwa kucyenza to. Wèwè kwèna mwa kucyenzaku to. Nebikengele bwa twètù kupatuka mu bulongolodi bwetu. Kwetu’s—kwetu’s—kwetu’s kwajiki. Wamonu’s, katwenaku bafwanyine kucyenza mpindyewu to. Katwena anu mwa kucyenza to, bwalu kacyena cya lungenyi to.” Kadi Yoshuwa paakabalombolaye kuntwaku, muvwa mmu ngondo mwinâyì, muvwa màyi mùle, ne Yadene uvwa mwalabale wipacila menemene anu Musulu wa Ohio. Bivwa bimweke anu bu ne Nzambi uvwa mwenze cilema cya cyènza ne bwôwà’s.

117 Udi mumanye’s, udi misangu mikwabo upona mu dîsaamà, wamba ne: “Ee, mèmè’s ndi mwena Kilisto. Nzambi, Yèyè—Yèyè’s mmutupakane, Yèyè undekela nsaama, kadi paanyi mwikale mwena Kilisto.” Kwèna ufikaku ku dimanya ne Bible utu

mwambe ne maalu ônsò neakwacishangane bwa dyakalenga dya badi banange Nzambi anyi?

118 Mwaba wakabalombwela Yoshuwa awu, mpindyewu, Yadene utu upweka bikole be. Udi mwa kwendelamu too ne dyamwamwa pamwe ne myaba yônsò eku ne eku, amba anu wêwè peebe mukeele dikàsà mu ciina mudi mâyì a ndondo mule menemene; udi mwa kucyenza's, kabidi ne twaba twônsò tûdi mâyì mîpî twa usabukilapu lwà makàsà atu ne bikwabo anu mwine mwaba awu ku—ku mwelelu kuvwa Yeleko usanganyibwa aku. Mona's, cidi, udi mwa kwendelamu lwà makàsà too ne dyamwamwa, mâyì kaena bule bwa àtamba kupita mu tupòmbo to, udi anu mwa kusabukamu ne kashinyi kaa jeep aka, wenda wendesha, uàkòsolola mubàndemù, uàsabuka wenda wenda lwà makàsà, anyi cintu kampanda. Kadi yêyè wakabalombolaku mu cikondo cya ngondo mwinâyì, pavwa musoko mùle tente ne mâyì awu mùle tente mukafike too ne mu ntanta wa wipacila kilomeeta mujima ne citupa. Mâyì avwa pàmwâpa ne ndondo wa wipacila mêtres citeema anyi diikumi ne abidi mwômò amu. Ki kwambaye ne: “Mu dituku diisâtù, netusabuke. Nzambi ngudi mwambe nanku! Biikidishaayi bantu kaaba kamwe nubajidile, bwalu, mu dituku diisâtù, nenusabuke Yadene.” Nudi numona mudi Nzambi ulekela cintu aci cyenzeka anyi? Anu bwa kucyenza, kwenza ne bantu... anu bwa kukoka musumbà Wende awu kuwupatula's. Civwabo bafwanyine kwenza ncinyi? Baakadijidila e kudilongololabo, nansha mâyì awu miikale ne ndondo wa bule kaayi, ne nansha miikale ne bitoci bya bishi, ne nansha nkwaka mwikale ne bukole bwa bishi. Nwamonu's, bavwa bamanye ne Nzambi uvwa mwa kujaadika Dîyì Dyende.

119 Nansha biikale cinyi, nansha wêwè mwikale pabwîpî ne Yadene bishi, nansha maalu adi akwenzekela miikale bishi, udi wêwè anu mwa kushala kacya wakwata mulayi wa Nzambi awu munda mwa mwoyi webe, Nzambi neawujaadike, bwa ne Didi nanku. Munkaci mwa bupidya bwônsò abu, Yêyè neajaadike anu ne Didi nanku. Eyowa, Ûdi ùcyènza. Ne maalu àdi ènzèkà kaena aMwimanyikaku to, Yêyè neènzè anu mwomumwe ne mwakenzaYe musangu awu amu.

120 Monaayi, nkudi beena kwitabuuja Bende kutuYe ujaadikila Dîyì Dyende. Ûdi mwa kujaadikila Dîyì Dyende anu...kî nkudi beena bupidya to, anu kudi beena kwitabuuja nkutuYe mwa kujaadikila Dîyì Dyende. Nansha bakwabo abu balake mukana bamba muvwabo beena kwitabuuja: “Kaa, mêmè's ndi mwitabuuje, mwaneeu!” Nwamonu's, pawikala mwitabuuje, Nzambi neajaadike ne mmwômò, bwalu tudi tutangila tumona bakwabo. Tudi mwa kwamba bishi, pa dîbà adi? Nwamonu's, anu kudi beena kwitabuuja balelela nkutuYe ujaadikila Dîyì Dyende; kî nkudi aba badi *bamba* ne badi biitabuuja to, kadi

nkudi aba badi biitabuuje biitabuujiemu. Nkudi bânà Bende badi biitabuuja kudiYe ujaadikila Dìyi Dyende.

¹²¹ Mpindyewu, yêyè uwwa ne beena kwitabuuja. Musùmbà wa kale wùkaavwa mumane kufwa, beena bupidya bàvwà bamba ne: “Katwena mwa kubwangata to” abu, Yêyè kulekela muntu ne muntu wa kudibo ubutuka (bwa cinyi?), muntu ne muntu wa kudibo pa kuumusha beena kwitabuuja. Baakashaala mbanganyi? Mòsà ukaavwa mwangaciibwe mu Butumbi. Ne beena bupidya bakaavwa babutuke mu cipeela, ne aba bavwa mbânà baabo balela. Kuvwa anu babidi bavwa basabuke, ne ki bavwa beena kwitabuuja, Yoshuwa ne Kaaleba. Bôbò abu ki bavwa beena kwitabuuja, bôbò ki bàkasabukà. Mushindu awu ki umwepele udi Nzambi mwa kucyenza, nku bânà Bende beena kwitabuuja. Nudi nwiitabuuja nanku anyi? Eyo. Beena kwitabuuja Bende ki bàakacyènzà. Wakakwata naabo bôbò mudimu bwa kusabukabo naabo. Nwamonu anyi?

¹²² Mpindyewu ndi muswe bwa numone ne, Yêyè utu ucyenza mushindu awu mu cikondo ne cikondo cyônsò. Ùtu ucyenza dîbà dyônsò ku ngenzelu umwèumwè awu, bikengela Yêyè kwangata beena kwitabuuja. Ne pathiishe, bwa kupeta beena kwitabuuja bwa kukumbananganabo ne Dìyi adi, bivwa bikengela kwikaleYe mudyanjile kucilongolola bwa ciine cikondo aci. Nudi nucimona anyi? Bikengela kwikaleYe mudyanjile kulongolola bwa cintu eci kwikalaci kwòkò bwa kukumbananganaci ne kadyombo kaa ciine cikondo aci. Aci ncinupete anyi? Ncinubwele anyi? Nudi bacimone anyi? Nudi nucyumvwa anyi? Cyôci aci ncidi munkaci mwa kwenzeka leelu ewu, Yêyè mmudyanjile kucilongolola ku eci, ku didyanjila-kumanya Dyende. PaakadyanjilaYe kulongolola, mu Maalaki 4, cidi ne cya kwenzeka. PadiYe ulwa ne udyanjila kulongolola cintu kampanda bwa kwenzekaci mu Dìyi Dyende, bivwa bikengela kujaadikaYe ne Dìyi Dyende didi nanku. PadiYe udyanjila kulongolola cintu kampanda bwa kwenzekaci ne wamba ne necyenzeke, Yêyè mmumanye ne dimiinu adi nediikaleku anu pa diine dîbà adi mene. Yêyè wakadyanjila kulongolola Mukajimusela, Yêyè awu awu's neikaleku! Nekwikale Dyambwibwa, Dyôdi adi's nediikalèku! Ùdi ùdyànjlila kucilongolola ku didyanjila-kumanya Dyende. Nwamonu's, kakwena cintu nansha cimwe cyàciimanyikà to.

¹²³ Paakabambila Nzambi ne: “Mpindyewu, Ndi nnupa mulayi wa buloba bulaya. Nkaavwa mwambile tatwènù, Abraham ne, bânà bende nebasombe muneemu emu munda mwa bidimu nkama yinaayi.”

¹²⁴ Mpindyewu, Mòsà wakamba ne: “Mêmè ndi muprofeta wa Mukalenge. Mpindyewu tangilaayi numone cîndi ngamba mu ciprofeta eci. Cyôci cyenzeke, pa dîbà adi nenumanye ne ndi mutumiibwe kudi Mukalenge, bwalu nudi bamanye ne Nzambi ukaavwa munwâmbile cyôci aci. Mpindyewu,

mpindyewu mêmè mwambe ciprofeta bwa *cikampanda* ne kwenzekaci, ne *cikansanga* ne kwenzekaci, ne *cikankenga* ne kwenzekaci, musangu wònsò anu bya mwomumwe, mpindyewu nudi numanya ne ndi mutumiibwe kudi Mukalenge bwa kunwambila. Mpindyewu, kudi buloba bulaya, budi Nzambi mulaye. Nwamonu anyi? Ne Nzambi ngudi mulaye buloba bwine ebu. Mpindyewu, mbuloba bwîmpè, budi mabeele ne bwìci bituuta nkoka. Ndondaayi.”

125 Nenu pavwabo bapatuka baya mu cipeela muvwaye ne cya kwenza lwendu, bwa kuyaye naabo mu cipeela, mwine amu, Nzambi kumwambila bwa kwalukilaye naabo ku Mukuna wa Sinaayi, pa dîbà adi Nzambi kutuulukaye kumpala kwa Izaleela mujima, ne Dikuñi dya Kapyà, ne kushindikaYe ne civwa Mòsà mwambe aci, civwaku, mwikale ujaadika ne civwa cya dya bushuwa, mwikale ushindika Mòsà mwaba awu ne: “Mòsà mmwambe ne Mêmè mvwa pa mukuna ewu, Mvwa mumumwenekela mu mmwenekelu wa cipuka cilakuka kapyà. Nenu mpindyewu Ngateemesi mukuna mujima kapyà.”

126 Bòbò kwamba ne: “Aci! Nzambi kaakulu to, Mòsà yèyè akule. Netubutuke.”

127 Yèyè kwamba ne: “Ncya—Ncya—Ncyakwenza kabidi nùnkù to. Nêmjàjudilè muprofeta, yèyè awu ne—neakule naabo mu Dîná Dyanyi.” Nenu ki cidiYe wenza, menemene anu mushindu udiYe ukwata mudimu ne Dîyì Dyende.

128 Monaayi, pashiishe, bààkabèngà kwitabuuya abu, paanyima paa bafike pabwîpi menemene ne buloba bwakabengabo kwitabuuya abu. Mpindyewu, nwênù badi bafunda maalu, fundaayi Ebelu 6, anu mwaba ewu mene udibo bambe ne: “Aba bààkakenkeshiibwà musangu kampanda, bààkavwijiibwà baabanyanganyi baa Nyuma Mwîmpè abu; bu mudibi ne, nebadishinde, bwa kudyalujululabo bòbò biine cyakabidi ku kanyinganyinga; bu mudibo bapoopela cyakabidi bwabo bòbò biine Mwànà wa Nzambi pa nkuruse, biikale baMuzanjika ku bundu bwa patooke; kabyena mwa kwenzekaku bwa bòbò abu kusungidiibwabo to.” Nwamonu’s, anu nanku kabidi kabiyi anu mwa kwenzeka bwa bòbò kusabuka kuya mu buloba bulaya abu to.

129 Bantu balwa too ne ku Dibatiiza dya Nyuma Mwîmpè, nebalwe too ne ku Dîyì, bapicile too ne mu mangumba ònsò, ne ekeleeziya yònsò, ne tuteshismu twònsò, ne bintu byònsò, kadi pakaadibi bikafika ku Dîyì adi, mukàlù awu, badi bamba ne: “Kaa, mêmè ncitu mumanye bwa Aci to, wanyi ekeleeziya katu uCilongesha mushindu awu to.” Cidi webe ekeleeziya ulongesha nansha ciikale cinyi, Bible ngudi wamba ne Cidi mushindu awu. Pashiishe wèwè udi wamba ne: “Mmunyi mûngààmanyà ne nCilelela?” Yèyè udi ucishindika, ne ucijaadika!

¹³⁰ Mpindyewu, Bible mu dituku adi, wakamba ne: “Kudi buloba bwimpè dyamwamwa, bwikale anu bûle tente ne mabeele ne bwîci, ne tumuma twa mvinyo tulenga be ne twa grenades, ne, kaa, s’mmwaba mulenga mulaya.”

¹³¹ Ee, bôbò kwamba ne: “Mpindyewu, bamwe bàà kunùdi bânjì bādifindèbi bàye bàkeelèmu dîsù tǔng, kadi bààlukilè, bwa twamona mwa kusambaku bantu aba. Tukaadi pa kusabukamu dyakamwe mpindyewu, panwikala nwênù bônso nuciitabuuja.” Ee, ki bôbò bayaaya baba.

¹³² Ki bôbò badi baalukila aba, kaa, babidi baa kudibo, biikale anu beela mbila ne: “Ee, Nzambi atumbe’s we! Twabumonwee! Twabumonwee! Kaa, s’mbulenga bulaya, kakwena cintu bu bwôbù abu to!” Bakwabo abu, baa ku dikumi bàvwà kacya anu biimana eku ne eku abu, bamba ne: “Kaa, to, to, to, to, katwenaku mwa kucyenza to.” Bààkasabukà bavwa banga? Babidi abu’s! S’ncyà bushuwa. Babidi abu, bwalu bavwa bamanye ne Nzambi uvwa mwa kujaadika ne Dìyì Dyende ndya cya bushuwa. Monaayi, ní Yadene mùle, to mukalenge, ní myelelu ya Yadene mmibwikila kudi màyi, anyi ní bantu baa mpolondo baa mu Kaanaana kî mbafwanyine kubiimanyika to. Nzambi wakajaadika Dìyì Dyende ne divwa nanku, Yèyè wakabangata e kubabwejaye mu buloba abu.

¹³³ Yèyè neenzè cyakabidi cintu cimwecimwe aci, eyowa’s, mukalenge, mu milayi ya leelu ewu. Ûdi ujaadika Dìyì Dyende. Nansha bya munyi, Yèyè udi ujaadika Dìyì Dyende.

¹³⁴ Yèyè dituku dikwabo wakiimanyika mukana mwa nyama ya ntambwe midi ya bantu miikale ne nzala, bwa kujaadika ne Dìyì Dyende divwa dilelela, bwa ne Yèyè uvwa mwa kusungila, kudi Danyeke muprofeta. Paabu’s bavwa balame ntambwe ayi biikale bayidiisha minyinyi ya bantu. Ki kulamabo ntambwe ayi bwa kwikalayi ne nzala, mu mushindu wa ne muntu yèyè anu mudidinge mumatemu, anyi mwànà, cyónso civwabo mwa kwelamu aci, civwa ndinyooka dya lufu, bwa ntambwe awu kumusunsululaye tusunya tusunya, musùmbà wa ntambwe yìvwà ne nzala eyi. Ki kwangatabo muprofeta ewu, mwikale ne Dìyì dya Mukalenge bwa bânà baa Izaleela, mwine uvwa mwambe mu ciprofeta ne nebangate mwaba awu awu. Kadi ki yèyè awu naayi’s. Kadi Nzambi kavwa mwanji kujikija ne cyôci aci to, Ûvwa muswe kujaadika Dìyì Dyende, dya ne Yèyè uvwa mwa kusungila. Ki bôbò kushiya ntambwe ayi ne nzala, kadi kwelabo muprofeta awu mwómò, ne yôyi kunyeemanyì lubilu mushindu awu mitangile kùvwàye. Dikunji dya Kapya adi diimane mwaba awu, (kadi nyama yónso ewu utu uciina kanya), Dikunji dya Kapya adi diimane mwaba awu, ntambwe kulaalayi panshi. Yèyè wakashaala mukwate ku Dìyì Dyende. Yèyè udi umwèumwè awu makeelela, leelu, too ne kashidi. Nzambi utu ushaala mukwate ku Dìyì Dyende, Ûtu ucijaadika, Ûtu ujaadika ne Didi nanku.

135 Mpindyewu, Yèyè wakuumusha luuya lwa kapyà mu ndimi ya cikutu cya kapyà aci, bwa kujaadika ne Dìyì Dyende divwa nanku, bwa ne Yèyè uvwa mwa kusungila ku kapyà. Anu mene munkaci mwa ndimi ya kapyà ayi, mwàkeediibwà bàrà abu amu, ne mwakashaalabo mukùngùlù mule amu, pavwa mene bantu bavwa babakupemu abu, luuya lukolàkòlààyi lwa—lwa cikutu cya kapyà alu lushipe basalaayi banene bavwa babalomboleku abu. Ki Nzambi kulekela kapyà aku kateema anu kuteema, kadi kuumushaYe luuya lwaku. Utu ujaadika's! Wèwè wimana ku luseke Lwende, Yèyè neimane ku luseke lwebe. Wimana ku luseke lwebe? Ee, s'ncyà bushuwa! Paanyima paa dîbà dijima, kukangulabo ciibi, kwambabo ne: "Ambaayi tûng, bantu banuvwa beele muntu mwamwa bavwa banga, twamb'eku twamb'eku?" Yèyè ne: "S'nyewu tumona basatu batuvwa beelemu abu." Yèyè ne: "Mukaadi banaayi, ne umwe wa kudibo mufwanangane ne Mwânà wa Nzambi." Nwamonu's, Yèyè utu ulejea's! Mbwa cinyi abu? Yèyè udi Dìyì.

136 Ne bôbò bakaavwa bambe ne: "Nzambi udi ne bukole bwa kutusungila ku cikutu cya kapyà aci, kadi, nansha nanku, twètù katwakwinaminaku nansha lupingu kaayi to, bwalu tudi biimane ku luseke lwa Dìyì." Lupingu nansha lwa mushindu kaayi, mmwenekelu kampanda wa ntendeleelu, semeena kule nende. Nzambi neimane ku luseke lwebe. Yèyè neumushe luuya lwa dikengeshiibwa. Neumushe mwo—mwoyi udi mu kansere awu. Yèyè neumushe... Neenzè nî ncinyi cyônsò; Yèyè udi Nzambi. Ikala mwimane ku luseke Lwende; Yèyè neimane ku luseke lwebe. Yèyè utu ujaadika ne Dìyì Dyende ndilelela, dîbà dyônsò. Yèyè kuumusha luuya lwa ndimi ya kapyà ayi, kukanga mukana mwa nyama ya ntambwe, ne bikwabo.

137 Cikwabo cintu cyàkenzà Nzambi ncyôci eci, bwa kulejea ne Yèyè uvwa Nzambi. Bantu kufikabo mu mushindu wa ne, paanyima paa mu cipeela amu, bakaavwa benda bashaala bôbò biine baa mamanya matwe ngwengwengwe, biikale badivwija bantu banene. Bakaavwa ne malongolodi kampanda abiikidiibwa ne m'Bafaalesa, Basadoka, beena Heloode, ne bikwabo nî mbya bishi apa. Nenku bakaavwa bantu banene. Kuvwijanganabo baakwidi ewu ne ewu. Ne baakenza bintu binene bya mushindu awu, kuvwijangana baakwidi banene ne bantu banene, ne bantu baa myânzù mitumbuke ne bikwabo.

138 Kadi Nzambi, munkaci mwa biine byônsò abi, kujuulaYe muprofeta, mwânà wa mwakwidi kampanda. Kacya... kuyaye mu cipeela pavwaye ne bidimu citeema. Kayi mumanye nansha mwa kubala dînà dyende, nansha bu dyôdi mwa kwikala difundiibwe ne maleeta bunene bwa dikaadika. Bwa cinyi, wakenza nanku bwa cinyi? Ûvwa muprofeta. Bu ne ùvwa mulongeshiibwe mu tulaasa mwakalongela tatwëndè amu, pàmwàpa ùvwa mwa kwikala Mufaalesa anyi Musadoka, anyi umwe wa ku bisumbu byabo abi. Kadi yèyè uvwa ne

mudimu wa mushinga munene, ùvwà ne cya kumanyisha Maasiya kumpala kwa bantu. Bwa cinyi bwine? Nzambi wakashaala mukwate ku Dìyì Dyende, ne wakaciijaadika. “Dìyì dya ewu udi wela lubila mu seminere ne: ‘Monaayi, mèmè ngàkwàci dipolome dya docteur’” anyi? Aci kaayi’s—aci kaayi’s ncifwanyine kusanganyiibwa mu Kabala-matuku kaa Mufikilu wa dilediibwa dya Baamandamu Bakulakaji, kadi kî mmu Dìyì dya Nzambi to. Yèyè wakamba ne: “Dìyì dya ewu udi wela lubila mu cipeela ne: ‘Longololaayi njila wa Mukalenge, ne lulamijaayi tujila Twende!’” Yèyè uvwa ulongolola pa dībà adi njila wa Dìyì, bwa Dìyì kumweneshiibwadi anyi? Aleluuyah!

139 Kanwenaayiku numona, mu mindidimbi anyi? Imanaayi ndambu kaaba aka. Mu matuku a ndekeelu, bivwa bikengela kwikalaku mwaba mulongolola bwa Dìyì kumweneshiibwadi, ne patudi twakulangana apa tudi ne mwoyi ku cileeji cya Buloba bupyabupya, amen, Mwànà wa muntu.

140 Mudimu mutuma naawu Yone, kayi ne kalaasa kalonga, kayi cinyi, wakashaadila mu cipeela. Ende mayiisha avwa mu bifwanyikijilu. “Cisuuyi nciteekiibwe ku muji wa mucu,” ki civwaye yèyè umona’s. Ùkòsa ne cisuuyi, wenza kaamutàndà kende, uteemesha mudilu bwa kuteemesha nkunyi yende. “Kaa, nwènù lukongo lwa nyoka,” ki civwaye umona’s. Cintu cya citambe bukooya mwitu, bwende yèyè, mu cisuku, civwa nnyoka. Yèyè kwamba ne: “Nwènù lukongo lwa nyoka, nganyi wanudimwiji bwa kunyeema ciji cikole cilwalwà? Kanwikadi nwâbanga kwamba ne: ‘Tudi ne *cikampanda*, ne tudi beena *cikansanga*, ne tudi beena *cikankenga*’ to, Nzambi udi ne bukole ku mabwe aa bwa kajuudila Abraham Bânà. Cisuuyi nciteekiibwe ku muji wa mucu, ne mucu wònsò udi kawuyi ukwama mamuma mîmpè awu. . .” Ncinyi cidiye wenza mu cipeela amu paabengawu. . . paamupatwilawu mikumbi ya lokuseta ne bikwabo, s’udi uwupula ne uwosha. Nwamonu anyi? “Yèyè neasangishe blé amwele mu diyeeba, kadi bisote, Neàbyòshè mu mudilu udibo kabayi mwa kujimaku to.” Muntu bu nanku awu, kayi nansha muvwale muzabi wende wa bunsaserdose to, kayi nansha ne kafulu kaa baakwidi kaa cijengu aku ku mutu to. Nwamonu anyi? Wakalwa mudijingile cipese cya ciseba cya mukooko, ne cipese cya ciseba cikosa paanyima paa kaameelu, mudijingileci, kadi kupatuka kwaka ne myedi ne nsuki bijingakane mushindu awu, wamba ne: “Cisuuyi nciteekiibwe ku muji wa mucu.” Amen. Yèyè wakalwa, ne dikima dyònsò. Bwa cinyi? Civwa n’Dìyì dya Nzambi diikale dijaadikiibwe ne: “Nzambi udi ne bukole bwa ku mabwe aa!” Nzambi ngukaavwa mucilaye ne: “Monaayi, Ndi ntuma musanjeela Wanyi kumpala Kwanyi.” Kaciyi cijaadiki cya citambe kwikala cya ntendeleelu, kaciyi cya maalu a mamanya anyi cya ntendeleelu to, kadi cijaadiki cya Dìyì dya Nzambi. Nzambi uvwa munkaci mwa kushaala mukwate ku Dìyì Dyende,

nwamonu's. Kayi nansha mumanyi wa dibàla mwine to, kadi muprofeta, mutumiibwe mu Dìna dya Mukalenge. Yêyè wakenza nanku, bwa cinyi? Bwa kushindika Dîyì Dyende.

¹⁴¹ Mpindyewu, baakwidi abu bavwa bôbò bamba ne: "Mpindyewu, tudi bamanye ne kudi kampana udi ulwa mu matuku a ndekeelu, pa nanku netulongeshishe mwânà wa balume yônsò utudi nende kalaasa, bwa kudilongolola ku cyôci aci. Bikengela bwa yônsò wa ku nwênù bânà baa balume ikale mulonge tulaasa tutumbuke. Nudi ne cya kulwa muneemu emu. Kakuyi mpatà to nebiikale mu ndelanganyi, neavwile anu mu njila wa beena Lewi, bwalu ki kudi bwakwidi bufumina." Kadi yêyè kavwa mwakwidi to, ùvwa muprofeta! Ne cyôci ciine citu ku disungula dya Nzambi. Kabyena bikengela bwa kufuminaye ku dingumba kampana anyi ndelanganyi kampana nansha. Ndisungula dya Nzambi, ku didyanjila-kulongolola, didyanjila-kumanya. Yêyè udi ulwa bilondeshile mushindu wa disungula dya Nzambi. Pa nanku bôbò kabavwa bafwanyine kumwitabuja to, bwalu kaakalwa bilondeshile njila uvwabo bôbò basebele to, uvwabo bôbò badyelela meeki ne neavwile awu. Aci's ncifwanyine kwenzeka cyakabidi, nudi bamanye's, citu anu cyenzekenzeka pa ciibidilu. Kadi tudi tusangana ne yêyè wakalwa bilondeshile njila uvwa Nzambi musebele, bwa kujaadika Dîyì Dyende.

¹⁴² Monaayi, Yêyè wakenza ne virgo imite difu, bwa kujaadika Dîyì Dyende. Yeshaayi 9.6, kabidi tudi tusangana ne: "Mbatulelele Mwânà wa balume, mbatupe Mwânà." Mpindyewu, tudi tusangana ne Yêyè uvwa mwambe ne virgo uvwa ne cya kwimita difu. Ki Nzambi kwenza ne virgo imite difu. Cinyi? Bwa kujaadika Dîyì Dyende. Mpindyewu teelejaayi anu ndambu wa tusana tukese cyanaana, netwikale mwa kwoya. Yêyè wakenza ne virgo imite difu, bwa kujaadika Dîyì Dyende. Aci civwa kakuyi mpatà... Cyakabwikidija beena mamanya bônsò mukana. [Katupa kaa mukaba wa mêyi munda mutupu—Muf.]... bwa kuya.

¹⁴³ Bwa aci kaayi nwacyūmvù, kî mmwômò anyi? Nwamonu's, buloba mbwediibwe mulawu. Buloba bujima mbwediibwe mulawu, bwa mpekaatu wa Adama. Kadi pavwa kaadimiinu kakese aka... Mpindyewu, mukaji katu ne dimiinu nansha. Yêyè udi ne budimi budi dimiinu disômbela, kacyi dimiinu to, bwalu kamwena civuba to, bikengela civuba ciikale... bikengela dimiinu diikale ne mwoyi munda mwadi. Kabiya nanku to, cidi anu cintu cyanaana, mwoyi kawenamu to. Pa nanku dimiinu ditu mu mulume. Ki bwa cinyi dimiinu dya nyoka divwa ne cya kwikala munda mwa mukaji, nwamonu's, bwalu kacivwa dimiinu dya Nzambi to. Bwa aci tudi bamanye. Nansha bishi, indilaayi too ne panwapeta mukanda ewu ne panwawubala, nenku pashiishe nenu—nenumone, anyi mnuleeja anu ku Mifundu cyanaana, kukangula anu cintu cyônsò mu

kaabujima anu bya mwomumwe ne dibatiiza dya mu mâyi mu Dîna Dyende, numone ne bidi bishi. Nzambi kacya katu mutupakane nansha, Ûtu misangu yônsò anu mu bulelela. Nansha wêwè kuyi mwa kuCyumvwa to, ùCitàbùùje nansha bishi. Nwamonu anyi? Cidi anu Bulelela bwa menemene.

¹⁴⁴ Nenku mpindyewu tudi tusangana ne Yêyè—Yêyè nguvwa mwambe cyôci eci, kucifikishaYe ku dyenzeka. Mpindyewu, dîbà divwa kaadimiinu kakese aka, kakuyi muntu to, kabwele mu kaadiyi kakese mu budimi buvwaYe mufuke abu, pashiishe kaadimiinu kakese aku, kaacivuba kakese aku kenda kadikoka too ne mudiku kakabwela mu diyi adi, nenku kaamukila kakese aku kadinyonda apa ne kabanga kukola kalwa kabulu ka mashi ne kakwabo kabulu kaa mashi, kiikale ne mwoyi ku mwoyi wa maamù, mubidi wende, nenku mwômò amu udi ukadiishila ku musulu wende wa mashi. Nenku tudi tusangana, mpindyewu ne, yêyè ngudi ukadiisha; kacyi mashi a mwânà to; mmashi a maamù. To, kêna ne tuumashi nansha tukese twa kudi maamù to. Kadi udi udiila ku bintu bya vitamines bidi bifumina kudi maamù, kadi kî mmashi a maamù to. Mwânà mmuswikiibwe yêyè yônsò mu dibuki dya mashi a maamu, bwa kumulama ku mikumu ne bintu bya mushindu awu, ne mâyi, kadi kêna ne tuumashi nansha tukese twa maamù to. Maamù udi mwa kwikala ufwa dîsaamà dya cyâdi, ne dilediibwe kudi mwânà awu; kêna mwa kudipyanaku to, bwalu disaamà dya cyâdi nkishi, didi divwila mu musulu wa mashi. Kadi maamù udi mwa...mwânà udi mwa...Dîsaamà dya cyâdi kadyena dipyanyiibwa to; bwa mateketa kaayi eyo, kadi disaamà dya cyâdi to, bwalu bidi bikengela apete mweyelu wa maamù nenku apete kishi aku, nwamonu's, kumpala kwa kupetaye. Mwânà mmudishikamine anu menemene padiye ulediibwa, bwalu kêna ne mashi a maamù nansha makeke to.

¹⁴⁵ Mpindyewu, tudi tusangana ne Nzambi wakabwela mu kabulu kakese kaa mashi aka, nwamonu's, nenku kubangaYe kuvudija tubulu twa mashi, kukokela ku vitamines ne bikwabo bivwa maamù Wende udyà abi. Pashiishe paakalwaYe kukola mu cipimu cikumbane cya kuDidiila, ki kubangaYe kudya. Nenku ncinyi aci? Cidi—cidi ndupwishi lwa buloba's, lûdi upetela ku mwoyi wa bikunyiibwa ne mwoyi wa nyama ne bikwabo, ne paakabangaYe kudya mishipa ne mâmpà ne bikwabo, abi kubangabi kuvudija tubulu twa mashi. Nenku pashiishe mubidi awu paakabobawu e kupwila mu bidimu makumi asatu, Yêyè kubatiiibwa mu ditumikila kudi Yone kuntweku, anyi kudi Nzambi, mu mâyi, ne kupatukaye. Kadi cyakenzeka ncinyi? Nkuci, uvwa Nzambi awu, utuuluka ufumina mu Dyulu, ne Dîyi dyamba ne: "Ewu m'Mwan'Aanyi munanga, Mwena munda Mûndi musankile bwa kusombela." CivwaYe mulwe kwenza ncinyi? Bwa kupikula citupa cya buloba aci. Yêyè nguvwa cibangidilu cya bufuki bwa Nzambi. Bwalu,

Nzambi kî ncifukiibwa to, anu mu Kilisto ki mudiYe cifukiibwa, bwalu Nzambi ngwa Cyendelele ne udi Nyuma, ne Nyuma katu mufukiibwe to. Yèyè uvwa cibangidilu cya bufuki bwa Nzambi, ki Nzambi kupikulaye mubidi *awu*. Nwamonu's, paakatuulukaYe: “Ewu m'Mwan'Aanyi munanga, mu Yèyè ki Múndi nsankila bîmpè.”

¹⁴⁶ Pa nanku Yèyè, Nzambi, wakatuuluka paanyima paa mumane kupicila mu cyôci eci, nenku mpindyewu mwânà wa balume yônso, paudi udyà ne ulediibwa mu dileediibwa dya mubidi ku disangila dya mulume ne mukaji, mushindu wûdi ulwa awu; pashiishe pakaadibi bikafika ne mmwaba wa upicila ku mâyi a dibatiiza, pashiishe dibatiiza dya Nyuma Mwîmpè, pashiishe Nyuma Mwîmpè upweka ku dibatiiza dya Kapya ne unana cifukiibwa eci, mushindu umweumwe wakaMunanaci Yèyè. Nyuma Mwîmpè ne Nzambi badi Nyuma umweumwe awu. Nwamonu anyi? Ûdi utuuluka ne unana mubidi ewu bwa dibiishiibwa dya ku lufu. Ne Yèyè wakabiishiibwa ku lufu bwa dibingishiibwa dyetu: “Bônso badi Taatù muMpeeshe nebalwe kúndi Mémè, nansha umwe kaakujiminaku to. Némmbiishè ku dituku dya ndekeelu. Nansha lusuki lumwe lwa ku mutu kalwakubutukaku to.” *Aci* ki cibangidilu cya bufuki bwa Nzambi. *Eci* ki ditungunuka dya bufuki bwa Nzambi. *Pashiishe* bikengela bwa buloba bujima bupete dibatiiza. Ne pashiishe Nyuma Mwîmpè upweka mu cimenga kampanda bwa kusòmbela pa buloba, ne tabernacle wa Nzambi mwikale ne bantu, ne usòmba naabo, Nzambi wàsòmbedi mu tabernacle panu pa buloba. Ndongamu mujima wa bupikudi ewu, dibingishiibwa, dijidiibwa, dibatiiza dya Nyuma Mwîmpè, dya mwomumwe anu ne divwàku cikondo aci adi.

¹⁴⁷ Mpindyewu monaayi, Yèyè kwenza ne virgo ewu imite difu, ne mu cyôci eci ki mwakalelaye Mwânà wa balume kayi mumanye mulume to. Bwalu ebu mbubwikidije maalu a mamanya mukana munda mwa bikondo ne bikondo. Bucidi anu bubabwikidija mukana. Pàmwâpa baakaseka Yeshaayi paakaakulaye wamba ne virgo ewu neimite difu ne: “Mpindyewu, ciine aci necyenzeke bishi?”

¹⁴⁸ Ndi ndifwanyikijila, Yeshaayi, didyumvwa dya bundu, paakumvwaye Nzambi wamba ne: “Némbàpèèshè cimanyinu citambidile, Némbàpèèshè cimanyinu cya kashidi, virgo neimite difu.” Mpindyewu, yèyè, mumanya bîmpè munkaci mwa bantu, cisamba cyende, muprofeta, mushindika kudi Nzambi. Mpindyewu paakapatukaye kumpala kwa bangangabuka ne bakwabo, ne diyè edi ne: “Virgo neimite difu.” Nwamonu's, aci kacyakacya kacivwaku cyanji kwenzeka to, kacya anu bikondo byabanga, kwangacila anu ku cikondo cyakafuka Nzambi muntu Wende wa kumpala awu aci. Kadi apa, mpindyewu, aci, mukaji udi pa buloba apa neimite difu. Anjaayi anu kwelaku peenu meeji pa bwalu abu mu bitupa bya dyela dya meeji,

mushindu wakapeta muprofeta awu bundu, kadi yêyè uvwa mumanye ne Nzambi neashaale mukwate ku Dìyì Dyende, Neacijaaadike. Ndi ndifwanyikijila ne, famiye ne famiye yônsò wa beena Ebelu wakalongolola mwanende wa bakaji bwa walela yêyè mwine mwânà awu, nwamonu's, kumusumbilabo tusabaata ne tuubikumba, anyi byônsò bitu bânà bavwala abi, ne tunshesheete twa bânà, ne baakadilongolola bwa—bwa mwânà awu kulwaye. Nkongo ne nkongo kupitayi, kadi Nzambi kujaadikaye Dìyì Dyende!

¹⁴⁹ Ki virgo kwimitaye cya bushuwa, ne kulelaye Mwânà awu, bijaadika ne Dìyì dya muprofeta Wende divwa Bulelela. Yêyè utu misangu yônsò wimana anu ku luseke lwabo. Mwânà wa balume wa virgo ewu uvwa n'Dìyì dimweneshiibwe. (Mpindyewu Yone Munsantu 1, panwikala baswe kubala cyôci aci. Yone Munsantu 1.), muprofeta ewu, ne muprofeta ewu, kabidi. Kadi Mwânà wa balume wa virgo ewu uvwa Dìyì dimweneshiibwe, cibangidilu cya bufuki bwa Nzambi. Mpindyewu, buloba bujima ebu's mbufuki bwa Nzambi, kadi mbujimine. Nwamonu anyi? Pashiishe Yêyè udi upikula buloba ebu. Ne wêwè udi citupa cya buloba, nenku Yêyè udi ukupikula mu mushindu umweumwe udiYe upikula buloba bujima awu. Nwamonu anyi? Mpindyewu, Mwânà wa balume wa virgo ewu uvwa Dìyì dimweneshiibwe: "Ku cibangidilu kwakadi Dìyì, Dìyì dyakadi ne Nzambi, ne Dìyì dyakadi Nzambi. Ne Dìyì dyakandamuka mubidi ne dyâkasòmbela munkaci mwetu."

¹⁵⁰ Sataana wakateeta diyelè ne diyelè dyônsò bwa kuMufikisha ku didyombola ciine eci. Sataana wakateeta kantu ne kantu kavwaye pende mwa kwenza bwa—bwa kuMufikisha ku dicidyombola, uteeta bwa kuMufikisha ku dyangata bukalenge kakuyi dikenga, uteeta bwa kuMufikisha ku dicyangata kakuyi bupikudi (paabi's ki civwa ndongamu wa Nzambi mu budimi bwa Edena paakashipaYe mwânà wa mukooko apu, bwa ne anu ku mashi nkuvwaYe mufwanyine kucyangata), kuMulaya mene too ne makalenge ônsò a pa buloba bu Yêyè mwa kuciitaba. Anji elaayi peenu meeji bwa mulayi bu nanku!

¹⁵¹ Kanwenaayiku nufika ku dyumvwa, nwênù balunda baanyi bananga baa mushinga mukole, ne mu kasunsa emu, Sataana udi ukwenzela mulayi wa ne . . . neakuvwije umwe wa ku bambi baa batambe bwîmpè mu nsangilu awu. Neakupe nkwaswa wa kumpala kwa mulongo mu ekeleeziya yônsò ne ukuvwija mulami. Yêyè's neénzè nî ncinyi nî ncinyi cyônsò, bu wêwè anu mwa kuumuka ku Dìyì edi.

¹⁵² Mpindyewu monaayaaku, kadi kwenzaye bwa ne cyônsò . . . kuMupeeshaye buloba ne makalenge ônsò, bwa Yêyè kuàngata. Civwaye ukeba nkuMufikisha ku dinyangakaja dya Dìyì adi, bwalu ùvwa mumanye ne ùvwa uMubakula anu mwaba awu bu yêyè ne mushindu. Wakafikisha Mòsà ku diDinyangakaja, wakafikisha Eva ku diDinyangakaja, kadi bwa ewu musangu

ki kutwilanganaye ne Mwabilaayi uvwa kayi wa bya nanku to. Bwa cinyi? Yèyè uvwa Díyì, kadi kavwa yèyè mucimanye to. Yèyè uvwa Díyì adi, Yèyè mwine.

153 Ndi mwa kumumona. Tudi baswe kudifwanyikijilaye mu mushindu kampana wa dizola dya bânà batekete. Ndi mwa kumona mapwapwa manene a kale mafiike awu apaapala bwa kulwisha Èva, wamba ne: “Mpindyewu, nênkwambilè mudi bwalu, s’ncilenga kumona. Bikengela wèwè kwanji kuciteetaku’s.”

“Kadi’s Nzambi mmwambe ne, twètù badye, netufwe.”

154 “Kaa, ee, bulelela kanwakufwa to. Wamonu anyi? Kaa, aci’s ndukutukutu. Awu’s mmwenenu wa muntu wa meeji a cyena kale. Kwitabuujiku nansha cimwe to.” Kadi Nzambi’s uvwa mwambe nanku! Nzambi wakajaadika ne ncyà bushuwa. Ne Yèyè udi munkaci mwa kucijaadika ne ncyà bushuwa anu patudi twakulangana apa, bantu kadi’s ki kufwabo eku mu kasunsa emu. Yèyè uciadi anu ujaadika ne ncyà bushuwa.

155 Monaayi, ne paakalwaye kudi Mòsà, wakamba ne: “Mòsà, s’udi mumanye ne wèwè ewu udi ne mutu mukole.” Hmm. “S’utu ne cijì cikole wèwè ewu. Anji tangila umone cidi musùmbà wa bantu bapidye diitabuuja baba benze, wamonu’s. Bwa cinyi kuyi upweka anu kuntwaku bwa kubambilaci anu menemene?” Ki kuyaye.

156 Kadi mmwenze anu ukalenga ku Nshinga wa nzembu ya volts binunu dikumi ewu anyi, Yòyì kumwosha masala paakalwaye lubilu bwa kuMulwisha. Yèyè kwamba ne: “Kaa, teejeja,” yèyè ne, “nênkupè Wèwè makalenge ònsò.”

“Baakafunda ne!” Nwamonu anyi? “Baakafunda ne!”

157 Kwambaye mpindyewu ne: “Wèwè ne udi Mwânà wa Nzambi.” Nwamonu’s, yèyè utu anu uCyela mpatà misangu yònsò. Ûcitu anu ulongesha bakwabo bwa kuCyelabo mpatà. Wakalongesha Èva bwa kuCyelaye mpatà, wakalongesha Mòsà, wakalongesha bakwabo bònsò bwa kuteetabo kuCyela mpatà.

158 Nyawu unulongesha bwa nwènù kuteeta kuCyela mpatà. Ne nwènù badi basòmbe mwab’ewu mpindyewu aba, panwikala baswe bwa mèmè kunuteela mu mènà, ki mutubi, Sataana udi uteeta kukaadi ntanta bwa nwènù kungeela mèmè mpatà. Kanwenji nanku awu to. Mwaneetu wa bakaji, wèwè mwenze nanku, ee, wèwè. . . anyi, kî mmèmè to, kadi anu kwela mpatà cyanaana. Itabuujayi nwènù anu Díyì edi. Kabyena bikengela bwa nwènù kungiitabuuja mèmè to, kadi itabuujayi Eci. Nwamonu anyi? Pàngìikalà ngamba Díyì edi, kî n’Dyanyi mèmè to, n’Dyende Yèyè. Dyanyi díyì mèmè ndishiilangane, kadi Edi n’Dyende Yèyè. Nwamonu anyi? Monaayaaku mpindyewu, monaayi. Ncyèna muswe kubwela mu aci mpindyewu mene to.

159 Monaayi, mulayi, Mèyì Ende ònsò, kakuyi mpatà to mmalelela. WàkaÀjaadika. Wakajaadika, bwalu Wakajaadika ne Yèyè ki uvwa Dìyì dilelela. “Muntu kaakwikala ne mwoyi anu ku dyàmpà nkaayaadi to, kadi ku Dìyì dyònsò didi dipatuka mukana mwa Nzambi.”

160 Ncinyi, yèyè udi ne mwoyi bishi? Nku ne: “Ee, bu wèwè mwa kwangata anu ndambu naka wa Dìyì dya Nzambi, yèyè neikale ne mwoyi” anyi? Mpindyewu, aci kî ncyakambaYe to. Nukaavwaku bamone, d-y-ô-n-s-. . . “Dìyì dyònsò” anyi? Yèyè udi ne mwoyi bishi? “Kaa, yèyè utu udyà mwamwa naka” anyi? To, yèyè ufawfa ne lukasa lwònsò. Aci’s mmusunya. “Ee, yèyè, kaa, yèyè’s utu mwena ekeleeziya. Utu witabuuja byònsò pa kuumusha Aci” anyi? Yèyè’s uci di mufwe. Nudi nucyumvwa anyi?

“Yèyè udi mwa kwikala ne mwoyi anu ku Dìyì dyònsò didi dipatuka mukana mwa. . .” Mwakwidi munene, mwepiskopo, kardinale, mpaasata anyi? “Nzambi! Dìyì dyònsò didi dipatuka mukana mwa Nzambi.” Mmuni mutudi tumanya ne n’Dìyì dya Nzambi? Yèyè udi wamba nanku, pashiishe Yèyè uCijaadika. Yèyè udi ujaadika Dìyì Dyende. Monaayi dîbà adi, byòbì nanku, dîtonda dyebe kadyakwenzaku ne wikale ne mwoyi to. Kwikala kwebe kwa bu cidimba cya ekeleeziya kakwakwenza ne wikale ne mwoyi to.

Monaayi, ku Dìyì Dyende nkaayaadi, kî nku Dìyì dimwe cyanaana diteeka pa kaaba kaa cyanaana to. Muntu nansha umwe kaakwikala. . .Dìyì dimwepele ndishipe bukwabantu bwònsò nkòng. Mu Bible, mu Bwakabuulwibwa 22, dîyì dimwepele nediikale anu mwa kushipa cintu cyònsò nkòng, dîna dyende nedyumushiibwe ku Mukanda wa Mwoyi. “Ewu yònsò wadidinga kusakidila dîyì dimwepele, anyi kuumushila Dìyì dimwepele awu.” Dìyì nansha dimwe! Kî. . . To, ndi muswe kwamba ne, kî—kî mmèyì abidi to, dîyì dimwepele cyanaana! Kî ncyambilu cimwepele to; dîyì dimwepele! Dìyì dimwepele! Kaa, balumyana wa yaaya, nudi numvwa anyi’s?

161 Mpindyewu, bândi ngambila menemene kî ng’anu aba bateeleji to. Eci cidi cikiwaciibwa pa mikaba ya mèyì, nudi numona’s, ne Ciyaaya pa buloba bujima. Nudi bumvwe anyi, nwènù bantu baa pa buloba bujima, ne Dìyì dimwepele, Dìyì dimwepele, kî ncyambilu cimwepele to, kî nkasaka kamwepele to, Dìyì dimwepele, ki cyònsò cyakabenga Eva kwitabuuja ncyòcì aci. Kutwalaci. . . Nzambi wakacijaadika. “Kadi pa dîbà adi nwènù balame Dìyì dyònsò, nenwikale ne mwoyi.” Bakeela Dìyì dimwepele mpatà, kutwadilaci bukwabantu lufu. Kadi muntu kaakwikala ne mwoyi ku dyàmpà nkaayaadi to, bwa dikanda dyende dya mubidi, kadi ku Dìyì dyònsò, Dìyì dyònsò anu mudiDi difundiibwe amu. Bible udi wamba ne: “Kadyena dya muntu udyumvwijila paa nkaayende to.” Muntu nansha yèyè wa mwaba kaayi, nansha bamwamba ne nganyi, kuteeta

kuumvwija kantu nansha kamwe kaa Dìyì dya Nzambi. Nzambi m’Mudyumvwijidi wa Yèyè Mwine.

¹⁶² PaakalayaYe, Wakamba ne: “Bukènkè bwikaleku,” ne bukènkè bwakiikalaku. Wakamba ne: “Virgo neimite difu,” ne wakiimita. Nwamonu’s, cyònsò cidi Nzambi wamba aci, Nzambi udi ucijaadika.

¹⁶³ Nansha mùdì mufwanyine kuteeta kudyambidila ne dibiika dya ku lufu dya mubidi ewu kî ndifwanyine kwenzeka amu, ne bantu badi dyamwamwa baba, bashaale anu lupwishi lwa buloba, ne bapite ne pa lupwishi mpindyewu, bôbò’s mbabwele anu mu ma-acides ne ma-gaz mwakapatudiibwa mibidi yabo amu. Misuuka yabo yicidi anu ne mwoyi. Nzambi mmwambe ne: “Nènyìjuulè.” Yobo wakamba ne: “Nansha misanda ya dikoba mibutule mubidi ewu, nansha nanku mu musunya wanyi mèmè nèmmone Nzambi.” Nwamonu’s, nansha bishi, Dìyì dyònsò didi ne cya kulamiibwa, ne muntu neikale ne mwoyi ku Dìyì adi. Yèyè wakabiisha muntu ku lufu, mumane kufwa kukaavwa matuku anaayi, bwa kujaadika ne Yèyè nguvwa dibiika dya ku lufu ne Mwoyi. Pàkaavwà muntu mumane kufwa matuku anaayi ne mubange kununka, dyùlù dyende dikaavwa dimane kubèètelela mu matuku anaayi amu. Neya bushuwa. Cintu cya kumpala cidi cibèetelelà, mu muntu, ndyùlù, dibuyika pa citalu apu, dishaala difinunuke ne diikale dibuyika. Pashiishe dikoba, bìshiishi, wèwè. . . Bakwela mu musheete wa bafwe mukanga ndendende, nansha cifwanyine kwikala cinyi, kadi nansha nanku misanda ya dikoba kabyena bikengela yifumine mu buloba to, yidi mu wèwè amu. Nukaavwaku bamone anyi? Yobo mmwambe ne: “Nansha misanda yanyi—yanyi ya dikoba mimbutule.” Kî mmisanda ya mu buloba to, kî mmifwanyine kwikalamu to. Ayi misanda yidi mu wèwè amu, midilongolole bwa kukubutula, lufu munkaci mwa kukwata mudimu mu mubidi webe wa cifwaka awu. Kadi paudi mupete Kilsto, pa dîbà adi Mwoyi ngudi ukwata mudimu mu mubidi webe wa cifwaka awu, bwa kukubiisha cyakabidi ku lufu. Nwamonu anyi? Yèyè wakabiisha muntu ku bafwe, paanyima paa yèyè mumane kufwa matuku anaayi, “ukaadi ununka,” bwa kujaadika paakambaYe ne: “Mèmè ndi dibiika dya ku lufu ne Mwoyi.” Mpindyewu, nganyi udi mufwanyine kwamba cyôci aci pa kuumusha Nzambi, nwamonu’s: “Mèmè ndi dibiika dya ku lufu ne Mwoyi. Ewu udi ungiitabuujà Mèmè, nansha byòbì ne mmufwe, kadi yèyè neikale ne mwoyi.” Nudi nwitabuujà aci anyi? Ki kubiishaYe muntu awu ku lufu, bwa kujaadika ne Dìyì Dyende divwa dya cya bushuwa. Mmwômò!

¹⁶⁴ Monaayi, Yèyè uvwa Dìyì. Ebelu 4.12, panwikala baswe kufunda cyôci eci. Ebelu 4.12, mmwambe ne: “Dìyì dya Nzambi nditwe kupita mwele wa mvita wa nseke yibidi, dijinguludi dya meeji ne mapangadika a mu mwoyi.” Neya bushuwa anyi? “Dijinguludi.” Bwa kujaadika ne Yèyè uvwa Dìyì, cyakenzaYe ncinyi? Peetelo wakalwa kudiYe, dinà dyende

uvwa Simona. Ki kulwaye kudi Yesu, ki Yêyè kwamba... musòmbèle lwà pambelu pààpa, ne Yesu, mmwenze anu ufika pavwaYe apu, Yêyè kwamba ne: “Dîna dyebe n’Simona, kabidi udi mwânà wa Yona.” Kayi mulonge kalaasa, kayi ne dipolome paanyima pende, ùvwa yêyè anu mulobi wa mishipa wetu wa patupu ewu, kayi ne tulaasa tulonga to, Bible mmwambe ne ùvwa “mupangi ne kayi mulonge kalaasa,” kadi wakalwa mwepiskopo wa ekeleeziya wa—wa Yelusalema. Bwa cinyi? Bwa cinyi? Yesu kumwambila ne uvwa nkampanda, dîna dyende ne nkampanda, ne dîna dya tatwëndè nkansanga. Ki kumanyaye ne aci civwa n’Dîyì, bwalu Bible ukaavwa mwambe ne: “Mukalenge Nzambi webe neajuule Muprofeta mufwànàngàne ne mêmè,” ne aci civwa ne cya kwikala Muprofeta awu, ne kakuvwa baprofeta balaya paanyima paa Maalaki to too ne ku Maasiya, bidimu nkama yinaayi kakuyi muprofeta to. Nenku ki Muntu nyewu mwimane mwaba awu, mwikale ushindika, anyi ujaadika Dîyì Dyende, ujaadikila muntu uvwa mudyanjila kulongolwela Mwoyi ewu, ne: “Dîna dyebe n’Simona, kubangila anu patudi twakulangana apa... Udi mwânà wa Yona, kubangila anu patudi twakulangana apa nebakubiikile ne ‘Peetelo.’” Anji elaayaaku peenu meeji pa bwalu abu tũng! Nganyi wâkacîjaadikilaYè awu? Bwa cinyi Yêyè kaakajadikaku Dîyì adi kudi... Bwa cinyi Yêyè kaakajadikilaku Kaayifa Dîyì adi? Yêyè uvwa Nzambi, Ûvwa mumanye ne Kaayifa kavwaku mufwanyine kucitabuuja nansha. Kadi ewu muntu yêyè uvwa mulongolwela Mwoyi, yêyè wakaCijingulula anu mwaba awu.

¹⁶⁵ Musangu mukwabo mwikale mwimane munkaci mwabo amu, pavwa muntu mukwabo ndambu wa matuku paanyima muye kangata mbwende ku lukwabo luseka lwa mukuna, ntanta wa kilomeeta bu makumi abidi ne yinaayi nanku ne mwaba uvwabo bayiishila awu, kwalukilaye nende paakacyabu. Yêyè uvwa mwimane mwaba awu munkaci mwa bantu amu, ki kuseemenaye mwaba uvwa Yesu awu. Yesu kukenzakana, Yêyè uvwa Nzambi, nwamonu’s, Ûvwa ne dijingulula. Aci civwa cileeja, nwamonu’s, mu dyenza dya ne Dîyì diikale dilelela ne, Yêyè uvwa ujaadika Dîyì.

Mpindyewu, bamwe baa kudibo kwambabo ne: “Nudi bamanye’s, Muntu wawa’s n’Dîyì.”

¹⁶⁶ “Lukutukutu naanyi we,” mwakamba baakwidi abu, “kí mmulумыana wawa to. To. Cyacya kí n’Dîyì nansha.”

¹⁶⁷ Yêyè ne: “S’udi mumanye cidi Mufundu wamba: ‘Mukalenge Nzambi wetu neajuule Muprofeta mufwanangane ne Mòsà.’ S’ki Yêyè wawa. Anjibi kuMuteeleja tũng.”

¹⁶⁸ Ee, Yêyè ne: “Wêwè udi, monaayi, mwena Izaleela, mwena munda mudi kamuyi lubombo.”

Ki muntu ewu kwambaye ne: “Laabi, Wêwè udi mummanye dibà kaayi?”

169 Yêyè ne: “Kumpala kwa Filipino kukubiikilaye, pauvwa mwinsi mwa mucu apu, Mêmè’s nkaavwa mukumone.” Yêyè uvwa mummanye ne nganyi uvwa mwa kuCiitabuujà.

170 Yêyè ne: “Laabi, Wêwè udi Mwânà wa Nzambi. Udi Dîyi.” Yesu wakajaadika ne Yêyè uvwa Dîyi, ku Dîyi.

171 Monaayi mukaji mutekete wa ku ciinà cya mâyi awu. Ûvwa mwindile Maasiya. Kavwa yêyè bwalu ne bya misumbà yabo ya bantu minene ne mangumba, ne bikwabo, bivwabo naabi mu miine matuku awu abi to. Ûvwa yêyè mwindile Dîyi. Ki Muntu kampana, musangu mukwabo, musòmbe mwaba awu, Muntu anu wetu wa patupu ewu, musòmbèle mwaba awu lwà ku njila’s, kwamba—kwamba ne: “Mukaji, Ntwadileku mâyi a kunwa.”

172 Yêyè ne: “Mpindyewu, anji indilabi tûng, pàmwãpa Yêyè ewu ngekeba paa kungeeshilaye bilele bya busenji,” muvwaye mufwanyine kwikala mudyãmbidile munda mwa mwoyi wende, bwalu yêyè’s uvwa ne cimanyinu cimutwa bu mukaji wa luumu lubi. Yêyè ne: “Mona’s, Wêwè ewu udi ne. . . Lukonko bu nanku Wêwè mene ewu udi ulungeelela cinyi? Muneemu emu’s tudi ne disungulujangana. S’Udi—s’Udi—s’Udi anu. . . S’Udi mwena Yuda, twètù tudi beena Samaaleya, katuyi. . . kacitu cilele, kí mbikumbane bwa Wêwè ewu kundomba mêmè mushindu awu nansha.” Nwamonu anyi?

173 Yêyè ne: “Mukaji, bu wêwè nansha mummanye ne mwine udi wakula neebe ewu Nganyi, nunku wêwè’s nguvwa mwa kundomba Mêmè mâyi a kunwa.”

174 Yêyè ne: “Wêwè, mâyi a kunwa? Nciyi mmona nansha mbekeci anyi mwonji. Mmunyi mene mùdi Wêwè mufwanyine kumpa mâyi a mu ciinà emu?”

Yêyè ne: “Kî ng’aci ciinà cîmvwà Mêmè ngamba to.” Nwamonu anyi?

175 Paanyima paa katanci, yêyè ne: “Ewu Muntu’s ngwa pabwende.” Ki kubangaye kubândisha mulondo wa mâyi awu, wenda ukoka.

176 Yêyè ne: “Ee, mâyi ândi Mêmè mfilà neikale misulu ya mâyi, mishimi yidi yitutumija mâyi, yifùkuka too ne mu Mwoyi wa Cyendelele, ne mu musuuka webe.”

177 “Ee,” mwakambaye, “mpindyewu, anji indila kakese, ndi—ndi ngumvwa ne, Wêwè ewu bu mwena Yuda.” Yêyè ne: “Mpindyewu, nwênù beena Yuda,” yêyè ne, “Udi muswe kungambila ne Wêwè udi munene mupite tatwètù, Yakobo, wâkumbula ciinà eci awu anyi?” Yêyè awu’s ki uvwa Nzambi wa Yakobo. Nwamonu anyi? Yêyè ne: “Udi muswe kwamba ne Wêwè udi munene mupite—mupite Yakobo, wâkumbula ciinà eci awu anyi?” Muntu anu wetu wa patupu ewu, nwamonu’s,

ku mmwenekelu. S’ki cyônsò cyûdi wêwè mumone, muntu anu wetu wa patupu ewu. Yêyè ne: “Udi wamba ne Wêwè udi munene mupite tatwètù, Yakobo, wâkumbula ciinà eci awu, ne kunwamu mâyi yêyè mwine, ne ngombe yende anyi? Ee, twètù’s tudi anu babeneshiibwe mu kunwa kwa mâyi a mu ciinà eci civwa muprofeta awu muumbule.”

Yêyè ne: “Uh-huh,” mwakambaYe.

“Kabidi twètù tutu tukuukwila ku mukuna ewu. Nwênù nudi nwamba ne ‘nku Yelusalema.’”

¹⁷⁸ Yêyè ne: “Lupandu ludi lufumina kudi beena Yuda, mukaji, twètù mbadi bamanye citudi twamba.” Yêyè ne: “Nwênù nudi nukuukwila cinudi kanuyi bamanye ne ncinyi to.” Mwena Yuda udi ne cya kwikala mumanye Dîyi, nwamonu’s, civwa cikengela kwikalaku aci. Kadi, monaayi, Yêyè uvwa utangila bwa kumona mpindyewu. Bwa cinyi? Yêyè neikale mwa . . . Ncinyi ciikalaYe mwa kwenza? Kujaadika Dîyi Dyende. Nwamonu anyi? Mona’s, mukaji awu kwamba . . . Yêyè ne: “Byôbi biine, ndaaku ukangate bayeebe kadi ulwe mwaba ewu.”

Ki yêyè ne: “Ncitu ne bayaanyi bwala.”

¹⁷⁹ “Mona’s,” mwakambaYe, “wambi bulelela, wamonu’s, bwalu ukâàvwa naabo bataanu, ne ewu mwine ûdi nende mpindyewu awu kî mbayeebe to.” Nwamonu anyi? Tangilaayi numone! Cintu kadi kwenzeka’s, nwamonu’s, cintu kampanda kwangataci Mwoyi. Mpindyewu, bu ne kacivwa munda amu kwine kwônsò ku cibangidilu aku to, bu ne yêyè kavwa ne cifwanyikijilu kubangila anu ku didyanjila-kulongolola kwaka to, nunku kî ncikwateku to.

¹⁸⁰ Mwaba awu baakwidi bavwa biimanepu, kwambabo ne: “Ewu muntu’s m’Beezebula.” Nwamonu’s, kabayi ne cifwanyikijilu.

¹⁸¹ *Mwoyi wa Cyendeleele*, “wêwè uvwa anuku kwônsò aku.” Nwamonu’s, wêwè udi ne Mwoyi wa Cyendeleele, kudi mushindu anu umwepele wawu, ki Nzambi. Wêwè uvwa cyambiibwa Cyende, Yêyè wakeela meeji ebe wêwè ne wakakumanya kumpala kwa difuka dya dyulu ne buloba, mu meeji Ende. Nwamonu anyi?

¹⁸² Kukenzakanaye. Tangilaayi numone ne mmu mushindu kaayi—kaayi wa mpekaatu muvwaye usanganyiibwa. Kadi, nwamonu’s, Yêyè kavwa mwa—Yêyè kavwa mwa kupeta mwakwidi awu to, bwalu mwakwidi awu uvwa mumanyi wa dibàla mulonge tulaasa, mwena teoloji mu Dîyi, kadi kayi ne cifwanyikijilu mu Dyulu to, nwamonu’s, kavwaku yêyè mu meeji a Nzambi to nansha kakese. Kadi mukaji ewu yêyè uvwamu. Yêyè ne: “Mukalenge, ndi njingulula ne Wêwè ewu udi muprofeta.” Ki cyônsò civwaYe ukeba bwa mukaji awu kumonaye. Nwamonu anyi? Yêyè ne: “Tudi twitabuuja ne Wêwè udi, ndi ngiitabuuja ne Wêwè udi muprofeta. Mpindyewu, twètù

tudi bamanye. Katwena tuumvwa pa bidi bitangila baprofeta mpindyewu to, bwalu dîbà dikaadi diye be, tudi bamanye ne nekulwe Maasiya. Nenku paalwa mwine Maasiya awu, Yêyè neikale Dîyi. Wamonu's, Yêyè neamanye maalú masokome a mu mwoyi, Yêyè neénzè cintu cimwecimwe ci—ciWênji mwaba awu aci." Yêyè ne: "Wêwè ewu udi ne cya kwikala umwe wa ku baprofeta Bende, bwa kuMudyanjidila anyi cintu kampanda."

Yêyè ne: "Mémè ki Yêyè awu."

¹⁸³ CivwaYe mufwanyine kwenza ncinyi? Ûvwa munkaci mwa kujaadika Dîyi Dyende, kujaadika kaaba Kende, kujaadika civwaYe. Nzambi uvwa munda mwa Kilisto, upungisha bantu ne Yêyè mwine. Ne Nzambi n'Dîyi. Eyo. Yêyè wakabutamija bipeepele ne mavwala, bwa kujaadika ciprofeta cya Yeshaayi cya ne: "NebaMubiikile ne 'Nzambi wa bukole, Taatù wa kashidi.'" Nwamonu anyi? Wakavudija kabidi mâmpà ne mishipa, Mwânà wa balume uvwa mulediibwe kudi virgo ewu. Civwa ncinyi? Bwa kujaadika Dîyi. Bikengela Mufundu wònsò wùlè. Wakajaadika Dîyi, mu kwamba kwa ne Yêyè uvwa Yehowah mumweneshiibwe. Ûvwa cibangidilu cya bufuki bwa Nzambi. Nzambi mu bufuki, Nzambi mu katupa kakese kaa bufuki mwab'ewu muvwa Nzambi musòmbèle Yêyè mwine, Yêyè nguvwa cibangidilu cya bufuki bwa Nzambi abu: "Ku Yêyè nkudi kùlediibwà bânà bààbùngì." Tangilaayi, Yêyè wakavudija kabidi mishipa. Yêyè udi Dîyi ne cijaadiki cya Dîyi.

¹⁸⁴ Mpindyewu teelajaayi ne ntema, bu mutukaadi tuya batangile ku ndekeelu. Dituku adi, cingààbadì mu tusunsa tukese emu aci, mpindyewu, paakafikaYe kumbelu kwa Yayilo. KubwelaYe, pààkakùfikàYe apu. Mpindyewu, vulukaayi ne, Yayilo uvwa mwa—mwakwidi, mwena kwitabuuja wa ku mikàlù. Ûvwa muswe kwitabuuja Yesu, kadi ùvwa umvwa bibi bwa kulekelela ekeleeziya wende, bwalu bavwa bambe ne: "Muntu yònsò wadidinga anu kuMwitabuuja awu neipaciibwe mu ekeleeziya." Mpindyewu teelejaayaaku ne ntema yònsò mpindyewu, patukaadi tujikija apa, mpaayi maci ne ntema yònsò. Tangilaayi numone eci nunku. Ndi ngiitabuuja ne Yesu uvwa mumanye cyòcì aci paakakosololaYe mbù apu, bwalu Yêyè uvwa mumanye maalú ònsò. Nenku paakakosololaYe mbù apu, ne kwimana mwaba awu, ki mwakwidi mukese ulwàlwa wenda upweka ewu. Mwanende wa bakaji uvwa mukwacike ne disaamà dikole, bangangabuka bamulekele, bamba ne: "Ûkaadi ùpunga ne lufu." Mpindyewu, dîbà kulwadi dya kwenza cyenzedi.

¹⁸⁵ Pàmwàpa bwalu bukaadi bwebe wêwè mu dinda emu, dîbà dyalu bwa wêwè kwenza cyenzedi. Nwamonu anyi? Pàmwàpa wêwè udi usaama bikole. Pàmwàpa udi mutwishiiibwe ne udi mupiile. Mbifwanyine kwikala nanku. Pakaadi Nzambi ukwangacisha dipangadika ku bukole, dîbà dyàkànyì dya kwenza cyenzedi.

¹⁸⁶ Ne ntema yônsò mpindyewu. Ki kulwaye, kayi ucyuka bivwa bakwabo baa kudibo abu bambe to, kupatukilaye anu patooke bantu bitangile, kulwaye e kudyupwilaye ku makàsà a Yesu. Ncidya kaayipu's we bwa—bwa mumanyi wa dibàla mulonge tulaasa, bwa kulwa kudi Ewu utudi katuyiku ne bujaadiki bwa ne kacya ùkaadikù muye mu kalaasa. Mushindu wakalwa muntu, uvwa mumanya ne ngwa mu maalu ônsò a teoloji awu, ùlwa kudi Muntu mumanya ne udi “mwoneke, muntu wa cisuku, muntu mupâle, lungenyi luMujimine, kayi nansha meeji mu ôwò to.” Numfwileku luse bwa dîyì edi ne: “Yèyè udi anu muntu wa patupu wa cimfiikaamunda wa mu dituku adi,” muvwa muntu yônsò uMwelela meeji's. Mutudi twètù bafwanyine kwamba leelu ewu, mu ngaakwilu wa mu misèsù ne: “Mupâle!” Mûmvwà muyiishe dituku kampanda pa bûlû ne mulonda wa nsalu, nudi bamanye's. Nwamonu's, ki civwaYe bwa bantu baa pambelu apa, anu muntu wa patupu wa ciibidilu ewu . . . Bamba ne: “Mona's, Wèwè's udi mujimise lungenyi! Udi mupâle! Udi mutomboke!” Mpindyewu, ki muntu nyewu uvwa ne mikanda yônsò ya tulaasa tulonga, ùlwa kudi Ewu uvwa mumanya ne mmujimise lungenyi awu. Úvwa mwenzelijibwe ku bukole bwa kucyenza.

¹⁸⁷ Tangilaayi nsongakaji awu mpindyewu. Necyànji anu kusumaku kakese, kadi neciikale bimpè bwebe wèwè. Nwamonu's, misangu mikwabo mukumu kampanda udi ukutabuluja.

¹⁸⁸ Monaayi, Yèyè kulwa e kubwelela ku luseke lwa mwânà wa bakaji mutekete ewu, mufwe, uvwa mufwe kukaavwa pâmwâpa mèbà, ne bakaavwa bamulaadike pââpa, ne bamwele manga a dibenga kubola, ne babyèlè kumpenga kwônsò kwa kalaalu aku. Mushindu awu nguvwabo benza mu miine matuku awu, babakuta anu bu dibuki kadi kubeela mu ciinà, bateeka pa dibaya. Yèyè bavwa bamulaadike pa kalaalu, ne bilôngò bimunyungulukile.

¹⁸⁹ Nenku, kaa, kampaasata kalenga maalu aku, ka-Yayilo aku, ndi ndifwanyikijila ne kavwa kampaasata kalenga maalu be, muntu ne muntu mumunange. Bwalu, nudi numona's, mèmè ndi mwa kujaadika aci, bwalu yèyè, mu mwoyi wende, uvwa mwitabuuje Yesu cya bushuwa. Kadi bivwa bimukolele bwa kwangata anu dipangadika dyetu edi, bwalu uvwa mufwanyine kupangila kwikala kupeta sheki wa bamutumina mu diisambombo dyônsò anyi mu dimwe dyônsò mu dinda. Nwamonu anyi? Bivwa bimukolele bwa kwangata anu di—dipangadika dyetu edi. Kabidi cintu cikwabo, bantu, kaneemu kalenga ne kanene kavwabo bamupa munkaci mwa bantu aku, baakamba ne: “Nkwambile bishi, Yayilo's ukaadi muye mu dikolesha dya maalu adi. Wamonu's, nyawu muye kwaka ne muprofeta wa mashimi awu. S'ki cidiye mwenze menemene, kudi bimanyinu byônsò bya cyambamba ne bintu bikwabo abi,

Muprofeta wa mu Ngalela awu, nudi bamanye's, Yesu wa mu Nazaleeta awu.”

¹⁹⁰ Twêtù katwena tucitabuuja leelu ewu to, cidi cimweka cya cinyangakaja cijila, kadi mushindu awu's nguwabi mwine musangu awu. Nwamonu anyi? “Kadi, dîngà dituku, anu mudibi mpindyewu emu, nebiikale nanku musangu awu.” Nwamonu's, cintu cimwecimwe aci!

¹⁹¹ Mpindyewu monaayi, kuyaye kuntwaku. Bya bwalu bivwa bimukolele bwa kwenzaye nanku, kadi dîbà dyakalwa dyakenzejiibwaye bwa kucyenza. Bivwa bikengela anu àcyènzè. Kadi ki yêyè wâyi ewu e kupeta Yesu, anu pambelu apu kumpala kwa bônso abu, ne kudyupwilaye ku makàsà Ende, kwamba ne: “Mfumu! Mfumu!” Nudi bamanye ne ncinyi ciine aci? Bukookeshi, bwena-cintu. Cya bushuwa.

¹⁹² Nwamonu's, bantu bààbûngì mbaswe bwa Yesu kwikalaye Musungidi wabo, kadi kayi Mukalenge wabo to. Nwamonu's, *Mukalenge* utu “mukookeshi.” Eyowa. Wêwè udi wamba ne: “Yesu, Wêwè unsungile kadi undekele ngiikale mwimane anu apa, nenku aci ncikumbane, ne mêmè nêngèndelè yanyi. Mpindyewu, Wêwè kwikadi ubwelakana mu maalu aanyi to. Kadi Udi mwa kwikala Musungidi wanyi, kadi kuyi Mukalenge wanyi to.” Yêyè mmuswe kwikala Mukalenge, wamonu's, pashiishe mpadiYe Musungidi webe.

¹⁹³ Kadi mpindyewu, kwambaye ne: “Mfumu, Musungidi!” Nwamonu anyi? “Ndi...mwanaanyi mutekete wa bakaji, mulela-nkaaya wanyi, udi ne bidimu dikumi ne bibidi, bangangabuka mbamulekele.” Kakuyi mpatà to mwakwidi ewu uvwa mufwanyine kwikala mwambe nenku: “Udi mumanye's, bakaatu bônso bambambe mûtù Wêwè ewu mukoleshi wa maalu, kadi, Udi mumanye's, Mfumu, mêmè—mêmè—mêmè ntu muKwitabuuje. Ntu mwitabuuje. Ndi mumanye ne Wêwè udi ne dijingulula. Kadi cintu cimwepele cîndi nkeba bwa Wêwè kwamba, ncya ne, lwâ anu cyanaana Umutentekete byanza. Ne pashiishe ungambile cya dyenza, mêmè nêncyènzè.” Kaa, mpindyewu's ukaadi ufikaku mwaba kampanda!

Yêyè ne: “Nyaaya. Nyaaya.” Ke kwasaYe lwendu.

¹⁹⁴ Paanyima paa yêyè mumane kuya mêbà àbûngì, ki muntu ulwâlwa lubilu ewu, bu muvwa cilele mwine musangu awu, ne butu budyela ku mutu kwônso, wamba ne: “Lekela kutacisha Muntu awu, mwaneebe wa bakaji ukaadi mufwe. Ûkaadi mumane kufwa, bakaadi bamane kumulongolola ne bamulaadike kwaka.”

¹⁹⁵ Kaa, mwanende wa pa mwoyi's! Yesu kukudimuna mêsù, e kumutangila, yêyè ne: “Kaa! Kaa! Kaa!”

¹⁹⁶ Yêyè ne: “Ncyèna mukwambile anyi?” Mpindyewu, cyakenzaYe mwaba awu, Ûkaavwa mulaye Yayilo. Mpindyewu bivwa bikengela Yêyè kujaadika cyôci aci. Amen. “S'Nkaavwa

mukwambile. Itabuuja wêwè anu cyanaana nenku neumone butumbi bwa Nzambi.” Mpindyewu, Yèyè uvwa mumanye civwaYe wenza aci. Ûvwa mwambe ne Yèyè kavwa wenza cintu nansha cimwe to pavwa Taatù kayi muMuleeje dyambedi. Yone Munsantu—Yone Munsantu 5.19: “Mèmè ntu ngenza anu cidì Taatù uNdeja,” pa nanku Yèyè ukaavwa muMuleeje civwa ne cya kwenzeka aci.

¹⁹⁷ Nenku Yèyè mmwenze anu ubwela mu nzubu amu, ne wimana ku luseke lwa kaamubidi kakese, kakwate mashika ne kuumakane kavwa kalaadika mwaba awu, kavwa kasaame kukaavwa mbingu aku. Nenku kaamubidi kende kakese aku, katookoloke, kakuyiku cyakudya cibwele mu kaamubidi kende aku to, anu mubidi kapyà ne bikwabo, ki yèyè—ki yèyè kufwa’s. Bakaavwa bamumyamine pambidi pajima manga a dibenga kubola aa ne bikwabo. Ki yèyè mulaadika mwaba awu, nudi bamanye’s, pa kalaalu ne bikwabo, biikale badilongolola bwa kumukuta bilàmbà ne kumwela mu lukita, ki bòbò kuteeka. . . benze kaamushingà kaabo kakese kaa diteeka dya bilongò bimunyungulukile. Yesu umba ufika mwaba awu. Ki bantu bònsò abu ne: “Kaa, Yayilo wetu, kànà keebe kaa bakaji kǎfù’s wee! Kaa, taatù Yayilo, kaa! Tudi tukuumvwila luse be,” ne bikwabo.

¹⁹⁸ Yèyè ne: “Kaa, anji puwayi kwòkò tǔng; nudi nwenza mutooyi mupite bǔngi be.” Yèyè ne: “Nkàyumbayumba kaayi kònsò kanudi nwenza eku ne eku mwaba ewu aka?” Nudi numona anyi? “Aka kàyumbayumba, nudi anu. . .nudi—nudi nwela mikunda ne mbila. Mwànà wa bakaji ewu kǐ mmufwe to. S’mmulaale tulù. Shhh.”

¹⁹⁹ Pa dǐbà adi baakenza cinyi? Paakumvwabo Yèyè wamba ne kǐ mmufwe to, bòbò. . .Mbambe ne: “BaakaMuseka bya bamudyombola.” Mu ngaakwilu mukwabo, baakaMwela bibingu. “Wuǔ! Mona’s kwaka, Wèwè’s! Mona’s kwaka, Wèwè muprofeta wa mashimi ewu! Mona’s kwaka, Wèwè museeswishi wa bantu naanyi we! Mwànà wa bakaji ewu’s mmufwe. Ngangabuka mwambe ne mmufwe. Twètù bamwele manga a dibenga kubola, bamane kumulaadika pààpa. Mmumana kulaadika kwaka, mufwe.” Bòbò ne: “Ha, ha, ha! Mpindyewu, Yayilo, wêwè nyawu utu anu wakula Bwende Yèyè, dya leelu tudi panshi anyi tudi pa kazubu?”

²⁰⁰ Nudi bamanye cyakenzaYe anyi? Wakamba ne: “Nwènù bònsò anji patukaayi mwab’ewu.” Mu nyungulukilu wa bupidya bwa mushindu awu abu, kacyenaku mwa kwenza mudimu to. Mpindyewu, cikaavwaYe mwambe ncinyi? Ûkaavwa mwambe ne: “Yayilo, bu wêwè anu mwa kwitabuuja cyanaana, neumone butumbi bwa Nzambi.” Mpindyewu, Dìyì Dyende ndyòdì adi. Bivwa bikengela ajaadike ciine aci. Eyo.

201 Pashiishe paakabwelaYe mu nzubu muvwabo bônso mu didila dya myadi amu, Wakamba ne: “Mmulaale tulù.” Aci’s civwa cibengangana ne maalu a mamanya. Aci’s civwa cibengangana ne ngeelelu wa meeji wetu wa patupu ewu. Yèyè ukaavwa mufwe, bamwele ne manga a dibenga kubola.

202 Pavwabo anu ne bǎfù, bavwa babeela manga a dibenga kubola anu mwaba awu, pavwa mwoyi anu ne wǎpátuku munda mwabo, bavwa babapongolwela manananshi ne bintu kampana pambidi ne babakuta bilàmbà ne babalongolola bwa kuya naabo. Nwamonu’s, babajiika, bavwa bajii kangana anu, ee, misangu mikwabo kabayi nansha bamanyishaku famille to. Nudi bamanye’s, Ananiya ne Safira; bakaavwa bamane kujiika Ananiya, pavwa Safira. . . Ananiya, paakabwela Safira, nudi numona’s; bakaavwa bamane kumwangata bakamujiike, nudi numona’s. Bôbò bavwa anu, padibo benza anu ne bǎfwu, bavwa babapongolwela anu bintu abi pambidi ne bapatuka naabo baya kabajiika. Nwamonu anyi?

203 Pa nanku yèyè ukaavwa mumane kwikala pabwîpì ne kuya mu lukita, kadi bavwa bindile papa bwa kumumonaye kumpala kwa kumuumusha kamuteekabo ku luseke. Kadi Yèyè mmwenze anu ubwela nunku, ne yèyè mwànà wa bakaji awu mu mushindu awu, Yèyè ne: “Ûdi ubakula anu kalù cyanaana.”

Ee, bôbò ne: “Mpindyewu, Mulumyana wawa bushuwa munwǎmbì mwine ne mmupange kwikala mupâle!”

204 Nanku mpindyewu cyakenzaYe ncinyi? Yèyè’s ukaavwa mumane kwamba ne mmulaale tulù, bivwa bikengela Yèyè kujaadika Dìyì Dyende. Kavwa mwa kucyenza kumpala kwa musimbà wa bantu awu to, ki Yèyè ne: “Bapatulaayi bônso pambelu.” Nanku ndi mwa kuMumona ukenzakana utuma mèsù kudi Yayilo wamba ne: “Ucidi anu witabuuja anyi?”

“Eyowa’s, Mukalenge.”

205 “Wèwè ne mukajeebe lwâyi apa. Peetelo, Yakobo ne Yone, lwâyi Naanyi.” Kuseemenabo kuntwaku ne kubiikilabo mwaku ewu, *talitha cumi*, udi uswa kwamba ne: “Nsongaakaji mutekete, juuka.” Ki kujaadikaYe Dìyì Dyende, yèyè uvwa anu mulaale tulù cyanaana. Ncya bushuwa anyi? KujaadikaYe apa ne, Dìyì Dyende divwa dya cya bushuwa. Bupidya bwabo nansha bwikaleku, Yèyè wakajaadika anu ne Dìyì Dyende divwa dya cya bushuwa, pa kumubiisha, bwalu Yèyè ukaavwa mwambe ne mmulaale tulù. Ûvwa mulaale tulù.

206 Yèyè neenzè cintu cimwecimwe aci dîngà dituku, wenzela mwena kwitabuuja mulelela yônso, bwalu Dìyì Dyende ndilaye nanku. “Aba badi mu Kilisto, Nzambi nealwe naabo pamwe Nende.” Nwamonu’s: “Aba badi mu Kilisto.”

207 Cyakenza nsongaakaji mutekete wa beena Yuda ewu ncinyi? Nkaavwa nkeba kucinguluka Mufundu ewu mwaba ewu, kadi nè—nèngù—nèngulamè. Ndi mumanye ne dibà didi

mwa kwikala dimane kupita ndambu, nenku netupite ku mulongo wa babeedi mu tusunsa tukese emu. Pàmwápa ncyakunumona to munda mwa lumingu lukwabo lujima, kadi twánjàayi kwindilaku kakese. “Muntu kaakwikala ne mwoyi bwa dyâmpà nkaayaadi to.” Nwamonu anyi? Monaayi, lekelaayi mbwejeku eci munda amu mpindyewu, bwa nnuleeje. Bwa cinyi Yesu wakabiisha nsongaakaji mutekete wa beena Ebelu ewu ku lufu? Mbwalu uvwa mumanye ne kavwa mufwe anyi? Didyanjila-kulongolola. Bya mwomumwe anu ne mwakabiishaYe Lazârô. Nwamonu anyi? Pàmwápa kuvwa nsongaakaji mitekete yàbûngì yivwa mifwe dituku diine dimwedimwe adi, Yêyè kaakabeelaku dìyì to. Úvwa mumanye ne bwa ewu yêyè uvwa ne Mwoyi wa Cyendelele. Nwamonu’s, Kaakabiisha bakwabo abu to.

²⁰⁸ Tangilaayi, paakapatukaYe mu Yeleko, baakamba ne: “Mona kuneeku, mulumyana ewu!” Kakuyi mpatà to baakamba ne: “Wêwè ki utu ubiisha bafwe awu? Udi uswa kungambila ne Wêwè udi mwa kajuula bafwe, s’nyewu tudi ne nkita myûle tente ne bafwe mwab’ewu, lwákù tûng, biishaaku badi apa aba.” Nwamonu’s, Yêyè kaakateyaku ntema kudibo to nansha mikese. Nwamonu’s, kayiku mwa kuteyaku ntema to, bwalu Úvwa mumanye ne Yêyè uvwa Dìyì.

²⁰⁹ Monaayi, uvwa anu mulaale tulù cyanaana. Yêyè uvwa mumanye ne tatwëndè awu uvwa mwa kulwa. Mpindyewu, mwânà wa bakaji mutekete ewu, nwamonu’s, Yêyè uvwa mumaye ne nsongaakaji mutekete wa beena Yuda awu uvwa mulaale anu tulù cyanaana. Nwamonu’s, mwa—mwakane katu yêyè ufwa to. Yesu wawalwa mbwa kupikula baakane. Nenku, *kupikula*, mbwena kwamba ne “kwalujuludiibwa mwaba mûvwà usanganyibwa musangu kampanda awu.” Nwamonu anyi? Kavwa mwa kupikula beena bupidya to, nansha biikale balonge tulaasa bishi anyi ba-docteurs beena mapolome bûngì bishi avwabo naawu. Kavwa mwa kubapikula bôbò to, bwalu bôbò kabavwa bakumbanyine kupikudiibwa to; bivwa bikengela kuyabo kwabo kubalongolwela. Kadi, mu didyanjila-kumanya Dyende, úvwa mumanye ne Lazârô neapatuke mu lukita. Úvwa kabidi mumanye ne mwânà wa bakaji mutekete ewu uvwa ne Mwoyi wa Cyendelele. Pa nanku kavwa mufwe to, úvwa mulaale anu tulù cyanaana. Nenku paajika mudimu wetu pa buloba apa, patwikala katuyi mwa kwikala ne mwoyi too ne ku Dilwa Dyende, katwena mwa kufwa to, tudi balaale anu tulù cyanaana. M’Mucijaadike mwab’ewu. Neacijaadike cyakabidi. “Nansha misanda ya dikoba mibutule mubidi ewu, nansha nanku mêmè nêmbiikè mu cifwanyikiji Cyende.”

²¹⁰ Yêyè utu ujaadika Mêyì Ende ônsò, Mêyì Ende ônsò. Anji elaayi meeji pa bwalu abu, Mêyì Ende ônsò! Ne wêwè uvwa Dìyì Dyende. Yêyè uvwa Dìyì, ne wêwè uvwa citupa cya Dìyì Dyende. Nenku, ki bwa cinyi udi mutumiibwe panwapa, mbwa

kushindika kaaba keebe mu mwoyi ewu. Ncyê—ncyê—ncyêna ngeela meeji ne nudi bumvwe aci to. Nwamonu's, Yèyè udi Díyì. Mpindyewu nwacyũmvù anyi?

211 Yèyè uvwa mu makàsà, mu Luther; mu bibelu, mu Wesley; mu makaaya, mu Mpenta. Nudi bumvwe cìndì muswe kwamba anyi? Yèyè udi Mutu. Nwènú mbàdì ne citupa cidi citwangaja abi pamwe, díbà ditudi ne mwoyi mpindyewu edi; kí ncutupa cya makàsà to, kí ncutupa cya bibelu to, kí ncutupa cya makaaya to, kadi ncutupa cya nshingu. Ncya bushuwa anyi? Cidi citwangaja ku mutu. Ki citupa cya mubidi aci. Aba badi balaale tulù mu Yesu Nzambi nealwe naabo pamwe Nende. Mpungi wa Nzambi neadile, nenku bafwe mu Kilisto nebajuuke dyambedi. Ncya bushuwa anyi? Nwamonu's, udi ulwa citupa cya Díyì adi, ulwa citupa Cyende. Ne wèwè udi wangata Dìná Dyende bwa kucijingulula, wamonu's, udi muteekiibwe mwômò amu, mubatijiibwe mu Dìná Dyende, mu Mubidi Wende: “Ku Nyuma umwe tudi bônso babatijiibwe mu Mubidi umwe,” munda emu, anu bu kaaba kamwekamwe aku menemene. Yèyè katu ushintululaku mushindu Wende to. Piikala. . . Mbanganyi badi biitabuujwa ne Ekeleeziya wa ku cibangidilu udi munda Mwende? Tumonaayibi tũng, mbanganyi badi baciitabuujwa? Bôbò abu baakabatijiibwa bishi? Eyo. Nwamonu's, Yèyè udi Nzambi udi kayi ushintuluka to. Twâjaadikì cyôci aci. Tudi bafwanyine kushaala mwaba ewu diloolo edi too ne mundankulu, biikale tujaadika cyôci aci, kadi biikale anu twenda tuya twenda tuya twenda tuya. Nwamonu's, kayi ushintuluka to! Nwamonu anyi? Wèwè udi munda Mwende ne udi citupa Cyende, bwalu uvwa citupa cya meeji Ende. Kumpala kwa difuka dya dyulu ne buloba, Yèyè wakakubiikila!

212 Bible mmwambe ne nyama wa lwonji pa buloba. . . Awu mmufwilakanyi ne Kilisto wa cyena mangumba wíkala mwa kulwa pa buloba apa, wenza nyama wa lwonji ku Loomo, wa bwena uvwa dingumba dya ntwadijilu awu. Ne Nsangilu wa Maekeleeziya wa Buloba bujima ewu ngudi wenza cimfwanyi cya nyama wa lwonji, anu menemene citwáfumu ku difunda mu mukanda awu dituku adi aci. Monaayi, ùdi wenza cyôci aci, nwamonu's, mufwilakanyi ne Kilisto. Ne Bible mmwambe ne: “Bônso beena mènà avwa kaayi mafunda mu Mukanda wa Mwoyi wa Mwànà wa Mukooko,” (díbà kaayi, ku ditabuluja anyi?) “wákashipiibwa kumpala kwa difuka dya dyulu ne buloba,” (dyebe dìnà dyakafundiibwamu) “mufwilakanyi ne Kilisto ewu neakuseeswishe.” Maataayi 24.24, udi wamba ne—ne “Mufwilakanyi ne Kilisto neikale mutambe kufwanangana anu menemene ne cintu cilelela mu matuku a ndekeelu, mu mushindu wa bifwanyine kuseeswisha ne basungula mene, anyi badi badyanjila kulongolola. . .” Ncintu cimwecimwe aci, disungula ne didyanjila-kulongolola ncintu cimwe, Nzambi wakakusungula anyi wakadyanjila kukulongolola kumpala kwa

difuka dya dyulu ne buloba. “Neaseeswishe bônso beena mênà avwa kaâyî madyanjila kulongolola mu Mukanda wa Mwoyi.”

213 Danyele wakamba bwalu abu, mwikalà beena lungenyi mu dituku adi, ne mwikalà baacibulangenyi, ne bikwabo. Eyo, byàbûngî be, kadi nyewu ndi anu ngenda ndaluka nya kule bikole—bikole, ntanku pende mmuvukute lubilu lukole be bwanyi mêmè. Monaayi, tangilaayaaku numone mpindyewu, Yèyè wakamona paanyima. . . Mpindyewu tangilaayi numone cidi cyenzeke mwaba ewu. “Bônso baakadyanjilaYe kumanya, Wakababiikila. Bônso baakabiikilaYe, mMubabingishe. Bônso baabingishiYe, mMubatumbishe.” Lwendu lwebè’s ndujike, udi munkaci mwa kukumbaja webe mudimu. Ngàsà ncredi Nzambi mukwenzele. Byenzedi ncyûdi wèwè wenza bwa dyanyisha.

214 Wakajaadika ku cintu Cyende cimwecimwe aci ne, Yèyè uvwa mumanye maalu ônsò, Mwânà mulela kudi virgo ewu. Yèyè uvwa mumanye mwaba uvwa mishipa yisanganyiibwa mu mâyi, muvwa Peetelo ne bakwabo balobe balobole ne makondo kabayi bakwate kantu to. Aci cyakajaadika Dîyi Dyende. Ncya bushuwa anyi? Yèyè uvwa mumanye maalu ônsò.

215 Ne pakaavwaYe mudilongolole bwa kufuta bitadi Byende, aci cyakaleeja ne Yèyè nguvwa mwena bintu byônsò. Uvwa mumanye mwaba uvwa mushipa uvwa ne mfranga mukana mwawu mikumbane anu menemene bwa kufuta bwa . . . Muntu kampanda uvwa muyimacishe mwaba awu, ki mushipa awu paawu kuyibakula. Ki Yèyè kwamba ne: “Peetelo, pweka nda ukeele ndobo muntwamu, wamonu’s, ukwate mushipa awu ne wangate mfranga yidi mukana mwawu ayi. Nenku uye ukakumbaje dijinga dyabo, ufute bitadi abi.” Kaa, eyowa’s!

216 Tubundi tutu ne meena ne nyuunyi ya muulu yitu ne maswa, kadi Yèyè uvwa ne Dîyi, Yèyè uvwa Dîyi, ne uvwa ujaadika ne ki muvwabi. Yèyè utu misangu yônsò anu ujaadika Dîyi Dyende. Cintu cimwecimwe aci ncrediYe wenza mpindyewu, mu lukongo lwônsò Yèyè udi ujaadika cintu cimwecimwe aci.

217 Paanyima paa dituku diisâtù, paanyima paa lufu Lwende, dijikiibwa, mu dituku diisâtù, Wakabiika ku lufu, bwa kujaadika Dîyi Dyende, bwalu muprofeta wakamba ne: “Ncyakwanyishaku bwa Wa Cijila Wanyi amone dibola, anyi Ncyakushiyaku musuuka Wende mu iferno to,” dituku diisâtù, kumpala kwa dibola kubangadi kwenzeka mu mêmè makumi mwandamutekete ne abidi. Nwamonu’s, kabyakaya too ne ku matuku asatu bulubulu to, bwalu dibola ditu dibanga kwenzeka mu mêmè makumi mwandamutekete ne abidi. Nwamonu’s, pa nanku Yèyè kaakaya too ne ku ntanta mujiima awu to, bwalu muprofeta ukaavwa mwambe, nwamonu’s, muprofeta ukaavwa mwambe ne: “Ncyakwanyishaku bwa Wa Cijila Wanyi amone dibola to.” Wakajaadika Dîyi Dyende.

218 Wakondopa babeedi, balema, bwa kujaadika Dìyì Dyende divwa Yeshaayi ne baprofeta bakwabo bambe.

219 Wakatuma Nyuma Mwîmpè mu Dituku dya Mpenta, bwa kujaadika Dìyì Dyende. Panwikala baswe kupeta yimwe ya ku Mifundu eyi mpindyewu, Yowela 2.28, Wakamba ne: “Nebyenzeke ne mu matuku a ndekeelu, mudi Nzambi wamba, Mêmè nêmpongololè Nyuma Wanyi pa musunya wònsò, ne pambidi paa basadidi Baanyi balume ne basadidi bakaji Mêmè nêmpongololè Nyuma Wanyi. Bansongaalume beenu nebamone bikeena-kumona, bakulakaji beenu nebaloote biloota,” ne bikwabo. Wakacijaadika pa kupongolola! Kabidi, Yêyè ukaavwa mumane kwamba kumpala kwa ciine cikondo eci, mu Luuka 24.49, panwikala baswe kucifunda, Wakamba ne: “Monaayi, Ndi ntuma mulayi wa Taatu Wanyi pambidi peenu. Kadi anji shaalaayi, mu cimenga cya Yelusalema too ne panwawwadikiibwa ne bukole bwa mu Dyulu.” Ki cyôci aci, Yêyè kucyenza, Yêyè kutuma Nyuma bwa kutungunuka ne dijaadika Dìyì Dyende. Kadi tangilaayi numone cyakambaYe. Yêyè wakacyenza anyi? Eyo.

220 Maako 16, Yêyè wakamba ne: “Ndaayi pa buloba bujima, nuyiishe Evanjeeliyo kudi cifukiibwa cyònsò.” Too ne penyi? Pa buloba bujima. Kudi nganyi? Cifukiibwa cyònsò. “Ewu udi witabuuya ne ubatiiibwa neasungidiibwe. Ewu udi kayi witabuuya neapiishiibwe, ne bimanyinu ebi nebifile badi biitabuuya.” Wakamba mu Maako 4, Wakamba mu Yone 14.12, Wakamba kabidi ne: “Ewu udi ungiitabuuya Mêmè,” kî ngudi witabuuya bya budîngîbudîngî to, kadi: “Ewu udi ungiitabuuya Mêmè, byenzedi bîndi Mêmè ngenza neàbyènzè pende.” Bivwa bikengela Nyuma umweumwe uvwa munda Mwende awu bwa kwenza cyenzedi cimwecimwe aci. Bwa cinyi? Nyuma awu uvwa ulwa bwa kumwenesha Dìyì dilaya mu matuku acivwa alwa. Nwamonu’s, Wakadyanjila kulongolola bintu, bwalu Úvwa mumanye ne bintu ebi nebyenzeke.

221 Mpindyewu, paanyima paa bidimu cinunu ne nkama citeema, ne bikondo bya ekeleeziya bimane kupita, ne bintu byònsò byakadyanjilaYe kwamba mu ciprofeta bwa Luther, Wesley abi, twafumu ku dibilonga ne dibimona bizodiibwe, ne ngondo mupweke ne mubizole, ne Mukalenge mutuzolelebi ku cibasa cya kufundila eci mwaba ewu, ne mubileeje, ne Yêyè mwine mufundululukile ne mubishindike ne mbya cya bushuwa. Paanyima paa bidimu cinunu ne nkama citeema, ne nyewu tukaadi ku ndekeelu kwa Cikondo cya Ekeleeziya wa Laodikiya, Yêyè mulaye, mu Luuka 17.30 ne, Mwânà wa muntu umweumwe ewu (Yêyè ngwâkàcilaya awu) neabuuludiibwe mu matuku awu anu bu mwakadibi mu Sodoma, pa buloba. M’Mucyènzè anyi? Bidi bikengela bwa kwenzekaci anyi? Kabyena mwa kwenzeka. . . Mpindyewu, vulukaayi ne, Yêyè mmulwe mu mênà asatu: Mwânà wa muntu, muprofeta; Mwânà

wa Nzambi, Nyuma; Mwânà wa Davidi, bwa mu Bukalenge bwa bidimu cinunu. Kadi lwà munkaci amu, mutwangaji ewu, mpindyewu bilondeshile Mèyi Ende madyàmbidila, mu dituku dyabuuludiibwa Mwânà wa muntu, uDibuulula bu (cinyi? kî mbu Mwânà wa Nzambi to) Mwânà wa muntu. NeaDibuulule mu mushindu mushiilangane. Mpindyewu, aci cidi cyenza cinyi? Maalaki 4, wa cya bushuwa menemene. Nwamonu's, Mwânà wa muntu neaDibuulule, kacyi mu dingumba dinenaanenaale ne bikwabo, mutudi babipete munda mwa bikondo to, kadi Yêyè uvwa mwa kuDibuulula cyakabidi bu Mwânà wa muntu, bwa kumwenesha Maalaki 4. "Nenku mu dituku adi, Nènnùtùmìnè Eliya muprofeta, ne yèyè neakudimune myoyi ya bânà bwa kuyitangija ku Diitabuujja dya baataatu baa cipostolo, kule ne cyena mangumba cyônsò eci, ne nebaalukile cyakabidi ku Dîyi dya ku cibangidilu," bwa kupatula Muci-Mukajimusela wa matuku a ndekeelu awu wàkalayàYe awu. "Ku ib'a muloolo nekwikale Bukênkè," kî nkupicila mu dituku dya mafwima, kwikale bukênkè to; nediikale dituku didi kadiyi mwa kubiikiidiibwa ne mmundaamuunya anyi mbufuku to. Nwamonu's, cidi cyenda cyenza Mubidi. Kadi Mutu umweumwe uvwa ku Esete eku awu, ukaadi cyakabidi mu Wesete emu: "Nekwikale Bukênkè ku ib'a muloolo." Kaa, ekelekele, ndi ndyumvwa anu mwa kwimba musambu's!

Nekwikale Bukênkè lwà pa dîbà dya diloolo,
Kajila kaa ku butumbi nenukapete bushuwa;
Mu njila wa mâyi, ki mudi Bukênkè leelu,
Bajikiibwe mu Dinà Dyende dya mushinga mukole.

Bânà ne bakole, nyingalalaayi ku mpekaatu yenu yônsò,
Pashiishe Nyuma Mwîmpè neabwele bushuwa;
Makênkè a diloolo mmalwe,
Bidi bimanyiibwa ne byenzeka bulelela ne Nzambi ne Kilisto badi Umwe.

²²² Nenku Mwânà wa muntu udi munkaci mwa kuDibuulula mu bukole bumwebumwe muvwaYe amu, (kamuyi munda mwa cikondo cya ekeleziya, kupicila ku dibingishiibwa, dijidiibwa, bintu byônsò ebi to) kadi Mwânà wa muntu. Mwânà wa muntu nganyi? Dîyi! Ne Dîyi nditwe, ne bukole kupita mwele wa mvita wa nseke yibidi, ne didi dijingulula meeji adi mu mwoyi. Bivwa bikengela Yêyè kwenza cinyi? Bidi bikengela Yêyè kujaadika Dîyi adi. CidiYe mufwanyine kwenza ncinyi? Monaayi cyôci aci patudi tucimona cyenzeka apa, tangilaayi Dyôdi adi mu mmwenekelu umwèumwè uvwaYe panwapa ku cibangidilu awu, Dikunji dya Kapyà. Ekelekele! Mwikala ujaadika ne Yêyè udi Ebelu 13.8, udi mwambe ne: "Yesu Kilisto udi umwèumwè awu makeelela, leelu, too ne kashidi." Civa ncinyi? Yesu Kilisto, umwèumwè awu makeelela, uvwa Kilisto wa bwena

uvwa mu cipeela ne Mòsà awu. Mbanganyi badi bamanye ne Bible mmwambe nanku? Makeelela! Ûvwa n’Kilisto pavwa Pòlò wakula mwaba ewu leelu (nudi nwitabuuja aci anyi?) mu Dipungila Dipyadipya apu. Pashiishe Mwânà wa muntu, Kilisto umwèumwè awu, mu dituku dya ndekeelu. Nwamonu anyi? Eyo.

223 Monaayi kabidi Yone 14.12, Wakamba ne: “Byenzedi bìndi Mémè ngenza nenùbyènzè peenu.” Mifundu mikwabo yònsò eyi, cidiYe wenza ncinyi? Udi mwab’ewu mpindyewu munkaci mwa kujaadika (kaciyi cikondo cya Luther to, kaciyi cikondo cya Wesley to, kaciyi cikondo cya beena Mpenta to, kaciyi cikondo cya ba-Baptistes to, kaciyi cikondo cya ba-Presbytériens to, twafumu ku dibilondesha ne dibijaadika ku maalu malonda mu Bible; kadi cinyi?) cikondo cya Mwânà wa muntu mwikale ubuuludiibwa, bwa kubweja bintu ebi bwa kuuja Dìyì pàdì byònsò ne cya kuula. Nwamonu anyi? Tudi tucimona, ne cyòci ciine ncilelela!

224 Kadi, elaaayi meeji, ku ngenzeli yòyì yimweyimwe yakenzaYe musangu wa kumpala ayi, kî ncishindikiibwe anu munkaci mwetu twètù nkaayeetu to, kadi ncishindikiibwe kudi maalu a mamanya. Bòbò bikengela biitabe ne Cyòci aci ncyà bushuwa. George J. Lacy, mfumu wa FBI, bwa tushoonyi twa byàlà ne ma-documents, wakamba ne: “Bukênkè mbutuute ku lumwenu lwa dîsù dya cyamu cya fòtò. Mémè mwine ewu mvwa ncibiikila ne mbintu bya mu meeji, kadi,” yèyè ne, “Mukalenge Branham, cyamu cya fòtò eci kacyakukwata bintu bya mu meeji to. Ncintu ciikalepu.”

225 Ncinyi ciine aci? Mbujaadiki, bwa kukaadi ntanta mule pavwa Dikunji dya Kapyà adi diimane mwamwa mu cipuka dyanze bu mvunda, dyakula, Yèyè kwamba ne: “Kùnukù mfwanka anyi maala to, kùdi mudimu wa wèwè kwenza pawakola.”

226 Bantu kwambabo ne: “Mwânà wa balume wawa wájìmiji lungenyi.” Maamu wakaswa kubiikila ngangabuka, ne mvwa ne disaamà dya mutu unnyunguluka.

227 Kadi civwa ncinyi? Yèyè kulwa kwimana mwaba ewu kwinsi kwa musulu kwaka, ku Musulu wa Ohio, e kwamba ne: “Anu muvwa Yone Mubatiji mutumiibwe bwa kulongolola cisamba bwa Dìyì kumweneshiibwadi, ki mwikala kabidi Mukenji webe.”

228 Mushindu mwine wàkambiikilà Docteur Davis ne bakwabo abu ne mvwa “mujimije lungenyi,” bajinga bwa bòbò kungiipata mu ekeleeziya, anu bwalu ncyakapetangana nende pa bidi bitangila bayiishi bakaji ne bintu byònsò bivwa kabiyi bya mu mifundu abi. Yèyè ne: “Ki wamba peebe ne wèwè ewu neuyiishe ne nejuule ditabulujà dyàlengà buloba bujima?”

Mémè kwamba ne: “Kì mmémè to, kadi Yèyè’s ngudi mucyàmbè.”

Yèyè ne: “Billy, udi mupete cilootaloota.”

Mêmè ne: “Nêndekele karta kaanyi anu patudi twakulangana apa, nciyena kabidi wa ku nwênù to.”

²²⁹ Yèyè ngwâkaCyamba, paanyi kuCiitabuuja, ne Yèyè's nyewu wâcijaadiki. Ki luseke lwîmpè ndwôlò alu, Wâcijaadiki, mujaadike Dîyì Dyende ku Dîyì, bwalu Yèyè udi Dîyì. Nwamonu anyi? Ne Dîyì didi dyenza cinyi? Didi dimanya bwalu busokome bwa mu mwoyi. Aci ncyà bushuwa anyi? Eyo, ucijaadika mu Ebelu 13.8.

²³⁰ Nenu Yèyè neikale ne Ekeleeziya-Mukaji-musela mumane kudilongolola mu matuku a ndekeelu. “Neàcyènzè bishi, Mwaneetu Branham?” Ncyèna mumanye to. Kadi Yèyè ngudi mwambe ne Neènzè. Neacijaadike. Mubiikila bwa kupatuka mu bakwabo bônso, ncyà bushuwa, nyuunyi wa makejimizeji muvwijiibwe makejimizeji kudi Mashi Ende. Nwamonu anyi? Mubiikila bwa kupatuka, bakwabo bônso baa cisumbu cya nyuunyi aci badi babengangana Nende. Yèyè mmuweetudiibwe ne mubengiibwe.

²³¹ Kadi, nyuunyi wa makejimizeji awu, mpindyewu, nansha byôbi ne mufundi awu uvwa muswe kubengangana ne Cyôci aci bishi, yèyè's mmutupakane. Vulukaayi ne, civwa cyenze ne nyuunyi awu, ikale nyuunyi wa makejimizeji ncinyi? Bavwa bayangata yibidi, umwe bamushipa, mulum'a nyuunyi, bapongolola mashi pambidi paa mukwabo nyuunyi, ne civwa mbwa dizezula dya nsudi, ne makeji a mashi awu, wela lubila ne: “Wa cijila, wa cijila, wa cijila, kudi Mukalenge.” Nenu awu uvwa m'Mulume wetu twètù, Yesu Kilsto, wâkashipiibwa, ne Mashi Ende adi pambidi peetu, ela lubila ne: “Wa cijila, wa cijila, wa cijila, kudi Mukalenge.” Nyuunyi mikwabo yônso. . . Ndi ne disanka bu mudi dînà dyanyi diikale mu Mukanda wende; kabiyi pa buloba apa to, kadi muulu mwamwa; kabiyi pa ciseba cya mbuji to, kadi pa ciseba cya Mwânà wa mukooko. Ncyà bushuwa.

²³² Nekwikale dibiishiibwa dya bafwe. Neacishindike. Aci's ncyà bushuwa. Yèyè ngwacijaadika. Nekwikale Dyambwibwa dya Ekeleeziya. “Nebiikale bishi?” Ncyèna mumanye to, kadi Yèyè ngwacijaadika. Dîyì Dyende ndilelela. Nekwikale Bukalenge bwa bidimu cinunu. Yèyè ngwacijaadika, N'Dîyì Dyende. Nekwikale dyulu dipyadipya ne buloba bupyabupya. Yèyè ngwacijaadika, bwalu Dîyì Dyende ndidi dyambe nanku. Ne anu baakane mbiikalàmu. Yèyè ngwacijaadika, cyôci aci kabidi. Ncyà bushuwa. Anu aba batu bavwijiibwe citupa cya Dîyì edi (nwamonu's, aba biikalà citupa cyabo ne kaaba kaabo mu Dîyì edi bwa cikondo cyabo) nebiikale anu bôbò nkaayaabu biikalàmu. Bwalu, ki cidiku anu aci, Yèyè udi Dîyì. Ne mukaji utu cinyi? Cimfwanyi cya mulume. Ne Ekeleeziya udi cinyi—udi cinyi? Cimfwanyi cya Dîyì. Nwamonu's, ncyôci menemene.

Nwamonu anyi? Nenu neciikaleku, anu menemene. Anu beena kwitabuuja balelela mu Díyì Dyende nkaayaabu mbadi bamanye Eci ne mbadi mwa kuCiitabuuja. Ne Nzambi ngudi ubakwacisha bwa kucijaadika, ncyà bushuwa, bwa ne ncilelela.

²³³ Nudi mpindyewu nuCiitabuuja anyi? Nudi nuCiitabuuja anyi? Piikalabi nanku, olola cyanza ku diitabuuja ulenge civwalu Cyende, bwalu Yêyè udi upicila apa. Neajaadike ne Yêyè udi umwèumwè awu makeelela, leelu, too ne kashidi, Ebelu 13.8. “Monaayi, Ndi neenu misangu yònsò, too ne ku ndekeelu kwa buloba,” Maataayi. Ne Yêyè udi Mwakwidi Munene, bilondeshile Ebelu, Mukanda wa Ebelu, nshapita mwi4 ku mvensa wa 15: “Yêyè udi Mwakwidi Munene udi mwa kuumvwa mateketa etu amulenga.” Nudi nwitabuuja aci anyi? Olola cyanza ulenge Mukalenge. Yêyè udipu misangu yònsò: “Monaayi, Ndi neenu misangu yònsò.” Tangilaayi munda mwa bikondo. “Nujaadike bintu byònsò. Nukwate bikole ku cidi cîmpè.”

²³⁴ Mpindyewu, pawikala wa mu ekeleeziya utu kayi witabuuja ne Yêyè udi umwèumwè awu makeelela, leelu, too ne kashidi, umwèumwè mu mushindu wònsò, udisake kule nende. Jaadika!

²³⁵ Mpindyewu, tudi twamba ne Yêyè mmubiishiibwe ku bafwe. Kî mmèmè udi mucyāmbè to, Díyì edi ndidi dicyāmbè. Mbambe ne: “Yêyè mmubiishiibwe ku bafwe.” Yêyè udi wamba ne Yêyè udi umwèumwè awu makeelela, too ne kashidi. Nudi nwitabuuja aci anyi? Yêyè ngwākalaya bintu ebi ne nebyenzeke mu dituku dya ndekeelu, ne Mwānà wa muntu umwèumwè awu neamweneshiibwe.

²³⁶ Mpindyewu, vulukaayi ne, uvwa wakula ne Abraham kuntu kwakā awu kavwa n’Yesu to, uvwa mwa kujingulula meeji a Sarah paanyima Pende awu. Awu kavwa n’Yesu to, Yêyè kavwa mwanji kulediibwa to. Kadi uvwa m’Muntu mu mubidi wa buntu, uvwa Abraham mubiikile ne “Elohim, munene wa Bukole bwònsò awu.” Biikale bileeja. . . Ne Yesu wakamba ne: “Anu mwakadibi mu matuku a Sodoma,” mpindyewu tangilaayi ne ntema, “mu matuku a Sodoma, ki mwikalabi kabidi ku dilwa dya Mwānà wa muntu, piikalà Mwānà wa muntu munkaci mwa kubuuludiibwa.” Kabiciyi kabidi bu ekeleeziya to, nwamonu’s, kabiya kabidi abi to; Mukaji-musela ukaadi mubiikidiibwe, nwamonu’s. “Mu dituku adi Mwānà wa muntu neabuuludiibwe.” Cinyi? Bwa kutwangaja Ekeleeziya ku Mutu, kusangisha, dibaka dya Mukaji-musela. Dibiikila dya Mubaki nedivwile buludi ku cyôci eci, paatuuluka Mwānà wa muntu ne ulwa mu mubidi wa buntu bwa kusangisha babidi abu pamwe. Bidi bikengela Ekeleeziya ikale Díyì, Yêyè udi Díyì, nenku babidi abu badisangisha pamwe, nenku, bwa kwenza aci, nebikengele dimweneshiibwa dya dibuuludiibwa dya Mwānà wa muntu. Kayi mulombodi kampanda wa ekeleeziya to. Ncyēna—ncyēna mumanye to, ndi. . . Nudi numona cîndi muswe kwamba anyi? Nwamonu’s, m’Mwānà wa muntu, Yesu Kilisto, wikala mwa

kutuuluka mu mubidi wa buntu munkaci mwetu, ne kuvwija Diyì Dyende ditooke tòò mu mushindu wa cyòci aci cisangisha Ekeleeziya ne Yêyè balwa umwe, Mukaji-musela, ne pashiishe Yêyè ewu neaye Kumbelu bwa Didya dya Dibanji. Amen. Yêyè ukaadi musangishiibwe, nwamonu's, kutuyaaya nku Didya dya Dibanji, kî nku dibaka to. “. . . nuukutaayi munyinyi wenu. . . nwênù biine, ne minyiinyi yònsò ya bantu baa bukole, bwalu dibaka dya Mwânà wa mukooko dyafiki.” Kadi, Dyambwibwa, nkuya ku Didya dya Dibanji. Pàdì, Diyì edi didisanga ne muntu, nenku bibidi abi bilwa umwe. Ne pashiishe cidi cyenza cinyi pa dîbà adi? Cidi cimwenesha cyakabidi Mwânà wa muntu, kî mbeena teoloji baa ekeleeziya to. Mwânà wa muntu! Diyì ne Ekeleeziya bidi bilwa umwe. Cyònsò cidi Mwânà wa muntu mwenze, Yêyè uvwa Diyì, Ekeleeziya udi wenza cintu cimwecimwe aci.

²³⁷ Yêyè wakaDijaadika bishi munda mwa bikondo? Mu baprofeta, bàvwà mwa kwakula Diyì, kumanya meeji abo abu. Mushindu awu nguvwaYe umanyiibwa, cyòci aci. Ncilayiibwe ku cikondo cya ekeleeziya, kulwa ne “kabiye nansha bufuku anyi mundaamuunya to,” kadi ib'a muloolo piikala Mwânà wa muntu mwa kubuuludiibwa. Civwa mwa kulwa cyakabidi. “Nekwikale Bukênkè ku ib'a muloolo.” Nwamonu anyi? CidiYe wenza ncinyi? Újaadika Diyì Dyende.

²³⁸ Mpindyewu tangilaayi paanyima, Yêyè wakalwa bu virgo, Yêyè wakalwa bu mwakambabo, eyowa's we, wakalwila kudi virgo anyi? Wakalwa menemene anu mushindu wakambaYe anyi? Tangilaayi leelu ewu, Yêyè mmujaadike Diyì Dyende nansha kwikale búngì kaayi bwa badi kabayi biitaba diikalaku dya Nzambi, beena dyabulu, dibenga kucyuka dya maalu, Yêyè mmulwe anu kulwa, mujaadike Diyì Dyende. S'ki twètù aba, bapicile mu cikondo eci cya maekleeziya ne bikwabo, baye kule anu mukaavwabo paabo baye kule kuumukila ku Maalaki too ne ku dilwa dya Kilisto amu. Baprofeta bònsò ne bikwabo bikaavwa bijike, nenku bakaavwa babwele mu bantu baa myânzù mitumbuke ne bikwabo, kadi, anu menemene, anji tangilaayi numone ne mmuntu wa mushindu kaayi wàkatùmaYè. Anu Eliya awu menemene, mukinyi wa bakaji baa masandi, ne bavwa badilaaba bilaabu bya kwísù búngì cyanaana abu, ma-poudres ne tupenta ne bintu byònsò abi. Ne balombodi baa ekeleeziya, kadi kubashipa ne ku dyabalume ne ku dyabakaji. Úpàtukila mu cipeela, kayi udyangana mukana kumpala kwa nansha umwe wa kudibo to, kadi wamba ne: “Maasiya udi mu njila. Mêmè nêmMumanyè paalwaYe, nêmMuleeje kudi bantu. Amen. Kanwikadi nwâbanga kudyambidila ne nudi beena *cikampanda* anyi beena *cikansanga* nansha.” Bya mwomumwe menemene anu mwakenza Eliya!

²³⁹ “Nenku mu matuku a ndekeelu, nebyenzeke ne, kumpala kwa dituku dinene dya Mukalenge didi dikwacisha bwòwà

kulwadi, Nènnùtùminè kumpala kwa dituku dinene dya Mukalenge didi dikwacisha bwòwà adi kulwadi, Nènnùtùminè Eliya muprofeta, ne yêyè nealujulule Diitabuuja dya bânà kudi baataatù.” Kadi tangilaayi, Diitabuuja dya baataatù kudi bânà, beena Yuda. Nwamonu anyi? Mulayi wabo bóbò wa Mufundu, baa Bisamba bya bende ne mwaba uvwabo baponene awu. Tangilaayi nseke yibidi ayi anu ne bupwangane bwònsò, mwòmò menemene. Kadi’s ki twètù kucimona eku, Nzambi ujaadika Dîyì Dyende.

²⁴⁰ Twinyikaayi mitu yetu katanci kakese. Nzambi munanga, Wêwè wákabiisha Mukalenge wetu Yesu ku bafwe, bwa kujaadika Dîyì Dyebe, ne Yêyè udi ne mwoyi leelu ewu, cijaadika Dîyì Dyebe. “Monaayi, Ndi neenu misangu yònsò, too ne ku dikumbana dya maalu ònsò,” cijaadika Dîyì Dyende. “Yesu Kilisto, umwèumwè awu makeelela, leelu, too ne kashidi.” (Bu kaciyi “kashidi,” pàmwăpa nuwva bafwanyine—bafwanyine kulendukila pa cimwe cya ku byòbì abi.) Ncivwa mwimane bwa kucyumvwija to, Mukalenge. Kadi *kashidi*, mbamanye ne, cidi anu “kaa—kaacipoolo kaa dîbà” cyanaana. Nenu mpindyewu paanyima paa cikondo eci, kashidi kaakwikalaku kabidi to, neciikale Cyendelele. Pa nanku Yêyè uvwa Nzambi umwèumwè awu uvwa mu Mòsà ne mu baprofeta. Pashiishe kulwaYe paanyima paa cipoolo cya dîbà, ne kudimwen- . . . -sha Yêyè mwine bwa . . . kudimwenesha Yêyè mwine bu muprofeta-Nzambi. Ki pashiishe twètù kupeta cipoolo cya dîbà, ki Yêyè ùlwa kabidi. “Umwèumwè awu makeelela, leelu, too ne kashidi.”

²⁴¹ Tudi twela meeji ku ne, Solomo, mu bukalenge bwa bidimu cinunu bwa beena Yuda abu, muwva bisamba bikwabo kabiyi mwa kudidingaku kubalenga to, ne muwva dipà dinene dya Nzambi adi mu muprofeta mu mushindu wa umanyisha ne mukalenge-mukaji maalu ònsò masokome a mu mwoyi wende, kantu nansha kamwe kakayiku kashaale kalaminyina to. Cikondo cinene aci, cileeja ne cifwanyikija ne kuvwa Cíkondo cinene ciikale cilwa.

²⁴² Nenu mpindyewu, Taatù, uvwa ng’Wêwè, kavwa n’Solomo to. Úwva ng’Wêwè munda mwa Yesu, bwalu Yêyè wakamba ne: “Nzambi uvwa munda mwa Kilisto, upungisha baa pa buloba ne Yêyè mwine. Yêyè nguvva cibangidilu cya bufuki.” Mubidi Wende nguvva bufuki bupikula. Ne mpindyewu munda mwa bikondo ki ekeleeziya kujimijaye dinanga dyende dya ku cibangidilu, ne mpindyewu mu matuku a ndekeelu Wêwè kulaya bwa kubiikila kasumbu kakese kaa banyààbanyà, Kasumbu kakese kaa mikooko, ku matuku a ndekeelu.

²⁴³ Taatù, myoyi yetu ki kutupikayi eku, ne wanyi mwoyi ki kutuutawu eku, pândì ngeela meeji ku ciine aci ne mmanya ne Mèyi Ebe mmalelela, nansha dimwe dya ku Ówò kadiyi mwa kupangilaku to. Itabaku bwa bantu aba leelu ewu búmvwè

ciine aci, ne ngènzàmpèkààtù aKukebe pa dîbà edi, kumpala kwa biibi kukangiwbabi ne kakuciyi kabidi cikondo. Itabaku bwa Mukaji-musela, bu mwabangiye kupatuka mu dikàsà mu *cikampanda* ne mu *cikansanga*, swaku alukile mu dikàsà muvwa cikeena-kumona cileeje kukaadi ndambu wa mbingu amu.

²⁴⁴ Ndi nKulomba, Taatù, bwa ubeneshe mpindyewu, ne wondope babeedi. Tulùlù ntwòtò etu tuteeka mwaba ewu, mishwala ya kudi. . . bifumina ku myaba mishiileshiilangane. Nenku mpindyewu, mu Mifundu, Yôyi mmyambe ne: “Bavwa bangata tulùlù ne tulàmbà twa pa cyàdi, mishwala, pambidi paa Pòlò, ne yivwa yiya kudi babeedi, ne Nzambi uvwa ubondopa.” Mpindyewu, tudi bamanye ne twètù katwena Pòlò Munsantu to, kadi tudi bamanye ne kavwa m’Pòlò Munsantu awu to, civwa ndiitabuuja dya bantu mu ne yêyè uvwa musadidi Webe. Mukalenge, bantu aba kî mbafwanyine kulwa mu mashinyi ntanta ewu wa nkama ya kilomeeta bu kabayi biitabuuje to. Futaku diitabuuja dyabo, Mukalenge, pândi mêmè. . . ncyêna ndaaba mushwala maanyi to (Kacya Pòlò kaakayilaabaku maanyi to, ùvwa uyumusha pambidi pende), pândi mêmè mukwate mishwala eyi apa, Mukalenge, kî mbwena kwamba ne wanyi mubidi (bwalu kawena nansha mwîmpè to), kadi ncintu cipikula Cyebe, pa nanku ndi ndomba, Nzambi, bwa Wêwè kutwa diitabuuja dyabo mushinga. Swaku bwa muntu ne muntu wa kudibo ondopiibwe, bwa bwalu bwa Bukalenge bwa Nzambi. Mpindyewu, Mukalenge, Diyiisha dileedile nunku, nciyi mwele meeji ne divwa mwa kupita ndambu wa tusunsa cyanaana to, kadi ndikabwele too ne mu mêmè abidi anyi mapite ne piine apu. Mpindyewu itabaku bwa babeedi bondopiibwe, Mukalenge, bantu bamone ne Wêwè ngudi kaaba aka, ne ncyêna anu mwambe cyôcì eci mu mêmè to. Ng’Wêwè, Mukalenge. Ndi ndomba mu Dîna dya Yesu. Amen.

²⁴⁵ Mpindyewu, mu tusunsa tutwe ku dikumi cyanaana. Ncyêna mumanye. . . (Ukààvwa—ukààvwa mwabanye tukwabo mwaba ewu, anyi civwa ncinyi?) Billy wâmbì ne úkaavwa mwabanye ndambu. Mêmè nguvwa mumwambile bwa kucyenzaye mu dinda emu. Nenku ndi mfuma ku dibwelela lwà kumfundu kwaka mu tusunsa tukese emu, kadi ncivwa mupete mushindu wa kumukonka to, bu mûmvwà nyiikilangana ne Mwaneetu Ben ne bakwabo lwà kwine aku. Ncivwa mupete mushindu wa kumwambila to. Mmungambile anu cyanaana ne mmwabanye twarta twa disambila. Karta kaa disambila B, lukama. . . (Umwe too ne ku lukama anyi?) B. Ee, tuyaayi, ndi ngeela meeji, karta kaa disambila nomba umwe, B. Nganyi udi mupete B? Udiku mwa. . . Bu wêwè mwa kujuukilaku kuulu, ela cyanza muulu, pawikala mwa kwendela kuulu. Mukaji kampanda lwà mundekeelu mwamwa. Eyo, B, nomba umwe, nomba ibidi, isatu, inaayi, itaanu, vwilaayi *eku* nunku. Nenku nêndombèku bâna bakese aba ní mbafwanyineku kulwa buludi banyungulukila lwà

paanyima paa cibumba cya ku cyambilu apa bwa kusòmbelabò kaaba aka mpindyewu. Eyo. Mpindyewu, mpindyewu ndi nnwambila ne, batumaayi, nwênù ndaayi nupicile anu mu kajila mwamwa, nwênù badi ne umwe too ne ku itaanu abu, picilaayi buludi lwà kwòkò aku kadi nulwe nwendq nupweka. Badi mu kajila mwamwa baba, piikalabo ne mushindu, baalukile biikale banyungulukila apa batangile ku myaba yabo. Mpindyewu, bânà bakese bàdi basòmbe apa aba, lwâyi nunyungulukile lwà paanyima paa cibumba cya ku cyambilu apa. Ndi muswe bavwile lwà apa, bantu abu, bwa mmona mwa kubasambidila.

²⁴⁶ Mpindyewu, twänjì tumonaayibi mpindyewu. Ndi mmona. Ndi mubiikile cinyi, umwe too ne ku itaanu, kî mmwômò anyi? Umwe, ibidi, isatu, inaayi, itaanu. Umwe... Muntu yònsò udi ne karta kaa disambila kuntwaku, umwe too ne ku itaanu, èlè cyanza muulu, tumonebi ní mbiimanyine kuulu bònsò. Kudi umwe, babidi, basatu, banaayi. Nkumpangike umwe. Umwe, ibidi, isatu, inaayi, itaanu, mu B. Nudi bònsò umwe, ibidi, isatu, inaayi anyi? Umwe, ibidi, isatu, inaayi anyi? Itaanu udi penyi, B? Itaanu, pinganyina lwà kwaka naka, wèwè inăbànzà. Eyo, mukalenge, nyungulukila lwa kwaka naka. Ki mudibi nanku. Nyungulukila buludi kadi walukile, itaanu. Isambombo, mwandamutekete, mwandamukulu, citeema, dikumi. Eyo, B, karta kaa disambila isambombo, mwandamutekete, mwandamukulu, citeema, dikumi. Nwamonu's, tudi twenza nunku, pa dîbà adi kanwena nupeta lutatu pashiishe to. Isambombo, mwandamutekete, mwandamukulu, citeema, dikumi. Mpindyewu ngaapeci... ngeela meeji. Udi ne karta anyi, mukalenge, wèwè udi mwimanyine lwà apa nunku ewu? Mwandamutekete anyi? Eyo, ndaaku anu buludi kwaka naka, uye anu naabo. Ndi mupete anu tubidi, ngeela meeji, mwaba awu. Eyo, isambombo, mwandamutekete, mwandamukulu, citeema, dikumi, karta kaa disambila isambombo, mwandamutekete, mwandamukulu, citeema, dikumi. Ndi mupete anu tubidi, ki... Udi naaku anyi, mukalenge? Eyowa's. Ki bôbò aba's. Dikumi, dikumi ne umwe, dikumi ne ibidi, dikumi ne isatu, dikumi ne inaayi, dikumi ne itaanu. Mpindyewu atu ntufwanyine kwikala umwe, ibidi, isatu, inaayi, itaanu. Eyo, dikumi ne isambombo, dikumi ne mwandamutekete, dikumi ne mwandamukulu, dikumi ne citeema, makumi abidi. Umwe, ibidi, isatu, inaayi, aku. Eyo, makumi abidi, makumi abidi ne umwe, makumi abidi ne ibidi, makumi abidi ne isatu, makumi abidi ne inaayi, makumi abidi ne itaanu. Umwe, ibidi, isatu, wèwè nyungulukila lwà kwaka naka, mukalenge, nyungulukila anu nunku, ubwele mu mulongo, makumi abidi ne itaanu, makumi abidi ne itaanu. Mukwacishaayiku kuntwaku, apatukile luseke lwònsò ludiye muswe alu. Monaaku kuneeku, mwaneetu wa balume, apa nunku, nyewu bakukangwile njila mwaba ewu. Bantu nyewu bakukangwile njila mwaba ewu. Muntu amukwacisheku lwà

kuntwaku, piikalaku mushindu. Mulekelaayi anyunguluke kadi abwelele mu mulongo kuntwaku. Nyawu nzwambila, musòmbèshaayi anu kuntwaku, nenku piikala nomba wende mubiikidiibwe, numujuudilaayi anu kuntwaku. Nwamonu anyi? Piikalaye mufike mu nomba kampanda, numubwejaayi buludi mu mulongo. Eyo, ngeela meeji ne búngì abu mbufwanyine—mbufwanyine kukumbanaku bwa mpindyewu.

²⁴⁷ Mpindyewu, mbanganyi mwab'ewu badi kabayi ne karta kaa disambila, kadi biikale ne dyeyemena, wêwê mwikale—wêwê mwikale anu mutwishiibwe cya bushuwa ne Nzambi udi mwa kwondopa babeedi? Ela cyanza muulu. Nudi nzwitabuuja nanku anyi? Mbanganyi baa kunudi eku badi bafumine. . . badi bamanye ne mêmè ncyêna mumanye kantu nansha kamwe pa bidi binutangila, ne ncyêna mumanye màsaamà enu? Kudi—kudi bantu mwab'ewu mpindyewu, tabernacle wanyi ewu, bwa wêwê wa ku beenyi, kakwenaku muntu mwine ûndì mwa kumona, pa kuumusha bambi aba. Anu lwà kwinshi kwaka nkùndi mmona muntu kampanda ûndì njingulula. Ncitu ntamba kwikala mwaba ewu to, nwamonu's, kadi badi anu bantu badi balwa mwab'ewu bafumina myaba yònsò. Mbanganyi muneemu emu. . . Indilaayi nnujaadikileci. Mbanganyi mwab'ewu badi bamanye ne mêmè ncyêna mumanye kantu nansha kamwe keenu nwênù? Elaayi byanza muulu. Tangilaayi kuneeku. Nwamonu anyi? Nwamonu anyi? Aci nyanza cyebe kumpala kwa Nzambi, udi umona's. Ncyêna mumanye kantu nansha kamwe pa bôbò to. Mpindyewu, ncyêna mumanye ní ndi mufwanyine kupeta muntu mubiikila mu mulongo wa babeedi mushindu ewu, ûndì mumanye bîmpè to, kadi ncyêna anu mufwanyine kumanya cidiye muvwile apa to. Nwamonu's, ncyêna mufwanyine kumanya cidiye muvwile apa to.

²⁴⁸ Mpindyewu cîndì nteeta kwenza mbwa kunufikisha ku dimona eci, mpindyewu tangilaayi: “Byenzedi bîndì Mêmè ngenza nenûbyenzè peenu.” Nudi nzwitabuuja nanku anyi? Nudi nzwitabuuja ne Yêyè neajaadike Dîyì adi anyi? Eyo. Wákamba ne NeaDibuulule bu Mwânà wa muntu kundekeelu kwa cikondo cya ekeleeziya anyi? Mbanganyi? Ne buloba nebwikale bufwanangane, nebwikale mu mmwenekelu wa Sodoma ne Gomola anyi? Nudi nzwitabuuja nanku anyi?

²⁴⁹ Mpindyewu, Billy, bwa cinyi kuyi ubalekelaku bavwila anu lwà mwaba ewu ewu? Eyo, mbîmpè. Ee, eyo, mbîmpè.

²⁵⁰ Ku—ku ndekeelu wa cikondo, Yêyè uvwa mwa kuDibuulula. Mpindyewu, tangilaayi, nudi nufika ku dyumvwa ne, pa dîbà adi, eci ncintu cidì kaciyiku mwa kwenzeka anyi? Mpindyewu, bantu mbôbò aba biimane mu mulongo ewu, bântù kacya nciyiku mwanji kumona kacya bandela. Bantu mbôbò abu basòmbè aku nanku, bântù kacya nciyiku mwanji kumona to. Kadi, vulukaayi ne, Ebelu 4.15, ngeela meeji nyêyè, udi mwambe ne “Yêyè udi Mwakwidi Munene mpindyewu udi mwa kulengiibwa

kudi mateketa etu.” Ncya bushuwa anyi? Mpindyewu, piikalaYe Mwakwidi Munene, pa dîbà adi’s Yèyè udi Ebelu 13.8, pa dîbà adi: “Umwèumwè awu makeelela, leelu, too ne kashidi.” Ncya bushuwa anyi? Mpindyewu, Yèyè mmufwanyine kuDibuulula bishi? Anu bu mûngânwâmbidî ne, Yèyè utu misangu yônsò wakwila anu ku baprofeta Bende. Yèyè ùtu misangu yônsò anu utuma mu—mu—mu—mukenji kumpala kwa dilumbulwisha. Bintu byônsò, Yèyè katu ushintululaku mushindu Wende to.

²⁵¹ Wakangata dipangadika mu budimi bwa Edena, mushindu uvwaYe mwa kusungila muntu, ku mashi meela panshi a kampana uvwa kayi mwenze bubu. Kacya Yèyè katu mwanji kucishintululaku to. Twètù mbadi bateeta bwa kucishintulula, ku dilongeshangana dya tulaasa, ku tuleyi twa Baabele, ku bimenga binene, ne ku byônsò bya mushindu awu. Tudi tuteeta bwa kucishintulula, kadi kabiyi bikumbanaku to. Tudi tuteeta bwa kucishintulula, mu kufikisha baa pa buloba kudiYe mu dibalongesha dya tulaasa. Tudi tuteeta bwa kucishintulula, ku dingumba dya bantu. Kacya kacituku cyanji kukumbana to. Kudi mwaba anu umwepele udi muntu mwa kusungila bwa kukuukwila, mmwinshi mwa Mashi. Mangumba enu awu neanutapulule, kadi mwinshi mwa Mashi nudi umwe. Yèyè kacya katu ushintulukaku to.

²⁵² Mpindyewu, piikalaYe Mwakwidi Munene utu kayi ushintuluka awu, ne umwèumwè awu makeelela, leelu, too ne kashidi, pa dîbà adi’s Yèyè mmwenzejiilbwe bwa kushaala mukwate ku Dîyî adi. Kî mbwalu twètù mbadi bambe ne Yèyè wakacyenza to, bwalu *Yèyè* ngudi mwambe ne Neàcyènzè. Nwamonu anyi? Mpindyewu, mpindyewu, Yèyè mwenze ciine aci. . . Mpindyewu, anji imanaayi kakese, nwèlè meeji. Mpindyewu, mbanganyi baa kunudi mu mulongo wa babeedi ewu badi bamanye ne mêmè ncyèna mumanye kantu nansha kamwe pa bidi binutangila, pa disaamà dyebe? Pa dîbà adi elaaku cyanza muulu, udi mumanye cîndi. . . Mbanganyi mu mulongo wa babeedi wawa badi bamanye ne mêmè ncyèna nansha munumanye? Elaayi byanza muulu.

²⁵³ Tangilaayi mu bateeleji, nwamonu’s. Mpindyewu, nwènù badi amu nanku abu, kabyena anu bikengela bwa nwènù kwikadila apa to, lengaayi nwènù anu ciwwalu Cyende cyanaana. Akula anu cyanaana, wamba ne: “Mukalenge Yesu, ndi muKwitabuujje.” Mpindyewu amba ne: “Ndi mwitabuujje Cyôcì aci. Ne ndi—ndi ngiitabuujja ne—ne Wèwè udi mwa kubuulwila Mwaneetu Branham, bwalu. . .”

²⁵⁴ Mpindyewu, kî nne mbwalu m’Mwaneetu Branham to, yèyè mmuntu anu wetu wa patupu ewu. Kadi pâmwâpa bu Dyambwibwa mwa kulwa mu dinda emu. . . Udi wela meeji ku Dyambwibwa? Bu Dyambwibwa mwa kulwa mu dinda emu, ndi ngamba nunku mu didipwekesha, kakuyi mpatâ to ne cyabibidi cimwe cya disangisha edi, bu twètù mwa kuya bilondeshile ku—

ku mapolome, bilondeshile ku myaba yivwa yikengela twêtu kusanganyiibwa ayi, cyabibidi cimwe cya kunudi's ncifwanyine kunyiila mêmè kumpala. S'ncyá bushuwa. Ncyêna . . . Tangilaayi bujitu bûndi mwambule, ne mushindu wûndi—mushindu wûndi mbwambula ne mapeepelela. Mêmè's ndi musadidi wa Kilisto udi kayi dikwacisha ditambe bunene to, pa kumanya cîndi mumanye pa bidi biMutangila kadi kwikala ne nsòmbelu wûndi nende ewu; kayi wa masandi to, kayi wa bukooya to, kacyi cintu cya mushindu awu to, Nzambi mmumanye ne aci ncilelela. Nwamonu anyi? Ndi nditacisha bwa kwikala ne nsòmbelu mululame, kadi ndi—ndi—ndi mumweke anu bu nciyi mwa kufikishaku cintu ciine ku cibungubungu to. Pàmwápa bu ne civwa mmuntu kampanda mukwabo, pàmwápa mwikale mulonge tulaasa tutumbuke menemene anyi cintu kampanda, uvwa mufwanyine kucifikisha kudi bantu. Kadi pa dîbà adi's meeji adi alwa ne, kî mbantu bônso bààcipetà to, twamb'eku twamb'eku. Nwamonu anyi? Nwamonu anyi? Nwamonu's, Yêyè ngudi mumanye cyenzaYe. Pa nanku mêmè ndi anu ndifila kudiYe ngamba ne: “Mukalenge, ndi mu byanza Byebe, enza naanyi mùdi Wêwè mumone ne mbikumbane amu.” Mpindyewu, piikalabi ne Yesu Kilisto udi umwèumwè awu makeelela too ne kashidi . . .

²⁵⁵ Mpindyewu, ndi ngeela meeji ne ndi mumanye mukaji ewu. Ncyêna mwa kuvuluka ne nganyi mwine ewu to, kadi ndi mumumanye. Ndi mumumanye, mushindu kampanda anyi kansanga. Kadi nkaadiku mumone mpala wende, kadi ncyêna—ncyêna mumanye ne nganyi to bwa pa dîbà mene edi. Kadi ndi—ndi—ndi mumumanye, mushindu kampanda anyi kansanga. Wêwè kwêna mumumanye anyi? Uh-huh. Mvwa—mvwa ndyambidila ne, pa kutangila mpala wende, mvwa ndyambidila ne mvwa mumumanye, kadi ncyêna mwa kwamba ne nkampanda to. Kadi ndi ngeela meeji ne yêyè . . . Bayeebe katuku . . . Kî ngwêwè ewu mukaji utu wenza mudimu ku . . . Bayende utu wenza mudimu ku Seven—Seven—Seven . . . anyi ku Seven-Eleven, anyi cintu bu nanku awu, lwà mu New Albany mwamwa. Mandamu Agan, mmwômò. Mpindyewu, utu mulwe mwab'ewu, mulwe mu ekeleeziya. Roy, kî nyêyè awu utuvwa bayiile dituku kampanda pa . . . Nyêyè—nyêyè utu pa mukuna awu anyi? Wamba ne? Mwanaabo wa bakaji. Úvwa, mmushindu awu, nwamonu's. Ndi mvuluka ne Roy ne mêmè tuvwa twenda tuya mu mashinyi, ki kuteelaye dîná adi, nenku Mukalenge kuntumaye kwòkò aku ne kwondopaye mukaji awu anu pa cibanza. Eyowa's, mukalenge, nenku nyewu mfuma ku divuluka's.

²⁵⁶ Mpindyewu, kadi bwa kumanya ne cidid cikutacisha ncinyi, ncyênàku ne cingenyinyenyi to. Nudi bamanye aci. Kadi bu Mukalenge Yesu mwa kumwambila cintu kampanda cidide mwenze. Anyi piikalabi pàmwápa ne yêyè udi—yêyè udi ne

lutatu lwa lutangila mfranga. Pàmwápa yéyè ne bayende biikale ne lutatu kampanda, pàmwápa yéyè ne bânà bende, pàmwápa umwe wa ku bânà bende, piikalaye ne bânà, mêmè ncyêna mumanye to. Kadi piikalaye naabo, pàmwápa bamwe baa ku bânà bende biikale—biikale banyeema kumbelu. Pàmwápa yéyè mmwimane mwaba ewu ukeba kumanya cintu kampanda pa bwalu abu. Mêmè ncyêna mumanye to. Ncyêna ne mushindu wa kumanya to. Ncyêna—ncyêna—ncyêna mumanye to. Kadi Yéyè mmumanye. Nwamonu anyi? Pa nanku, nudi numona's. Nudi numona anyi?

²⁵⁷ Teelejaayi, mpindyewu kwataayi bwalu ebu ne ntema yònsò. Kacya nciwu mwanji kwambaku bwalu ebu munkaci mwa bateeleji kumpala kwònsò eku to, kadi nyewu ndyumvwa mulombodiibwe bwa kubwamba mpindyewu. Díyì ncinyi? Mmeeji mapatwila mukana. Mpindyewu, mmushindu kaayi wúndì mêmè mwa kupatwila meeji ende yéyè mukana, anyi mmushindu kaayi wúndì mêmè mwa kumupatwila mukana mwanyi cidì meeji ende yéyè? Nebikengele ciikale amwe a ku meeji miikale maleejiibwe, kadi yéyè kèna mwa kucyenza to. Pa nanku bikengela mêmè kupatwila meeji Ende mukana mwanyi, nenku cyôci ciikale cya bushuwa . . . Cyôci ciikale meeji a Nzambi, neciikale cya bushuwa; cyôci kacyi meeji a Nzambi to, pa dîbà adi kacyakwikala cya bushuwa to; yéyè ki wacimanya, nwênù nenucimanye, bònsò nebacimanye. Nwamonu's, kakwena anu mushindu wa kucicinguluka to. Bikengela ciikale Nzambi anyi kacyi Nzambi to. Ngàsà Wende ngudi mukumbane. Mpindyewu itabuujaaayi, mpindyewu, muntu ne muntu.

²⁵⁸ Nenku mbanganyi biikalà mwa kwitabuujaa? Ee, pàmwápa kacya kanutu banji kumonaku dimwe dya ku masangisha aa kwònsò eku to, kadi nenwitabuuje piikala Nzambi mwa kwenza aci anyi? Ne pashiishe nwênù badi aku nanku mpindyewu abu, nwênù biikalà kanuyi mu mulongo wa babeedi abu, nu—nusambilaayi, nwênù peenu, nwamonu's. Anyi, mene ne, pawikala ulwa mu disambila, nansha wèwè mwikale nganyi, sambila wèwè anu cyanaana.

²⁵⁹ Mukalenge Yesu, mpindyewu nyewu ngàngàci dîbà búngì cyanaana, kadi mmudimu Webe, Mukalenge. Kadi ngènjì byònsò mu buumuntu mùmvwà paanyi mwa kwenza amu, kadi Wèwè ngudi Nzambi, mpindyewu byàshàadi bidi mu byanza Byebe, Taatù. Bìmanyiibwè ne Wèwè ki udi Nzambi, ne Díyì Dyebe ndilelela. Jaadikaaku Díyì Dyebe, Mukalenge, dya mu dituku dya ndekeelu edi paabuuludiibwa Mwànà wa muntu. Mmunyi mwakaDimanyishaYe? Yéyè uvwa Díyì. Díyì ncinyi? Dijinguludi dya meeji ne mapangadika a mu mwoyi. Yéyè wakajingulula meeji abo, kwambila Peetelo, Filipino, Natanaela, mukaji wa ku ciinà cya mâyi awu, bakwabo bònsò abu kuntu kwaka, ne pavwabo bafwanyine kulwa, mumanye ne mwànà mutekete wa bakaji awu uvwa mulaale tulu, kayi mufwe to. Nyewu ndomba,

Nzambi, bwa Wêwè kukwata mudimu ne ntenta midipwekeshe ya mibidi yetu eyi leelu ewu, ya cisòmbedi cya pa buloba eci eyi, bwa Wêwè wamona mwa kuDimanyisha. Mu Dîna dya Yesu Kilisto. Amen.

²⁶⁰ Mpindyewu bwa kwondopa, mêmè ncyêna mwa kwondopa to, aci nudi bamanye. “Dipà ncinyi, Mwaneetu Branham, ncintu kampana cyûdi wangata anyi?” To. Ncintu cyûdi mumanye mwa kudyumusha wêwè mwine mu njila. Nwamonu anyi? Bwa paucidi wêwè anumu apu, dyôdi kadyakukwataku mudimu to. William Branham ki mwena lukuna mutambe bunene ûndiku paanyi nende. Nwamonu anyi? Kadi pândi mmuusha mu njila, nwamonu’s, pa dîbà adi Yesu Kilisto udi mwa kukwata mudimu ne mubidi. Nwamonu anyi? Nwamonu’s, mpindyewu, ngaafiki padi mukaji wawa. Ncinyi mpindyewu? Mpindyewu ambaayaaku tûng bu—bu ne yêyè—bu ne yêyè usaama.

²⁶¹ Inăbànzà nyêyè ewu mwikale ne mukolo mutenteka pa—pa nkwasu. Mpindyewu, bu ne mêmè. . . bu ne Yesu uvwa mwaba ewu, ne Yêyè kupweka e kutentekela mukaji wawa byanza, mukolo wawa’s uvwa mufwanyine kwondopiibwa. Kakwena mpatà nansha mikese to bwa cyôci aci. Kadi, nudi numona’s, twêtù tudi bantu biikale ne byanza bya bukooya. Byende byanza mbya cijila, Nzambi wakaMushindika. Yêyè uvwa Dîyi. Nudi nwitabuujja aci anyi? Bushuwa, Yêyè kavwaku ne mpatà nansha mikese to. Mmufwanyine Yêyè kumutentekela byanza, kwamba ne: “Mwanaanyi wa bakaji, ondopiibwa,” pende mufwanyine kwondopiibwa. Kadi Yêyè’s mmututume ne mudimu wa kwenza cintu cimwecimwe aci. Ngeela meeji ne Yêyè mmucimanyishe bitooke tòò.

²⁶² Mpindyewu, kadi bu Yêyè mwa kumpa mêmè cikeena-kumona, ne kwambila mukaji ewu cintu kampana cya dyaenza? Bwa aci, ee, ndi ngiitabuujja pa dîbà adi ne bu mêmè mwa kumutentekela byanza, mmufwanyine kwondopiibwa. Nudi nwitabuujja aci anyi? Kadi bu Yêyè kayi mufwanyine cikeena-kumona? Cidi cikeena-kumona cifwanyine kwenza ncinyi? Anu kumpa mêmè diitabuujja’s. Kusambulujja diitabuujja dyanyi mêmè adi, bukole bwa Nzambi budi kabuyi bumweneka abu. Nwamonu anyi? Mpindyewu, nwênù, bu muntu ne muntu wa kunudi mwa kufwa mu kasunsa emu mene, kwêna mufwanyine kumonaku *wêwè* webe awu ushiyangana ne mubidi webe to. Byeledi byebe byônsò bya meeji abi, cyônsò cyûdi wêwè aci ncifwanyine kuumuka, kadi kuji mufwanyineku kucimona mudici cyumuka to. Nwamonu anyi? Ncifwanyine kwikala kacyi cimwenek- . . . Bukole bùdi bûmpèèsha mushindu wa kunyungisha byanza byanyi abu, mbukole kampana, kî mmwômò anyi? Bukole bùdi bufwanyine kumpa mushindu wa kwela meeji abu, bukole bùdi bûmpèèsha mushindu wa kuyiisha abu, bukole bùdi bwènzà ne ngiikale ne mwoyi abu, bùdi bûngenzejà maalu abu, bukole bumwebumwe bùdi mwa kukankamika

mubidi ewu abu mbufwanyine kushiyangana naawu kadi wêwê kuyi mufwanyine kumona bukole bwine abu mudibu buumuka to. Mbukole budi kabuyi bumweneka. Ki mudi kabidi diitabuuja! Eci kacinupiciku to. Diitabuuja! Ne Yesu wakamba ne: “Nebatentekele babeedi byanza.” Mpindyewu, nwamonu’s, bu mêmè mwa kuya ne kupeta cikeena-kumona ne kamutentekela byanza, ndi ngiitabuuja ne yêyè neondopiibwe, bwalu ndi mumone cikeena-kumona, dyeyemena dyanyi didi mu cikeena-kumona aci. Kadi bishi bwa Dîyi? Kumutentekela byanza mwikale ne diitabuuja dimwedimwe adi. Cikeena-kumona ncifidiibwe anu bwa kukankamika diitabuuja dyanyi ne diitabuuja dyebe. Mwikale ne diitabuuja dimwedimwe adi kakuyi cikeena-kumona to, nebiqwate mudimu mushindu anu umweumwe awu. Bamwe bantu mbapeebwe diitabuuja dinene. Bakwabo kabatu ne diitabuuja dya mushindu awu to, mbapeebwe bikeena-kumona bwa kubapa diitabuuja adi. Nwamonu anyi? Mpindyewu, nwamonu’s, mbifwanyine kwikala anu byanza bimwebimwe bya bukooya abi, ciikale muntu anu yêyè umweumwe awu, kadi mwikale anu umutentekela byanza cyaanaana.

²⁶³ Mpindyewu, Nyuma Mwîmpè ashindiketu Bwikadi Bwende, ashindiketu Dîyi Dyende dyakalayaYe. Mpindyewu, dîna dyebe ndyedi dyâmpù ne mwoyi’s. Dîna dyebe nganyi apa’s, mpindyewu? Agan. Ee, Yêyè uvwa mwa kwikala mungambile ciine aci bu ne Úvwa muswe kungambila, nwamonu’s, kadi mvwa anu ngamba ne ndi—ndi mumanye ne ndi mukumanye. Mpindyewu, anji vwila anu apa kakese, pawîpi ndambu, kudi bantu biimane kuntwaku biikale basambila, udi umona’s. Aci cidi... Mpindyewu, Mandamu Agan, piikalabi—piikalabi ne ndi musadidi wa Kilisto, ne mwikale muyiishe Dîyi dîndî ngiitabuuja ne didi Bulelela edi, wêwê udi witabuuja aci anyi? [Mandamu Agan udi wamba ne: “Eyo.”—Muf.] Udi uciitabuuja. Mpindyewu, pawikala ne dijinga dya cintu kampanda, mêmè kî ngudi mufwanyine kukupeeshaci to, bwalu ncyêna naaci cya dipeeshangana to; amba anu pâmwâpa nî mbwa ndambu wa mfranga anyi cintu kampanda, anyi ne ndi mufwanyine kuya kaakula ne bayeebe anyi ne bânà beebe anyi ne bananga beebe anyi cintu kampanda, ncîndî mufwanyine kwenza. Kadi byôbî ne udi dijinga ne dyondopiibwa, mêmè ncyêna mufwanyine kukupeeshadi to, adi ndimana kukusumbila. Kadi ku dipà kampanda, ndi mwa kukufikisha ku dijingulula, pawikala ne diitabuuja, ne dikaadi dimana kukusumbila, bwalu Yêyè mene wâkakusumbilati awu, Yêyè mene umwepele ûdî wêwê ewu mufwanyine kwitabuuja awu, m’Mwânà wa Nzambi. Musumbi awu mmwimane kaaba aka. Wamonu anyi? Ncya bushuwa anyi? Musumbi awu udi kaaba aka.

²⁶⁴ Mpindyewu, udi mummanyè mêmè bu mwaneenu wa

balume, mwambi, ne mêmè ndi mukumanye bu mwaneetu wa bakaji. Tudi baMumanye Yèyè bu Nzambi. Mpindyewu, Kampanda udi kayi umweneka awu, ku dipà dîndî naadi dya kudyumusha mêmè mwine mu njila adi, bu Yèyè mwa kungambila, kukwambidila wêwè kûndî mêmè, ku mishiku yanyi, wamonu's. Mpindyewu, pândî nsambila, Nzambi kêna ummona mêmè to, Ûdi umvwila anu dîyî dyanyi mu Mashi a Yesu. Wamonu's, Kêna ummona mêmè to, Ûdi umvwa dîyî dyanyi. Nenku Mashi awu mwaba awu mbwa kuleeja cîndî mêmè ndomba. Wamonu anyi? Nenku Yèyè udi umvwa dîyî dyanyi, kadi Ûdi umona anu Mashi. Wamonu's, Kênà ummona mêmè to, pa nanku ncyêna mwa kwikala ne bukooya pândî mwinshi mwa Mashi apu to. Mashi adi akezula. Wamonu's, Yèyè udi cikandiki pankaci paanyi mêmè ne Nzambi, ne wakalaya ne: "Nulombe Taatù cintu kana cyònsò, Mêmè nêncyenzè." Ûdi witabuuja aci ne ncilelela anyi?

²⁶⁵ Mpindyewu, bu muntu ne muntu... mbimweke bu ne... Nudiku mwa kumona cidî munkaci mwa kwenzeka aci anyi? Tangilaayi, cidî cibwela muneemu eci, Bukênkè, bwa kalaabi kabwicidile, bwenda anu bunyunguluka.

²⁶⁶ Mpindyewu yèyè kî mmufwanyine kucisokoka to bu ne bivwa bikengela yèyè kucisokoka. To, to. Wêwè udi kaaba aka bifumine ku bipeta bya cintu kampanda cidî cikwenzeketele. Utu musaame dîsaamà dya bisulusulu, nenku wêwè kubwela mu lupitaadi. Uvwa upuuyakeena ku mbombone. Nenku cyûdî usaama mbipeta bya cyôci aci. Neûmvwè bîmpè. Yesu Kilisto neakwondope, ndi mmona aci. Tungunuka, mwikale uciitabuuja. Tungunuka, mwikale uciitabuuja, Mwaneetu wa bakaji Agan. Mêmè ndi nkutentekela byanza, mu Dîndî dya Yesu. Nzambi akubeneshe, mwaneetu wa bakaji. Ndaaku, ikala ne disanka mpindyewu, kwedi mpatà ku cidîYe mwambe nansha.

²⁶⁷ Wetwawu, mwaneetu wa bakaji! Ncyêna—ncyêna ngeela meeji ne ndi mukumanye to. Katwena bamanyangane to. Mpindyewu, muntu mukaji nyèyè ewu ûndî nciyi mumanye to. Ncyêna mukumanye to. Ncyêna ne mushindu wa dikumanya to. Kadi udi witabuuja ne Nzambi mmufwanyine kunsokolwela, ku Dîyî Dyende, bu mudibi ne, wamonu's, bu mudibi ne Yèyè ngudi mulaye anyi? Udi witabuuja ne Yèyè mmufwanyine kungambila cintu kampanda cidî cikutangila anyi? Ne ciine aci ncifwanyine kukufikisha ku diciitaba, ncyà bushuwa anyi, umanya ne kî ncifwanyine kwikala mêmè to, mwaneenu wa balume ewu, ncifwanyine kwikala Yèyè, Musungidi webe. Udi witabuuja aci anyi? Udi mwindile dipandiibwa. Mbakwambile ne bidî bikengela bwa kukupandabo. Udi witabuuja ne Yèyè udi mwa kungambila cidîbobo bakupandila anyi? Mmu cifu, ne mu mala. Ncyà bushuwa menemene. Wêwè udi ujinga kwepela cyôci aci. Udi witabuuja mpindyewu, ne Nyuma ewu mwaba ewu, Nyuma wa Kilisto udi mutunyungulukile

ne udi mwimane pa mêmè ewu...? Udi mumanye ne bivwa bikengela cintu kampana cikwambile, bwalu mêmè ncyèna mukumanye to. Udi witabuuja ne, ku ditentekela dya byanza, aci ncifwanyine kusambulujia diitabuuja dîndi mêmè ngiitabuuja edi, ne wêwè ne dyebe diitabuuja, ne kumpala kwa Nzambi, Taatù wetu, ne newondopiibwe anyi? Nanku awu, Mukalenge Yesu, ndi mêmè ntumikila mêtî Ebe matuma, paWakamba ne: “Bimanyinu ebi nebifile badi biitabuuja. Bôbò batenteketele babeedi byanza, babeedi nebasangale,” swaku bwa mwaneetu wa bakaji ondopiibwe bwa butumbi bwa Nzambi; mu Dîna dya Yesu. Amen. Mpindyewu tungunuka, kwikadi, cipwèku anu mwoyi, wamonu’s, tungunuka anu ne kwitabuuja nanku ne mwoyi webe wônsò.

²⁶⁸ Wetwawu! Ndi ngamba aci anu bwa kulenga nyuma webe, inâbânzà. Anu mwakenza Yesu ku ciinà cya mâyi amu, wamba ne: “Ntwàdîlèku mâyi a kunwa.” Mpindyewu, ndi ngeela meeji. . . Ncyèna ngeela meeji ne kacya nkaadiku mukumone to, ndi ngeela meeji ne udi mwenyi kûndi. Ncyà bushuwa anyi? Nî ncyà bushuwa, ela cyanza muulu bwa bateeleji bapete mushindu wa kumona. Ncyèna mumanye inâbânzà ewu nansha.

²⁶⁹ Ki dyondopa dishuwashuwale ndyôdi edi, ndiitabuuja dishuwashuwale, Mufundu mushuwashuwale, Dîyi dya Nzambi kadiyi disambakaja dimweneshiibwe ne dijaadikiibwe ne Yêyè kî mmufwe to. Yêyè udi ne mwoyi kashidi ne kashidi. “Ne ewu udi ungiitabuuja Mêmè, byenzeni bîndi Mêmè ngenza yêyè neâbyênzè pende, ne yêyè mwena kwitabuuja ewu neatenteketele babeedi byanza ne bôbò nebasangale.” Kaa, mmunyi mùdi mwa kucyela mpatà? Nwamonu anyi? Mpindyewu, Yêyè nguvwa mumanye ne nganyi udi mufwanyine kucyenza ne nganyi udi kayi mufwanyine kucyenza, kî mmêmè to. Aci nciMutangile Yêyè.

²⁷⁰ Kadi mpindyewu piikalabi ne inâbânzà ewu mmwenyi. . . Mêmè ncyèna mumumanye to, nciitu mwanji kumumonaku to kacya bandela. Mmukaji mutekete, mwânà bikole—bikole kûndi mêmè. Kadi mêmè—mêmè nciitu mwanji kumumonaku to. Kadi yêyè mmulwe mwaba ewu mu kiipacila kampana. Udi witabuuja ne bintu bîngààlongèshî mu Bible ebi, inâbânzà, bidi Bulelela anyi? Udi witabuuja ne bidi Bulelela. Ne udi uCiitabuuja, kabiyi ne bwalu mmêmè waCyâmbî to, kadi bwalu n’Nzambi udi muCyâmbè anyi?

²⁷¹ Nudi nwiitabuuja ne tudi ne mwoyi mu matuku a ndekeelu muvwa Mwânà wa muntu ne cya kumweneshiibwa anyi? Aci ncifwanyine kwikala Dîyi dyônsò didi disangisha pamwe kupicila ku Luther, Wesley, ba-Baptistes, ne bônsò abu, ne beena Mpenta, dyônsò adi disangisha pamwe too ne ku dibuuludiibwa dya civwa byônsò abi. Bivwa bikengela Mwanjelo wa mwandamutekete akangule bwalu busokoka bwa bitampi bisambombo. Bidi bikengela bwa byônsò abi biikale

bisangisha pamwe mu Mwânà wa muntu, kaabujima Kende kaa cikondo kaafiki ku kaabujima kaa Diyì Dyende, bwa kumwenesha kaabujima kaa Mubidi Wende. Kì Dîyì ndyôdì *adi*, pa dîbà adi, kì Diyì dyakula ndyadi dimweneshiibwe kudi Dîyì, kubuulula Dîyì.

²⁷² Mpindyewu, bu Nzambi mwa kungambila lutatu lûdì naalu, bidi, eyowa's we. . . Yèyè ngudi mukwenze, Yèyè mmumanye byònsò bidi bikutangila. Kadi bu Yèyè mwa kucisokolola. . . Udi ne mmwenekelu wa muntu ne mubidi tumatuma. Kadi bu Yèyè mwa kucinsokolwela, wèwè kì wàmanya ne mbulelela anyi kì mbulelela. Neucitàbùùjè anyi? Mpindyewu ikala muntangile munjaalamijile mèsù. Mu bushuwa bwa bwalu, udi muvwale binete, bivwa bikengela—bikengela wikale mubivwale. Ncya bushuwa ne kì mbwa aci bûdì muvwile apa to. Ndi mwa kumona ne Cyôcì aci cyălùkidì paanyima, wamonu's. Mpindyewu, udi mulwe apa mbwa kaadibulu kaa mashi. Wamonu anyi? Wamonu anyi? Udi—udi witabuuja ne Yèyè udi mwa kungambila mwaba wuditu anyi? Mu mikolo yebe. Udi witabuuja ne Nzambi ngudi wenza aci awu anyi? Udi witabuuja ne Nzambi udi mwa kungambila makwabo maalu kabidi bwebe wèwè anyi? Huh? Mbikumbane mudibi ne wèwè udi mwenyi, ne ndi mfuma ku. . . kuyiikilaku neebe ndambu. Udi witabuuja ne Yèyè udi mwa, udi witabuuja ne Yèyè udi mwa kungambila kûdì mufumine anyi? Udi mufumine ku Gary, mu Indiana. Udi witabuuja ne Yèyè udi mwa kungambila ne wèwè udi nganyi anyi? Mandamu Ogden. Aci ncilelela. Mpindyewu alukilaaku kwebe kumbelu kadi wondopiibwe, mu Dînà dya Yesu Kilisto. Nwamonu anyi?

²⁷³ Wetwawu! Katwena bamanyangane to, twètù peetu. Ncyèna mukumanye to, wamonu's. adi udi witabuuja ne Mukalenge Yesu udi mwa kunsokolwela lutatu lwebe anyi? [Mwaneetu wa bakaji udi wamba ne: "Ndi mumanye nanku."—Muf.] Udi mumanye nanku. Twasakidila, mwaneetu wa bakaji. Abi mbîmpè be. Eyo, bu mudibi ne udi mumanye aci, nenku, kaamunda aku nekuumuke. Kabidi udi—kabidi udi ne cyû—cyûjà mu lubadi mwebe amu. Ncya bushuwa, kì mmwômò anyi? Udi muswe bwa nkwambile ne mmu luseke kaayi ludici cisanganyiibwa anyi? Cidi mu lubadi lwebe lwa dyabalume amu. Aci ncya bushuwa menemene. Mpindyewu kwata njila ndaaku ne ikala mucitàbùùje, nenku neŭmvwè bîmpè.

²⁷⁴ Nudi nwitabuuja anyi? Kakuyi mpatà to, m'Bulelela. Nudi nwitabuuja ne Mwânà wa Nzambi, Mwânà wa muntu, mmupweke munda mwa bikondo bu mwakalayaYe anyi? Kadi, anu, nudi nwitabuuja ne buloba budi mu ngiikadilu wa Sodoma, bwikale pabwîpì ne kubutudiibwa ku kapyà, bu mwakabutudiibwa Sodoma anyi? Beena Sodoma bavwa bantu baa Bisamba bya bende, nwavulukaayi. Kadi mwômò amu, mu Sodoma amu, muvwà bamwe bantu baakane, Nzambi wakatuma musanjeela bwa kubabiikila bwa kupatukabo; bamwe baabo

baakalwa, bakwabo kabaakalwa to, ciibûngì cya kudibo baakashaalamu. Kadi kuvwa kasumbu kasòmbèle pa mukuna, Abraham, ne kwakalwa Musanjeela kudiye bwa kumuleeja civwa ne cya kwenzeka. Yèyè kavwa mwa kwikala mu byòbì abi to, twamb'eku twamb'eku. Kadi patudi twakulangana apa buloba budi mu ngiikadilu umwèumwè awu leelu ewu, ne Yesu Kilisto ki Mwânà wa Nzambi, Mwânà wa muntu, Mwânà wa Davidi, ne Yèyè mmulwe bwa kuDimwenesha.

²⁷⁵ Ndi mmona anu cintu kampanda ciikale cyenzekela mukaji ewu. Mmulwe apa bwa kiipacila kanene. Kî mmulwe apa bwa dîsaama to. Nudi bamanye cidiye muswe kundomba anyi? “Kumutentekela byanza”, bwa “apete dibatiiza dya Nyuma Mwîmpè.” Nwamonu anyi? Nwamonu anyi? Kî ncyà bushuwa anyi? Èla cyanza muulu piikalabi ne ncyà bushuwa. Nwamonu anyi? Nwamonu's, udi ne cintu cinene. Taatù wa mu Dyulu munanga, peesha mwan'Ebe ewu dijinga dya mwoyi wende, swaku bwa apete dibatiiza dya Nyuma Mwîmpè. Nenku neaMupete. Amen. NeuMupete, mwaneetu wa bakaji. Nzambi akubeneshe. UMupe luumu ne butumbi.

²⁷⁶ Udi witabuuja anyi? Kadi bishi nwènù badi aku abu, nudi nwitabuuja peenu, anyi? “Bu wèwè mwa kwitabuuja, maalu ònsò adi mwa kwenzeka.” Udi mumweneke ne meeji matooke menemene pa bwalu abu, udi witabuuja ne kaadibulu kaa mashi aku kadi paaku mwa kuumuka anyi? Wèwè udi musòmbè pààpa naka wawa muvwale muteelu mwenze bu wa màyi a matamba. Èla cyanza muulu pawikala witabuuja ne nekuumuke, nekuumuke. Ncitu mwanji kumonaku muntu wawa kacya bandela to, mmwenyi, mwenyi anu wa cya bushuwa ewu kùndi. Kacya ncitu mwanji kumumonaku to.

²⁷⁷ Nudi nuciitabuuja anyi, nwènù bakwabo, bateeleji? Mpindyewu, kanwenaayiku numona ne, cidi ne cya kwikala Yèyè anyi?

²⁷⁸ Kansere kî ncintu cikolele Nzambi bwa kwondopa to. Yèyè udi mwa kukondopa, kî mmwòmò anyi? Udi witabuuja ne Yèyè neàkòndòpè anyi? Eyo, nanku ndaaku, ucipete, mu Dîna dya Yesu Kilisto. Itabuuja anu cyanaana ne mwoyi webe wònsò.

²⁷⁹ Mwoyaawu, munanga wanyi. Udi mumanye, Yesu wakeela Mashi Ende panshi, mbwa—mbwa ebe mashi kwikalawu mîmpè. Udi witabuuja aci anyi? Nzambi munanga, nyewu mbenesha mwânà ewu, swaku apete dyediibwa dya mashi a cipompa dya dyumukila ku Kalvariyo. Umusha nsukaadi yònsò eyi, Mukalenge, ne enzaku bwa yèyè ùmwè bîmpè, mu Dîna dya Yesu. Nzambi akubeneshe.

²⁸⁰ Wetwawu! Udi witabuuja ne Yèyè udi mwa kwondopa nyima awu ne kumulogolola anyi? [Mwaneetu wa balume udi wamba ne: “Ndi mumanye ne Yèyè udi mwa kucyenza.”—Muf.] Eyo, ndaaku, itabuuja nanku, ikala ne diitabuuja. Twânji anu

tukutentekele byanza bwa wacilomba. Nzambi akubeneshe, mwaneetu wa balume.

²⁸¹ Udi witabuuja anyi? Yèyè wakenza byakudya mbwa kubidya, Wakenza cifu mbwa kubyandamuna bifidi bya mashi. Kadi pakaadi cintu kampanda cipeta lutatu mu cifu amu, Yèyè ki Mwondopi waci. Udi witabuuja aci anyi? Eyo, ki cyònsò cidi cikengela bwa wèwè kumanya, itabuuja ne mwoyi webe wònsò.

²⁸² Bu mudibi ne wèwè ewu uvwa ne cintu cimwecimwe aci, tungunuka ndaaku ne itabuuja ne mwoyi webe wònsò, wèwè peebe.

²⁸³ Mbîmpè, ntwadilaayi inàbànzà awu. Wetwawu! Mwànà wa bakaji mutekete bulengayi, mmwànà bikole be bwa kwikalaye ne disaamà dya bakaji. Udi witabuuja ne Yesu neakwondope cyôci aci anyi? Nzambi munanga, mwànà wa bakaji mutekete ewu, ndi ngeela mwena lukuna ewu mulawu pàncidi mu Bwikadi bwa Yesu Kilisto apa, swaku cimuumuke, swaku ondopiibwe. Mu Dîna dya Yesu. Amen. Akubeneshe wèwè munanga wanyi, neúmuvwè bîmpè.

²⁸⁴ Udi witabuuja anyi? Mpindyewu mundidimbi mufiike ngwawu ùbànda, lufu. Kansere kakeena... Nzambi udi mwa kwondopa kansere ne kwenza ne ùmvwè bîmpè. Udi witabuuja aci ne mwoyi webe wònsò anyi? Udi witabuuja ne Yèyè neakwondope cyôci aci anyi? Mu Dîna dya Yesu Kilisto, ndi ngeela mulawu cintu cyela mulawu eci mwinshi mwa mishipa micyamakane ayi, swaku bwa Nkuruse wa Kilisto àcyùmùshè. Enzaku bwa ciye, mu Dîna dya Yesu. Kwedi mpatà to, ndaaku, itabuuja ne mwoyi webe wònsò. “Bu wèwè mwa kwitabuuja, maalu ônsò adi mwa kwenzeka.”

²⁸⁵ Wetwawu! Mu bushuwa bwa bwalu, binyoka byebe abi biyaaya, ne newondopiibwe pawikala witabuuja. Udi witabuuja ne newikale mu mushindu wa mufwanyine kwendakana cyakabidi ne kudyumvwa bîmpè anyi? Mukalenge abenesheku mwaneetu wa bakaji munanga ewu, ne amwondope, mu Dîna dya Yesu Kilisto. Ndaaku, mwikale witabuuja ne mwoyi webe wònsò.

²⁸⁶ Udi witabuuja ne cintu cimwecimwe aci cidi mwa kukwenzekela anyi? Ee, mêmè ndi ngiitabuuja ne cyamanyi kukwenzekela. Newikale mwa... Wèwè mwitabuuje ne wondopiibu mpindyewu mene. Ndi ngiitabuuja mêmè, ne cyamanyi kuumuka. Mu Dîna dya Yesu Kilisto, mwaneetu aye ne ikale anu mwende ne kale ne mubidi tumatuma, bwa butumbi bwa Nzambi. Amen.

²⁸⁷ Ndekeelu wa byònsò cyènzèkì's. Wèwè udi musòmbè pààpa naka wawa, mwikale udila mwadi, udi witabuuja ne nsundu ayi neiikale mwa kuumuka anyi? M'Mushaale anu apa tusunsa makumi asatu tushaale etu, bimweke nanku, anu kumpala kwanyi eku, n'Yèyè ewu mwimane menemene anu ku luseke

Iwa muntu mulum'ewu. Ukààvwa mumane kwikala witabuuja, kî mmwômò anyi? Itabuuja ne mwoyi webe wónsò, nenku udi mwa kwalukila ku Texas ne kuumvwa bîmpè. Ncitu mwanji kumonaku muntu ewu kacya bandela to.

²⁸⁸ Udi witabuuja ne neŭmvwè bîmpè bwa nyima webe mukese awu ne wèwè newikale pabwîpì ne kwondopiibwa anyi? Mukalenge Yesu, lenga mwânà mukese ewu umwondope, mu Dîná dya Yesu Kilisto. Amen. Itabuuja nanku ne mwoyi webe wónsò.

²⁸⁹ Mpindyewu Nyuma awu udi usemena pabwîpì, Ûdi myaba yónsò mu citanda emu. Mbikole bwa kwamba mwaba udi aci mwa kwikala cifumine, mutu unyunguluka. Indilaayi nnuleeje cintu kampanda. Mbanganyi badi ne màsaamà a mitu yinyunguluka, kunudi aku, elaaŷi byanza muulu. Nwamonu's, mbikole bwa kwamba ne ncikampanda anyi ncikansanga. Kadi Nzambi ngudi mumanye byónsò pa cyôcì aci, majinga ebe ônsò. Ukààdi muteeteteete byónsò, bikole, bwa kuàcìmuna. Bintu byàbûngì mu nsòmbelu byûdi uditacisha bwa kulekela, peebe muswe kukwacila Nzambi mudimu ne byónsò bidi munda mwebe. Bitu byenze anu bu ne kudi cintu kampanda cidì cikwaluja paanyima. Udi witabuuja ne necyenzeke mpindyewu mene, mu dinda emu, ne neuvwijiibwe mudishikaminè ku bintu ebi anyi? Udi muswe kuciitabuuja anyi?

²⁹⁰ Taatù wetu wa mu Dyulu, bwa bakwabo aba kumonabo ne Wèwè udi Kilisto awu, Mwânà wa Nzambi awu, ondopaku mukaji munanga udi mwimane kaaba aka ewu, Taatù, umutuuyishe cilunji. Tudi bónsò bamanye cidiyè usaama, Mukalenge, ne tudi tulomba bwa Wèwè kumwondopa. Pândi mmutentekela byanza ne diitabuuja dyónsò apa, ndi, mêmè paanyi, mupete dibundudiibwa mpindyewu mene, muzengele, Sataana, mudisaamishe tujilu twa mutu bwa mudimu mupitepìte bûngì, tujilu twa mutu tungenza bibi. Mulekele, Sataana. Ndi mmutentekela byanza ne diitabuuja dyónsò dîndì naadi, mulekele, mu Dîná dya Yesu. Ndaaku, mwikale uMwitabuuja. Ki cyûvwà muswe bwa mêmè kwenza ncyôcì aci.

²⁹¹ Ncyêna mukumanye to, udi mwenyi kûndì. Kaamunda aku, wèwè mwitabuuje, nekondopiibwe. Ne cikwabo cintu, udi ne binyoka. Wèwè mwitabuuje, neŭmvwè bîmpè. Nyima uvwa ukusaama awu wakuumuku. Ndaaku, mwikale witabuuja.

²⁹² Nudi nwitabuuja ne mwoyi wenu wónsò anyi? Apa, aci. . . mbanganyi. . . Ki bónsò badi mu mulongo abu anyi? Kucidi kushaale bakwabo mu mulongo anyi? Nwênù bónsò picilaayi apa bwa mmone mwa kutentekela babeedi byanza. Twinyikaayi mitu bwa katanci kakese cyanaana, tukaadi bapite dîbà umwe. Nzambi munanga, nyewu ntentekela mwaneetu wa bakaji byanza, pacidi Dilaabiibwa dya Nyuma Mwîmpè kaaba aka apa. Mwondopeku, mu Dîná dya Yesu. Taatù wa mu Dyulu munanga,

nyewu nntetekela mwaneetu wa balume byanza . . . [Katupa kaa mukaba wa mëyi munda mutupu.—Muf.] . . . biitabuuja.

²⁹³ Kaa, wêwè ncyêna mukusambidile to, mwaneetu wa balume? [Katupa kaa mukaba wa mëyi munda mutupu—Muf.] . . . mwaneetu wa balume, udi mumanye cidiye mwenze anyi? Yêyè's ncilembi wa kale wa tushà. Ûvwa wamba ne ùvwa ne cingoma civwaye utwatwatwa naaci buluwà bwa tushà, wamba ne ùkaadi mpindyewu mukulumpe mupitepite bwa kuya mu ditwa dya buluwà. Ûvwa uswa kulwa ne cingoma aci bwa kucimpeesha mêmè. Amen. Twãmbàayi ne: "Mukalenge atumbe." [Disangisha didi dyamba ne: "Mukalenge atumbe."]

Ndi muMunange . . .

Kùpu mwoyi kaalukonko keebe kakese aku to, wakateeka apa. Pawikala kuyi mukapete leelu ewu to, ulwe naaku mu diisàtu anyi mu dyalumingu.

Bwalu Yêyè wakannanga kumpala

Ne wakampetela . . . Nwapicidi bônso mu mulongo wa babeedi anyi, mulongo wa babeedi? . . . lupandu

Pa mucu wa Kalvariyo.

²⁹⁴ Anji elaayibi meeji tǔng mushindu udiYe neetu ne kalolo awu, mpindyewu. Anji elaayi anu meeji cyanaana, Yêyè udi ujaadika Dìyi Dyende! Nwamonu anyi? Mpindyewu nwamonu's, bu mêmè mufwanyine kwondopa, nunku's mbûngà bwalu, nwamonu's, kadi Yêyè ki Ukàadi mumane kucyenza. Nwamonu anyi? Pa nanku Yêyè udi anu ujaadika Bwikadi Bwende cyanaana kaaba aka ne: "Ndi Ewu uvwa mufwe, kadi mwikale ne mwoyi bwa kashidi ne kashidi." Kacyakacya kakuvwaku muntu bu Yêyè to. Yêyè uvwa Muntu wa paBwende. Ûvwa Nzambi. Nwamonu anyi? Kacyakacya kakuvwaku muntu mwikale ne nsòmbelu wa bwena Wende Yêyè to. Kacyakacya kakuvwaku muntu mulediibwe mwakalediibwaYe Yêyè to. Kacyakacya kakuvwaku muntu uvwa mwa kwenza civwa . . . bu mwakenzaYe Yêyè to. Kacyakacya kakuvwaku muntu ukaavwa mufwe mwakafwaYe Yêyè to. Kacyakacya kakuvwaku muntu mubiike ku bafwe mwakabiikaYe Yêyè to. "Kaa," mùdi wamba, "anji indila kakese, Mwaneetu Branham, bakwabo's baakabiishiibwa ku bafwe." Eyo, kadi's baakafwa cyakabidi. Kadi Yêyè udi ne mwoyi bwa kashidi ne kashidi. Nwamonu anyi? Kacyakacya kakutuku muntu mubiike ku lufu bu mwakabiikaYe Têyè to. Yêyè wakabiika ku bafwe, bwa kashidi ne kashidi.

²⁹⁵ Twãnjàayi ku Mwimbilawu mpindyewu.

Kaa, ndi muMunange, ndi muMunange

Bwalu Yêyè wakannanga kumpala

Ne wakampetela lupandu

Ku Kalvariyo . . .

Twinyikaayi anu mitu cyanaana.

²⁹⁶ Mukalenge Yesu, ndi munange cisamba eci. Kadi nyewu anu mbalama Mukalenge, kacivwa mu meeji aanyi bwa kwenza nanku to. Kadi kaaba aka, bààbùngì baa kudibo ne bàná bakese biikale bindile, bàkaadi ne nzala, kabayi bumvwa to. Kadi mbasòmbe anu mwaba ewu, bwalu mbamanye ne muntu kèna mwa kwikala ne mwoyi to, anu ku Dìyì dya Nzambi. Ne pashiishe padi Dìyì munkaci mwa kwambiibwa, ne pashiishe òmanyishiibwa, òmwèneshiibwa, òjaadikiibwa, pa dîbà adi badi bamanya ne cidi mwa kwikala anu Wèwè. Ndi nsambila bwa muntu ne muntu. Babenashaaku, Taatù. Swaku bwa biikaleku ne mubidi tumatuma ne makanda bwa lwendu ludi lusanganyiibwa kumpala kwetu elu. Wababeneshaku munda mwa lumingu emu. Ne piikalabi ne ndiswa Dyebe, Mukalenge, bwa ne tudi mwa kusangila cyakabidi apa mu dyalumingu òlwalwà edi, Nsabatù ulwàlwa ewu, bwa kulwa kaaba aka bwa kukuukwila, ndi ndomba, Nzambi, bwa Wèwè kubapa dikanda. Bamwe baa kudibo badi mwa kupanga kutwilangana neetu, nebikengele bwa bamwe baa kudibo baye ku maabo mu bitupa bishiileshiilangane bya ditunga, pàmwàpa dyamwamwa dya mbù, anyi pambelu paa États-Unis. Tudi tulomba bwa Wèwè kwikala naabo ne kubakwacisha. Swaku bwa twatwilangana ku makàsà a Yesu, òngà dituku. Twènzèlèku nanku, Taatù. Tùkwàcishèku mpindyewu, patudi banangangane muntu ne muntu apa, ne baKwitabuuje, biikale tutekemena ne òngà dituku mwonji udi muswikakaje myoyi yetu pamwe mpindyewu ewu newikale nshinga wa Cyendeleele, witabeku bwa twètù kwikala ne mwoyi mu Cimenga aci cya nseke yinaayi, bwa Cyendeleele cijima. Mu Dîná dya Yesu. Amen.

Eyo.

Angata Dîná dya Ye- . . . wèndè naadi,
Mwànà wa . . .

Mpindyewu labulanganaayi ku cyanza muntu ne mukwende.

. . . dikenga;
Nedikupe disanka . . .

Kudimuka ulabule muntu kampanda ku cyanza, wamba ne:
“Ndi ne disanka dya kwikala neebe kaaba aka, mu dinda emu.”

Nda naaDi kwònsò kùyaayà.

Dîná dya mushinga, Éyì dya bupole be!
(Nzambi akubeneshe, Ben.)

Ditekemena dya buloba ne disanka dya Dyulu;
Dîná dya mushinga, Éyì dya bupole be!
Ditekemena dya buloba ne disanka dya Dyulu.

Mpindyewu, teejeaayaaku eci mpindyewu, mpindyewu imbaayi mushindu ewu ne:

Angata Dîna dya Yesu wëndè naadi,
 Bu ngabu ku buteyi bwònsò; (Mpindyewu,
 teejeaayi ne ntema.)

Paadikungwija mateeta makunyungulukile.
 (Wěnzè cinyi?)

Nungana Dîna dya cijila adi mu disambila.

Dîna dya mushinga (Dîna dya mushinga), Éyì
 dya bupole be!

Ditekemena dya buloba ne disanka dya Dyulu;
 Dîna dya mushinga . . .



ÛJAADIKA DÏYÌ DYÈNDE LUA64-0816

(Proving His Word)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matuku 16 a ngondo wa mwandamukulu, cidimu cya 1964, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org